

NWER NYI MATIU

*Nwer nyi et'tohngo ji Jisos lohng no
(Luk 3:23-38)*

¹ A wo li nwer nyi et'tohngo ji Jisos Kraist lohng no, ji jolo mmon a Devid,* Devid ji jolo mmon no Ebrahim.†

² Ebrahim jele Aisik. Aisik jel Jakob. Jakob jel Juda, a abon bako.

³ Juda jele Peres, go Sera. Nnyehn ebo, bo jo lung-e re Tamar. Peres jel Hesron. Hesron jel Ram.

⁴ Ram jel Aminadab, Aminadab jel Nason. Nason jel Salmon.

⁵ Salmon jel Boas. Nnyehn Boas, bo jo lung-e re Rehab. Boas jel Obed. Nnyehn Obed, bo jo lung-e re Rut. Obed jel Jesi.

⁶ Jesi jel Devid ji jolo ntul. Devid ji jolo ntul jel Solomon. Nnyehn Solomon tohko jol nkal Uraya.

⁷ Solomon jel Rehoboam. Rehoboam jel Abija. Abija jel Asa.

⁸ Asa jel Jehosafat. Jehosafat jel Joram. Joram jel Usia.

⁹ Usia jel Jotam. Jotam jel Ehas. Ehas jel Hsekaya.

¹⁰ Hsekaya jel Manase. Manase jel Amon. Amon jel Josia.

* **1:1 1:1** Mak 12:25-37 † **1:1 1:1** Jon 8:58

¹¹ Josia jel Jekonia, a abon bako, ngare nyi anebe Bebilon ba bob abone Israel, tahm a bo go Bebilon.

¹² Ngare nyi bo ma bob abone Israel, tahm a bo go Bebilon, owo Jekonia kehm jele Sealtiel. Sealtiel jel Serubabel.

¹³ Serubabel jel Abiud. Abiud jel Eliakim. Eliakim jel Asor.

¹⁴ Asor jel Sadohk. Sadohk jel Akim. Akim jel Eliud.

¹⁵ Eliud jel Eleasar. Eleasar jel Matan. Matan jel Jakob.

¹⁶ Jakob jel Josef ji jolo nlum a Meri. Meri ji jolo nnyehn Jisos, Jisos ji bo kpo lung-e re Kraist.

¹⁷ Bomo goji Ebrahim, nde nne l'jel mmon, mmon tahm jel ntem mmon ano ano tete ba rehng go ngare nyi Devid, babnde nne jolo ewubu ane ani. Bomo goji Devid, nde nne l'jel mmon, mmon tahm jel ntem mmon ano ano tete ba rehng ngare nyi bo bobo abone Israel, tahm a bo go Bebilon, babnde nne jolo ewubu ane ani. Bomo ngare nyi bo bobo abone Israel, tahm abo go Bebilon, nde nne l'jel mmon, mmon tahm jel ntem mmon ano ano tete ba rehng ngare nyi Kraist, babnde nne jolo ewubu ane ani.

Ana bo jele Jisos

(Luk 2:1-7)

¹⁸ Ana wo bo jele Jisos Kraist. Nnyehn Jisos, bo jo lung-e re Meri. Ngare nyi bo ma lam elbal abola Josef, Josef tikem noongo a Meri, Meri sa ela go nsahm Etingi Etohko.‡

‡ 1:18 1:18 Luk 1:35

¹⁹ Josef nlum ewe jolo nnobeljina nne. Á sebem re á sono Meri. Á sebe mbang ana nyi á bahk-e tene, ane k'wuk.

²⁰ Eji Josef jo tir nsol nyio kpee, enjel nyi Esowo kehm bake, ba kpir-e go nlem, kehm-e tongo re, “Josef ji mmon no Devid, ka kpe fahl elkoko Meri go elbal! Tibre ela bi á ma sa o, á sa go nsahm Etingi Etohko.

²¹ Á bahke jele mmon, no a bahk-e gungu mbing re Jisos (ji lohngo re nt'tahre). Tibre á bahke tahre ane ebe yehke go ebo abiafem.”§

²² Nsol nyia kpee limi, eji alum nya Jehova bungu sehng goji nnyehnamahr l'lohko jol go etingitingi, nya á bungu re,

²³ “Mmongungu a nnenkal, (Ngbahme nyi bo kala n'noongo a ne) bahke sake ela, jel mmon no nlum, no bo bahke jo lung-e re Emanuel.” (Ji lohngo re, “Esowo li a nahre”).

²⁴ Josef nyahme kan go ellu, á kehm limi ana enjel nyi Jehova tong-e no, á feere song ko Meri go elbal.

²⁵ Á tikem noongo a ne tete á jel ngbokambang a mmon ewe no nlum. Josef kehm-e gungu mbing re Jisos.

2

Ana akahnkahn ane lohngo go ero nfam ba

¹ Jisos, bo jel-e go Betlehem ji Judea ngare nyi Herod jolo ntul. Owo akahnkahn ane kehm lohngo go ero nfam ba go Jeusalem,

§ **1:21 1:21** Luk 1:77; Elt 4:12

² ba kehme elbahbe re, “Mmon no na, no bo m-e jel, no li ntul no Jus? Tibre wahr ebnyehn elonlo eje go ero nfam. Owo wahnge e ba no re wahr ba kak-e.”

³ Eji ntul a Herod wuku ano, eltim kehm-e jokko, a aneb Jeusalem kpee.

⁴ Owo á kehm lungu atubesi abalimajom, a at'tibi ba atahm, bo ba kono edi ajehng. Á kehm bahbe bo re, “Kraist jio, bo bahk-e jele gan?”

⁵ Bo kehm-e faange re, “Go Betlehem ji Judea.* Tibre ana wo nnyehnamahr Esowo nyono no re,

⁶ “ ‘Wahn Betlehem ji Juda, wahn erenng ejahbe sang go mbang anyehng anyehng

go ellong atubesi ajahbe nya li go Juda.

Tibre go egahne ellong wo,

ntubesi bahke lohngo,

no bahke ba fili Israel, ane ebame.’ ”

⁷ Herod kehm lungu akahnkahn ane bao, tahm a bo go nkpohko, song bahb bo ekahmekahme ngare nyi elonlo jio lohngo no.

⁸ Owo á kehm tumu bo tv go Betlehem, a elle ni á tubu bo re, “Songen, wahn song seb mmon noo nob nob! N l'song seb-e nyehn, lim-m wahn, me n kahn, eji me n l'tob je song kak-e fvfo.”

⁹ Eji bo ma wuk ana ntul bungu no, bo kehm tahme. Elonlo ji bo jo nyehn go ero nfam kehm gboko bo mbang tete song yiimi edi ji mmon noo jolo no.

¹⁰ Eji bo kpe nyehn elonlo jio yim no, bo bele eyebatahng sehng, fere jo g'geere.

* 2:5 2:5 Jon 7:42

¹¹ Bo kehm yeke ekp'kpa, song nyehn mmon, a Meri nnyehn, gbo jamme alahng, kak mmon. Bo kehm soro lennge abam ebo, yehke agul, frankinsens, a mmir, yare mmon.

¹² Esowo kehm rehke bo go nlem re, bo k'kpe feere goji Herod. Owo bo kehm sehng mbang nyindiki kehng.

Ana Josef abola Meri, be no, tahm go Ijib

¹³ Ngare nyi akahnkahn ane bao ma tahm fi, owo enjel nyi Esowo kehm ba kp'iri Josef go nlem, kehm-e tongo re, "Tahm, wo rod mmon, a nnyehn, be, song go Ijib, kang ona tete me n kpe ba tong-a. Tibre Herod yahke ba mmon noa seb re á wul."

¹⁴ Josef kehm tahme, rod mmon, a nnyehn, bo tahm atv atv song rehng go Ijib.

¹⁵ Owo á jolo no tete Herod kpo, eji l'lohko jol ana Jehova bungu sehng goji nnyehnamahr re, "N lungu mmon ewame go Ijib, á lohng ba."

Ana Herod wulu abonse ba nse a nse

¹⁶ Herod sebe kan kahn re, akahnkahn ane m-e nehm, atahng kehm-e rake tete. Á kehm tumu ane, bo song wul abon ba nlum kpee go Betlehem, a abon ajahbe ba li senng o kak, ba ma kang bomo nnya ebal feere ndi, tib ana á wuku goji akahnkahn ane bao bada ngare nyi elonlo lohngo no.

¹⁷ Ngare nyio nyi lohko lim ana nnyehnamahr Jeremaya bungu no re,

¹⁸ "Bobwuk ewahl ane go Rama, ewahl ji ane ma biingi aling, fere kp'lingi ndon ndon.

Resel kp'lingi abon ebe.
Bo kak-e eltim,
jol eltim we tikem naange,
tibre bo kpeem li elikiliki.”

Ana Bab Josef feere kehngɛ go Nasaret

¹⁹ Ngare nyi Herod ma kpo, owo enjel nyi Jehova kehm kpe song kpiri Josef go nlem, eji á jolo go Ijib, kehm-e tongo re,

²⁰ “Tahm, rod mmon, a nnyehn, wo feere a bo go ndi nyi Israel. Tibre ane ba jo seb re bo ba wul mmon bobkpo.”

²¹ Josef kehm tahme, rod mmon, a nnyehn, feere a bo go ndi nyi Israel.

²² Eji Josef wuku re, Arkelaus ebko nji nyi nde Herod, kp'fili Judea, á kehm kehme elfahle eljeke o. Owo Esowo kehm-e kpe rehke go nlem, Josef kehm tahme go ejang bi Galili,

²³ song lene go ejahbe ji bo kpo lung re Nasaret, eji l'lohko jol ana abanyehnamahr Esowo bungu no re, “Bo bahke jo lung-e re nne a Nasaret.”†

3

*Etib bi Jon ji nwohngalahb jo tiingi
(Mak 1:1-8; Luk 3:1-18; Jon 1:19-28)*

¹ Ngare nyio Jon ji nwohngalahb kehm lohngo ba, ba kehme elbunu go elka emahng nio ni Judea re,

² “Yaangen elkpín enahne, tibre etul bi Esowo ebkabbe.”

³ Jon wo jolo nne no nnyehnamahr Aisaya jo bung bada ne, eji á jo bung re,

† 2:23 2:23 Jon 1:46; 7:41

“Nne noa,
kp'rabe go elka emahng re,
'Tuungen mbang nyi Ntul bum-e.
Limen mbang t'tor,
nyi á bahke sehngé.' ”

⁴ Nsol nyi Jon jo kak, bo limi go anyar nyam nyi bo kpo lung re ekamel. Á jo gbaange egbaange ji bo limi go ngunyam. Á jo li agohrobi, fere jo yab akehng ekon.

⁵ Ane jo lohngo go Jeusalem je go ege, a ane ba jolo go Judea kpee, go ane kpee ba lene ajahbe nya jolo egbuk ebbal ebbal bi aya ma bo kpo lung re Jodan.

⁶ Bo jo fvrvr abiafem ebo, á jo wohngo bo alahb go Jodan.

⁷ Eji Jon nyehne aneb Farisi, a anebe Sadusi gbalee kp'bake re á wohngo bo alahb, á kehm tongo bo re, “Wahn ane ba li ana akumbad ba! Nne awo tong-n re, m bahke foro go erakatahng ji Esowo ji kp'bake?”

⁸ Limen nsol nyi bahke tibi re, wahn eblohko yaange elkpín enahne.

⁹ Kana kpe laange, fere jo bung go egahna ntim re, ‘Ebrahim wo li nso ejahre.’* N kp-n tongo re, Esowo bahke ma ko atal nyaa, lim abon ka Ebrahim.†

¹⁰ “Bobtoobo elfuk bum, ni bo bahke kiimi alohk nti, melle nti nyio. Eti ajehng ajehng ji tohko kab akab nya nno, bo bahke mehle tub, fere rod kak agun.‡

* **3:9 3:9** Jon 8:33-39; Rom 2:28-29; 4:12 † **3:9 3:9** Gal 3:26-29

‡ **3:10 3:10** Luk 13:7-9

11 “N kp-n wohngo alahb mao ma egbokondon. Nne no kp'bake toon-m wo ga gbal sehng me. Jol me n fuumem re me n sol akpaketa enye. Á bahk-n wohngo alahb go Etingi Etohko, a agun.§

12 A fili ed'da go ebo, kp'febe arasi enye. Á bahke kpuku arasi enye, song kak go ege ekp'kpa, fere jahm awal go agun nya l'k'tiki lahme elahme-lahme.”

Ana Jisos bele ewohngalahb
(Mak 1:9-11; Luk 3:21-22)

13 Ngare nyio Jisos kehm tahme go Galili, song rehng go Jodan goji Jon re Jon wohng-e alahb.*

14 Jon jo gare re á sahd-e, kehm-e tongo re, “Kehn wo wo nobo re wo wohngo na me alahb, wo ma fere ba na ga egame.”

15 Owo Jisos kehm-e faange re, “Nong jol ano! Tibre fuumu re wahr lim nsol kpee nyi Esowo sebe re wahr lim.”† Jon kehm taame.

16 Tvtv o eji Jisos ma bel ewohngalahb, á kehm lohngo go alahb. Ngare nyio ejahbetul Esowo eblenng ka-e. Owo á kehm nyehne etohko ji Esowo go elfoongo ni ebbehl kp'badde abake, kehm ba jol a ne.

17 Owo bo kehm wuku ellum go ejahbetul Esowo ni bungu re, “A wo li akor-m mmon ewame, no kpo kor-m s'sehng.”‡

§ 3:11 3:11 Elt 1:5; 2:3 * 3:13 3:13 Luk 12:50; Jon 1:29-34

† 3:15 3:15 2 Kor 5:21 ‡ 3:17 3:17 Mak 9:7

4

Ana nnehm gare Jisos
(Mak 1:12-13; Luk 4:1-13)

¹ Etingi Etohko kehm yehke Jisos, song kak go elka emahng re nnehm gar-e.*

² Eji Jisos ma bade elne njal nfung atahl abal, owo njal kehm-e yame.

³ Nnehm kehm bake, ba tong-e re, “A l’jol Mmon Esowo, tong atal nyaa siingi abred.”

⁴ Jisos kehm-e faange re, “Bo nyono go nwer Esowo re, ‘Abred nya nya sang wahnge nne kpo kpin, á kpo bel elkpin go ellum anehng anehng ni lohng go nnyo mi Esowo.’ ”†

⁵ Nnehm kehm rodo Jisos, tahm a ne go mbarebare ejahbe, song kun-e go elkong etahk Esowo,

⁶ kehm-e tongo re, “A l’jol Mmon Esowo, yehb, wo ba gbo go ndi! Tibre bo nyono go nwer Esowo re,

“ ‘Esowo bahke tongo enjel enye bada na. Bo bahk-a gbiiri go bo abo, eji a l’k’ba jahre akpade enya go eltal.’ ”

⁷ Jisos kehm faange re, “Bo t’tob nyon go nwer Esowo re, ‘Ka gare Esowo, Ntul ewa!’ ”‡

⁸ Nnehm kehm kpe rod Jisos, tahm a ne go ewong ji sahb w’wahre, fere tib-e ajahbe kpee nya li go njini, a ellub ni bo kpi no,

⁹ kehm-e tongo re, “M bahk-a kake nyaa kpee, a l’jamme alahng kak-m.”

¹⁰ Owo Jisos kehm-e tongo re, “Nnehm, tahm-m go esamahr! Tibre bo nyono go nwer Esowo

* **4:1 4:1** Jems 1:2; Hib 4:15 † **4:4 4:4** Jon 4:34; 6:27 ‡ **4:7 4:7** Mat 27:42

re, 'Esowo, Ntul ewa wo wo, a bahk-e jo kak. Ye ntahngtahng wo, a bahke fere jo lok-e.' "§

¹¹ Nnehm kehm-e soro yake. Babenjel soro ba kak-e ebo.

*Ana Jisos bomo alum Esowo abungu go Galili
(Mak 1:14-15; Luk 4:14-15)*

¹² Eji Jisos wuku re, Jon, bo m-e kak ngbekobo, á kehm tahme eje, song rehng go Galili.*

¹³ A kehm tahme go Nasaret, fere song lene go Kapenium ji jolo kohlo eto ji Galili, go ndi nyi abone Sebulon, a ba Naftali,

¹⁴ eji l'lohko jol jang jang ana nnyehnamahr Aisaya bungu no re,

¹⁵ "Ndi nyi abon Sebulon,

a ba Naftali,

ba lene ejang bio bi eto ji Galili li no,

egbuk Jodan

jehko go Galili jio ji ane ba ki nyi Esowo,

¹⁶ ane bao ba jehk go ejannge

ebnyehn egburu ellennge.

Ane bao ba nong go emel elkv,†

edi ebkehme bo lennge."

¹⁷ Bomo ngare nyio asongo Jisos kehm kehme etib ebe tiingi re, "Senngen njahm go egahne abiafem! Tibre etul bi Esowo ebkabbe."

*Ana Jisos lungu abasahre nsahre, ane na ani
(Mak 1:16-20; Luk 5:1-11)*

¹⁸ Eji Jisos jo jen go nkpe eto nyi Galili, á kehm nyehne abasahre nsahre, ane na abal, noko jolo Saimon ji bo jo lung-e re Pita, noko, bo jo lung-e

§ 4:10 4:10 Jems 4:7-8 * 4:12 4:12 Mat 14:3 † 4:16 4:16 Elt 26:18

re Andru ji mmonannyehn Pita.‡ Bo kake erim alahb.

¹⁹ Owo Jisos kehm tongo bo re, “Tahmen toon-m, m bahk-n limi n fere jo bim ane.”

²⁰ Bo kehm soro tahm arim ebo sa, tahm toon-e.§

²¹ Jisos kehm kpe sehng asongo, kpe song nyehn ane abal bako. Noko, bo jo lung-e re Jems. Noko, bo jo lung-e re Jon, mmonannyehn Jems. Bo jolo abon Sibidi. Bo woomo go egbang, jo baade arim ebo, a Sibidi nde ebo. Owo Jisos kehm lungu bo.

²² Bo kehm soro tahm egbang sa, tahm nde ebo sa, tahm toono Jisos.

*Ana Jisos jo tib, fere jo lim aneb ayam, bo nob
(Luk 6:17-19)*

²³ Jisos kehm tahme, jo yannge go Galili kpee, jo tib ane go bo ntahk ero, fere jo tiingi nnoobo etib bio bi etul bi Esowo, fere jo lim ane, bo nob elkohn eyam abehng abehng.*

²⁴ Ane kpee ba jolo go Siria wuku kan elgahm ene, owo bo kehm koko aneb ayam kpee ba go ege, ba jo yam ajoobo ayam tvv, fere jo nyehn ajoobo arem, a ane ba bele abi atohko go bo a ntim, a aneb eyam atatehk, a ane ba ma banne. Jisos limi bo kpee, bo nob.

²⁵ Ellong ane gbalee ba jo toon-e, egom jindiki lohng go Galili, egom jindiki lohng go Dekapolis, egom jindiki lohng go Jeusalem, egom jindiki lohng go Judea, egom jindiki lohng go egbuk Jodan jehko.

‡ 4:18 4:18 Jon 1:35-42 § 4:20 4:20 Mat 19:27 * 4:23 4:23 Elt 10:38

5

Alum nya Jisos bungu go ero ewong

(Luk 6:20-23)

¹ Eji Jisos nyehne ellong ane bao, á kehm tahme go ewong. Á ji kan a me, abat'toono ebe kehm bake go ege.

² Á kehm kehme bo tib re,

³ “Elfuulu li ka ane ba ma gbo ekpak bio bi etohko. Tibre etul bi Esowo li ka bo.*

⁴ “Elfuulu li ka ane ba jehk ndon ndon. Tibre bo bahke kake bo eltim.†

⁵ “Elfuulu li ka ane ba kpi nnaange eljini. Tibre bo bahke bele njini ana ejum elehke elkv ebo.

⁶ “Elfuulu li ka ane ba kp'sahb s'seb re bo li eno go esamahr bi Esowo. Tibre bo bahke lehke eno.‡

⁷ “Elfuulu li ka ane ba, ane kpo fili bo ndon. Tibre bo bahke tob fili Esowo ndon.§

⁸ “Elfuulu li ka ane ba ntim ebo li saang. Tibre bo bahke nyehne Esowo.*

⁹ “Elfuulu li ka ane ba kpo seb elkoono.† Tibre bo bahke jo lung bo re abon ba Esowo.

¹⁰ “Elfuulu li ka ane ba, bo kp'nohko bo tib eji bo kp'limi nsol nyi li go etingitingi. Tibre etul bi Esowo li ka bo.‡

¹¹ “Elfuulu li ka-n, ane l'jo su-n, fere jo nohk-n, fere jo kiimi elkohn efahnge anehng anehng lak-n tib go egame esi.

¹² “Belen eyebatahng, wahn jo geere. Tibre eltuuru enahne ni li go ejahbetul Esowo kp'gbale.

* 5:3 5:3 Luk 18:13-14 † 5:4 5:4 Ell 7:14-17 ‡ 5:6 5:6 Elt 16:30

§ 5:7 5:7 Jems 2:13 * 5:8 5:8 1 Jon 3:2-3 † 5:9 5:9 Rom 12:18

‡ 5:10 5:10 1 Pit 3:14

Ano wo bo jo tob nohk abanyehnamahr Esowo ba tohko jol, wahn kehm jini.

Akang abola ellennge
(Mak 9:50; Luk 14:34-35)

¹³ “Wahn ba li akang ma njini. § Elyebe akang l'lohng go akang, bahke limi renan, kehm kpe yebe? Nehm kpe nob ellahbe. Bo bahke sale na wohng go, ane jo kadde sehng.

¹⁴ “Wahn ba li ellennge ni njini.* Ejahbe ji bo si kunu go ewong nehm kpe ma biiri.

¹⁵ Nnene limm, no kpo nyaale et'rekahng, rod ejeere konngo. Á bahke rodo na kunu go ejum ji bo kpo kunu at'rekahng. Owo bahke yake ka ane kpee ba wob ekp'kpa jio.

¹⁶ Nong, ellennge enahne ni n kpi no jo ya go esamahr ane, eji bo l'nyehn nnoobo enyahne nyi n kpo lim, fere jo tehk nso ejahne no li go ejahbetul.†

Alum nya jisos bungu bade atahm nya Moses

¹⁷ “Kana tir re m ba re me m ba range atahm nya Moses, a eltibi ni abanyehnamahr tibi no.‡ M baam re me m ba range, m ba re me n gohro ba lim, biingi go nseenge.§

¹⁸ Etingitingi, n kp-n tongo re, Eji elbung abola ndi kpeke li, mmonr'rohka mmojum awohng awohng no atahm nehm range tete rehng es'kohro ji nsol kpee bahke male.*

§ 5:13 5:13 Kol 4:6 * 5:14 5:14 Fil 2:15 † 5:16 5:16 Ef 5:8-9
‡ 5:17 5:17 Rom 3:31 § 5:17 5:17 Rom 8:3-4; 10:4 * 5:18 5:18
Luk 16:17

19 “Owo fvfo, nne awohng awohng no l'yuudu nr'rohka mmontahm awohng awohng,† afi á tibi ane ano, ye wo bahke ga jol nkpak go ejahbetul Esowo sehngre ane kpee. Nne awohng awohng no l'bum atahm, fere jo t'tib, ye wo bahke jolo nj'joka nne go ejahbetul Esowo.

20 “N kp-n tongo re, n̄ nehm ma yel go ejahbetul Esowo, sehngem re, eno ejahne ji n̄ bahke lehke go esamahr Esowo sehngre ji at'tibi ba atahm, a Bab Farisi.‡

Eltibi ni li bade elkoono

21 “Wahn ebwuk ana bo tongo ane ba jolo mahne mahne re, ‘Kana jo wul nne! Nne awohng awohng no l'wul nne, bo bahk-e koko, tahm ane go elam.’

22 Wo, me n kp-n tongo re, Nne awohng awohng no eltim l'rak-e tob mmonannyehn, bo bahk-e koko, tahm a ne go elam. Nne awohng awohng no l'su mmonannyehn, bo bahk-e koko, tahm a ne go esub. Nne awohng awohng no l'tong mmonannyehn re, ‘Egboolo ji!’ yeblim ebi ji bo bahk-e koko, song kak go ellulagun.§

23 “A l'ko ayare ba a nya go edi njom alimi, a l'fere buumu ona re, n̄ li go ntong awahn a mmonanne,

24 yake ayare enya bum kohlo edi njom alimi jio, wo feere, tohko song bung ntong nyio mal, fere koono a mmonanne, wo kehm feere ba ka ayare enya.*

† 5:19 5:19 Jems 2:10 ‡ 5:20 5:20 Rom 9:31-33 § 5:22 5:22 1 Jon 3:15 * 5:24 5:24 Mak 11:25

25 Jo koono a nnekv ewa elwaare, eji ngare kpeke li,[†] eji nnekv ewa l'ki-a song kak esub, nlamalam rod-a kak mbehresi go ebo, á rod-a song kak ngbekobo.

26 Etingitingi, n kp-a tongo re, Owo a bahke woomo tete a gohro gal mbong nyi a bele no, jol ederi ajehng ajehng nehm sa.[‡]

Eltibi ni li bade erehbe

27 “Wahn ebwuk ana bo bungu re, ‘Ka jo lim erehbe!’

28 Wo, me n kp-n tongo re, Nne awohng awohng no l'yehke amahr enye kunu nnenkal re á noongo a ne, yeblim abiafem nya erehbe go ege eltim.[§]

29 Elmahr eboblum ena l'wahng re wo lim abiafem, luudu ro go! Ga nob re ejum ngubjing enya demme, sehng re bo rod ngubjing enya kpee, song kak go ellulagun.

30 Eboblum eba l'wahng re wo lim abiafem, kim tub go! Ga nob re ejum ngubjing enya tan, sehng re bo rod ngubjing enya kpee, song kak go ellulagun.

Eltibi ni li bade elbal amale

(Mat 19:9; Mak 10:11-12; Luk 16:18)

31 “Bo kpe bung re, ‘Nne awohng awohng no l'yehke nkal ewe elbal, nong á nyon nwer ka-e, nyi á m-e yehke elbal.’

32 Wo, me n kp-n tongo re, Nne awohng awohng no l'yehke nkal ewe elbal, eji nnenlum nondiki ki noongo a ne, á kp-e limi re á lim erehbe. Nne

[†] 5:25 5:25 Hib 3:13,15; 9:27 [‡] 5:26 5:26 Mat 18:34 [§] 5:28 5:28
2 Pit 2:14 * 5:30 5:30 Kol 3:5

awohng awohng no l'ko nnenkal no bo m-e yehke elbal, á kp'limi erehbe.†

Eltibi ni li bade enyam anyame

33 “Wahn ebtob wuk ana bo tongo ane ba jolo mahne mahne re, ‘Ka jo tir go edaange! Ka kane enyam bi a nyame no go esamahr bi Jehova!’

34 Wo, me n kp-n tongo re, wahn k'jo tir nkpel anyehng anyehng. Kana jo tir elbung! Tibre elbung, eti etul ji Esowo ji.

35 Kana jo tir ndi! Tibre ndi, etikunakpade eje ji. Kana jo tir Jeusalem! Tibre Jeusalem, ejahbe ji egburu ntul ji.

36 Ka jo tir esi eja! Tibre a nehm ma lim ellv esi anehng re, jol mbarebare, jol a nehm ma lim re, jol nnyakenyake.

37 “Nong, wahn jo faange re, ‘Ee,’ tohko jol ano, ‘E'ee.’ Ellum anehng anehng ni l'jol sehng e ano, lohng goji Ebinne jio.‡

Eltibi ni li bada nfem abongo

(Luk 6:29-30)

38 “Wahn ebwuk ana bo bungu re, ‘Nne no l'wa ntem elmahr, bo tob wa-e elmahr. Nne no l'bahk ntem elmahn, bo tob bahk-e elmahn.’

39 Wo, me n kp-n tongo re, Kana jo sahde ebi nne go eko!§ Nne l'rum-a elkpai go ekpoko eboblum, senng e ekpoko ebobkal ka-e, á kpe-a rum.

40 Nne no l'gbaame ewobo eja re á kp'koko, kpe yake nkud enya ka-e.*

† 5:32 5:32 1 Kor 7:10-11

‡ 5:37 5:37 2 Kor 1:17; Jems 5:12

§ 5:39 5:39 Mat 26:52-53

* 5:40 5:40 1 Kor 6:7

⁴¹ Nne no l'bob-a re, wo jen mmal anyehng a ne, jen mmal ebal a ne.

⁴² Nne no l'lem-a ejum, ka-e! Nne no l'ba re á ba yaame ejum go ega, ka-e!

*Ana nne, anebekv ebe bahke jo kor-e
(Luk 6:27-28,32-36)*

⁴³ “Wahn ebwuk ana bo tongo re, ‘Nne ebjing ewa bahke jo kor-a, nnekv ewa jo sab-a.’

⁴⁴ Wo, me n kp-n tongo re, Nong, anebekv ebahne jo kor-n. Jo biren nnoobo tv ane ba kp-n suku! Jo limen nnoobo ka ane ba kpo ko-n ekv!† Jo kaken ero ka ane ba kpo ka-n ebi mbol mbol, a ane ba kpo nohk-n,‡

⁴⁵ eji n l'jol abon ba Nso ejahne no li go ejahbetul.§ Tibre á kpo lim njul enye jo ya tub abi ane, a anoobo ane. Á kpo na elahb ka ane ba ma li eno, a ane ba ma li ebi.

⁴⁶ “Anv, ane ba n kpo kor bo, bo l'tob jo kor-n, eltuuru anii Esowo bahk-n tuuru? Anv, abakokatak kpehme lim anoa?

⁴⁷ N l'jo kak abonane ejahne nnyo ba ba, anv, nkpokosi ejum anyi nyi n ma lim? Anv, ane ba ki nyi Esowo kpehme lim anoa?

⁴⁸ Jolen saang, wahn k'bel elem ajehng ajehng, ana Nso ejahne no li go ero li saang.

6

Eltibi ni li bada nnoobo alimi

† 5:44 5:44 Rom 12:20-21 ‡ 5:44 5:44 Elt 7:60 § 5:45 5:45 Ef 5:1

¹ “Kunen ekpu, eji n l'k'jo lim nnoobo enyahne go esamahr ane, tohko jol ano, Nso ejahne no li go ero wahn nehm tuuru.

² Ngare anyehng anyehng nyi a l'lim nnoobo, ka jo tooro yanng, ana ane ba kpo tib elbo go ekp'kpa ero, fere jo jen alab nfam, eji ane l'jo tehk bo. N kp-n tongo re, Eltuuru ebo ebsehng mbang.

³ A l'lim nnoobo, nong, ebobkal eba k'kahn ji eboblum eba kp'limi,

⁴ eji nnoobo enya nyi a kp'limi l'k'jo jol gbul gbul gbuul. Nso no kpo nyehn nsol nyi ki li gbul gbul gbuul bahk-a tuuru.*

Eltibi ni li bade ero akake
(Luk 11:2-4)

⁵ “A l'kehme ero kak, ka jo lim ana ane ba kpo tib elfuumu elfuumu. Kpo kor bo re bo jo mehl yiimi go ekp'kpa ero, fere yiimi elatahkgur, jo kak ero, eji ane l'nyehn bo. Etingitingi, n kp-n tongo re, Eltuuru ebo ebsehng mbang.

⁶ A l'kehm kake ero, yel go ega nkimi. Eji a ma bam mbu tv elna, wo kehm kake ero ka Nso no ane l'ki-e ma nyehn. Nsoo no kpo nyehn nsol nyi ki li gbul gbul gbuul bahk-a tuuru.

⁷ “A l'kehm kake ero, ka jo lim ewok mbol mbol, ana ane ba ki nyi Esowo kpo lim. Ane bao ba kpo tir re, Esowo bahke wuku bo, tib eji bo kp'kake alaabe aro.

⁸ Kana jol ana bo! Tibre Nso ejahne kp'kahne nsol nyi n kp'sebe, jol n kehm-e bahbe.

⁹ Ana wo nobo re wahn jo kak ero re,

* 6:4 6:4 Mak 4:22; Luk 8:17

“Nso ejahre no li go ero, nong, mbing enya jol saang.

¹⁰ Yake etul eba ba.

Nong ntir enya,

afi jolo go ndi, afi jolo go ero.[†]

¹¹ Ka-r ejum alehke ji l'biingi a nahre lela.[‡]

¹² Jo tahm ka-r go egahre abiafem, ana wahr kpo tahm ka ane ba lim-r abiafem.[§]

¹³ Ka lim, e yel go elgaare.* Jo tahr-r yehke go abiafem.

¹⁴ “N l'tahm ka ane go bo ab'bi nya bo lim-n no, Nso ejahne no li go ero bahke tob tahm ka-n go egahne ab'bi.

¹⁵ N tohko tahm ka ane go bo ab'bi nya bo lim-n no, bahke limi renan, Nso ejahne kehm tob tahm ka-n?

Eltibi ni li bada njal abade

¹⁶ “N l'kehme elnahne njal bade, kana jo gehn asamahr, ana ane ba kpo tib elfuumu elfuumu kpo lim. Bo kpo gbod asamahr ebo, eji ane l'kahn re, bo kpi elbo njal bade. Etingitingi, n kp-n tongo re, Eltuuru ebo ebsehng mbang.[†]

¹⁷ A l'kehme elna njal bade, jo ru esamahr, wo fere jak esi,

¹⁸ eji ane l'k'kahn re, a kpi elna njal bade, sehngem Nso no ane kil-e elnyehne wo bahke kahne. Nso no kpo nyehn nsol nyi ki li gbul gbul gbuul bahk-a tuuru.

[†] **6:10 6:10** Mat 7:21; Luk 22:42 [‡] **6:11 6:11** Fil 4:6 **§ 6:12 6:12**

Mat 18:21-35 * **6:13 6:13** Jems 1:13 [†] **6:16 6:16** Luk 18:12

Afang nya li go ejahbetul

(Luk 12:33-34)

¹⁹ “Kana jo kpu nsol afang bum elnahne go njini nyia, edi ji bahke biili amahn, etan fere wo, awajv fere wa yel ba v.‡

²⁰ Ga nob re wahn kpu nsol afang bum elnahne go ejahbetul Esowo, edi ji l'k'tiki biili amahn, etan l'k'ma wo, awajv l'k'ma wa yel song v.§

²¹ Tibre eltim ena bahke tiki jol edi ji afang enya li no.*

Ellenng ni ngubjing

(Luk 11:34-36)

²² “Elmahr ni li ana et'rekahng ka ngubjing. Elmahr ena l'jol sange sange, ngubjing enya bahke bele ellenng.

²³ Elmahr ena l'jol ab'bi ab'bi, ngubjing enya bahke jolo ejanng ejanng. Ellenng ni wob-a go atahng l'fere kpiidi, jol ejanng, nkom ejanng nyi bahke jolo tete, jol nyi nse sang.

At'tiiri nya njini nyia

(Luk 16:13; 12:22-31)

²⁴ “Nnene limm, no bahke ma loko nde na ebal. Á bahke koko noko ekv, noko jo kor-e. Tohko jol ano, á bahke lake na awohng, fere jo daange noko. N nehm ma loko Esowo, fere jo loko akpohko.

²⁵ “Ana wo wahnge n kp-n tongo re, Kana jo tiiri bada nsol nyi m bahke jo li, fere jo w'wo, a nsol nyi m bahke jo kak go ngubjing.† Elkpin sang ga

‡ **6:19 6:19** Luk 12:16-21 § **6:20 6:20** Mat 19:21 * **6:21 6:21**
 Kol 3:1-3 † **6:25 6:25** 1 Pit 5:7

gbal sehngɛ nsol alehka? Ngubjing sang ga gbal sehngɛ aboma?

²⁶ Nyehnen nruk ana bo kp'fonngo go elbung yanne. Bo kpehme bahm nsol. Bo kpehme kpa. Bo kpehme sol, song lake go abuungu. Nso ejahne no li go ero wo kpo le bo. Anv, wahn sang ga gbal sehngɛ nruka?‡

²⁷ Nne awo ewahne no bahke kpe ma budu abon nnya go ege elkpín, eji á kp'tiiri ana?

²⁸ “Jen ji wahngɛ á kp'tiiri bada nsol ngubjing? Nyehnen ana at'tul nkpad kpo gbal go emahng. Bo kpehme nyenngɛ lim eltum. Bo kpehme jamme nsol kak elbo.

²⁹ N kp-n tongo re, Jol Solomon go ege ellub á liibem ana at'tul nyao.

³⁰ Ana Esowo kpo liibi ajele nya li go emahng, nya kpo kpín lela lela, behna bo jahm fi, jen ji wahngɛ á l'ki-n tob liibi, wahn ji kp'kahn taame ntiil?

³¹ “Owo fvfo nobo re wahn k'jo tiiri, fere jo bung re, ‘Ejum aji e bahke jo li, fere jo wo, fere jo kak go ngubjing?’

³² Nsol nyia nyi ane ba ki nyi Esowo kpo tiiri. Wo, wahn, Nso ejahne no li go ero kp'kahne re, nsol nyia kpee nobo re wahn bel.§

³³ Ga nob re wahn gbo mbang tiiri bade etul bi Esowo, ana m bahke lehke eno go ege esamahr. Á bahk-n budu nsol nyehko kpee.

³⁴ “Kana jo tiiri bade nya behna! Nong behna tiiri bade elne. Efung abehng abehng kpo bel

‡ 6:26 6:26 Mat 10:29-31 § 6:32 6:32 Hib 13:5

afemfem nyanye. Wahn, kana jo budu at'tiiri nya nyahne!

7

Kana jo lam ane bako

(Luk 6:37-38,41-42)

¹ “Kana jo lam ane bako, eji Esowo l'ki-n tob lam.*

² Tibre go mbang ny'nehm nyi n kpo lam ane bako, nyi nyi Esowo bahke tob ko lam-n. Ana n gaare no ka, ano wo Esowo bahke tob gare ka-n.

³ “Jen ji wahnge a kp'seenge mmolsahk no wob mmonanne go elmahr, a kil eltiiri bada nkporti nyi wob go ega elmahr?

⁴ A bahke sahbe renan, tong mmonanne re, ‘Nong, me n yehk-a mmolsahk no wob-a go elmahr,’ eji nkporti wob-a go elmahr?

⁵ Wobnob tane! Tohko gbo mbang yehke nkporti go ega elmahr, eji a l'mal nyehn, yehke mmolsahk no wob go elmahr mmonanne.†

⁶ “Kana jo ka ebv nsol Esowo nyi li eje eje, eji bo l'k'tahm kehm-n eljaake.‡ Kana jo rod amohkesol ro tv akuk, eji bo l'k'kadde go bo akpade.

Bahben, n bahke bele

(Luk 11:9-13)

⁷ “Bahben, n bahke bele. Seben, n bahke nyehne. Kahden, bo bahke lennge mbu ka-n.

⁸ Tibre nne awohng awong no l'bahb, á bahke bele. Nne no l'seb, á bahke nyehne. Nne no l'kahd, bo bahke lennge mbu ka-e.

* **7:1 7:1** Rom 2:1; 1 Kor 4:5 † **7:5 7:5** Gal 6:1-5 ‡ **7:6 7:6** Mat 10:14

⁹ “Nne awo ewahne no bahke kake mmon ewe eltal, á l'bahb-e re á ka-e nsol alehke?§

¹⁰ Afi á bahke rodo nnyo ka-e, á l'bahb-e re á ka-e nsahre?

¹¹ Wahn ji li na abi ane, n kp'kahne ana n kpo ka abon ebahne nsol nyi nno, l'lim renan, Nso ejahne no li go ero l'ki-n tob ka nsol nyi nno, n l'bahb-e?*

¹² “Nsol kpee nyi n kp'sebe re ane bako jo lim ka-n, nyi nyi m bahke tob jo lim ka bo. N l'lim ano, wahn ebbum atahm nya Esowo, a alum nya abanyehnamahr bungu no.†

Nfidifidi eti mbu

(Luk 13:24)

¹³ “Sehngen go nfidifidi eti mbu jio! Tibre mbang nyi li rehng go ellulagun, mbang elfohk elkul nyi, eti mbu eje kp'kpange. Ane gbalee ba kp'sehnge ona.

¹⁴ Wo, mbang nyi li rehng go elkpin, mbang asodaroongo nyi. Eti mbu eje li fi.‡ Ane ba kp'nyehne mbang nyio li ntiil.

Nnoobo eti, bo kpo liing-e go ege akab

(Luk 6:43-44)

¹⁵ “Jo gberen akimfahnge abanyehnamahr. Bo kpo ba go egahne, jo ba lim, are ejoro bi. Wo, go bo atahng bo li, are abibbib enyam bi.§

§ 7:9 7:9 Mak 11:24 * 7:11 7:11 Jems 4:3 † 7:12 7:12 Mat 22:37-40; Rom 13:8-10 ‡ 7:14 7:14 Mat 19:24; Elt 14:22 § 7:15 7:15 Elt 20:29

¹⁶ Go bo akab wo, ń bahke bo liingi. Any, asokonso, nne kpo j'je song bong akab avaina? Agasame, nne kpo je song bong akab afiga?*

¹⁷ “Eti ji nno ajehng ajehng kpo kab anoobo akab. Esabsab eti kpo kab abi akab.

¹⁸ Eti ji nno nehm ma kab abi akab. Esabsab eti nehm ma kab anoobo akab.

¹⁹ Eti ajehng ajehng ji tohko kab anoobo akab, bo bahke gbahke kak agun.†

²⁰ Go bo akab wo fvfo, ń bahke bo liingi.

Wahn n nehme kahn

(Luk 13:25-27)

²¹ “Nne awohng awohng sang no kpo lung-m re, ‘Ntul, Ntul!’ bahke yele go ejahbetul Esowo, sehngem ye ji kp'limi ji Nsoo no li go ero tong-e no re á lim bahke yele.‡

²² Efung bio ane gbalee bahk-m bahbe re, ‘Ntul, wahr sang jo nyehn amahr go ega mbinga, fere jo kam abi atohko yehke go ega mbinga, jo lim akpokosi gbalee go ega mbinga?’§

²³ Owo m bahke kehm tongo bo re, ‘Me, wahn n nehme kahn.* Fak-m wahn go esamahr, wahn aneb ab'bi ba!’

Ana ane abal si ntahk

(Luk 6:47-49)

²⁴ “Fvfo, nne awohng awohng no l'wuk alum enyame, fere jo lim, á li ana ekahnkahn nne no si etahk eje kunu go ekpartal.†

* **7:16 7:16** Gal 5:19-23; Jems 3:12 † **7:19 7:19** Jon 15:2,6 ‡ **7:21 7:21** Rom 2:13; Jems 1:22 § **7:22 7:22** 1 Kor 13:1-2 * **7:23 7:23** Mat 25:12 † **7:24 7:24** 1 Kor 10:4

25 Elahb kehm ba na, nnyel kehm yele, kuumu agbunggbung, rehng etahk jio, nfeb kehm kehme ellimi, jo gbul etahk jio. Tikem gbo. Tibre á si kunu go ekpartal.

26 “Nne awohng awohng no l'wuk alum enyame, k'lim, á li ana egboolo nne ji si etahk eje kunu go erikehndi.

27 Elahb kehm ba na, nnyel kehm yele, kuumu agbunggbung, rehng etahk jio, nfeb kehm kehme ellimi, jo gbul etahk jio.† Etahk jio kehm gboko, wa r'rere r'rere.”

Nsahm nyi Jisos

28 Eji Jisos ma bung nsol nyia mal, eltibi ene kehm kpoko ellong ane bao esi.

29 Á jo tibi bo ana nne no kpi nsahm. Á joom tib ana at'tibi ebo ba atahm.

8

Ana Jisos limi nne abili, á nob

(Mak 1:40-45; Luk 5:12-16)

1 Jisos kehm badde go ewong jio, ellong ane gbalee tahm toon-e.

2 Nne abili kehm lohngo ba go ege, kehm ba jamm-e alahng, kehm bungu re, “Nsoo, l'kor-a, a li-m ma lim, n nob.”

3 Jisos kehm tanne ebo ebe, koor-e, kehm bungu re, “Kor-m kor, wobnob!” Tvtv ona á kehm soro nob abili enye.

4 Owo Jisos kehm-e tongo re, “Ka tiki tong nne awohng awohng, wobwuka? Song goji nlimajom,

† 7:27 7:27 Ell 18:10

wo song tib-e elna, fere lim njom nyi Moses tibi no, eji l'jol ejum ntianse ka ane."

Ana Jisos limi nlokeltum awohng, á nob go Kapenium

(Luk 7:1-10)

⁵ Eji Jisos rehngre go Kapenium, ntubesi a nsoja no Rom kehm bake, ba kpir-e, kehm-e gboongo

⁶ re, "Nsoo, nlokeltum ewame noa go etahk, kp'yame g'ga, jol á nehme ma jen."

⁷ Jisos kehm-e tongo re, "M bahke bake ba lim-e, á nob."

⁸ Owo ntubesi a nsoja noo kehm-e faange re, "Nsoo, me n fuumem re wo ba yel go egame ekp'kpa. Lub bung na bung ellum, nlokeltum ewame bahke nobo.

⁹ Tibre me n li nne no wob nne go elwo. N tob kpi nsoja nyi wob-m go elwo. N l'tong noo re, 'Song!' á tahm. N l'tong noka re, 'Ba!' á ba. N l'tong nlokeltum ewame re, 'Lim jia!' á lim na lim."

¹⁰ Eji Jisos wuku ano, kehm-e kpoko esi. Á kehm tongo ane ba jo toon-e re, "Etingitingi, n kp-n tongo re, elkohn eltaame ana nia n ka nyehn a nyehn go Israel.*

¹¹ N kp-n tongo re, Ane gbalee bahke lohngo go ero nfam, a erede nfam ba ji a Ebrahim, a Aisik, go Jakob go ejahbetul Esowo, jo li nsol a bo.†

¹² Wo, abon ntul ba jol lehke etul, bo bahke rodo bo, ro kak edi ji nkom ejanngre li no. Owo ane bahke jo ling, fere jo kono amahn."

* **8:10 8:10** Mat 15:28 † **8:11 8:11** Luk 13:28-29

¹³ Owo Jisos kehm tongo ntubesi a nsoja noo re, “Song kehng! Ana a ma taame, ano wo bahke jolo ka-a.”[‡] Ngare ny'nehm ona nyi nlokeltum ewe nobo eyam ebe.

Ana Jisos limi aneb ayam gbalee, bo nob
(Mak 1:29-34; Luk 4:38-41)

¹⁴ Jisos song rehng kan etahk Pita, á kehm song nyehn nyehn nkal a Pita nong kp'yame arumbum.§

¹⁵ Á kehm-e kooro go ebo, á kehm soro nob arumbum nyao, kehm soro tahm, kehm-e kehme elloko.

¹⁶ Eji elgung ba no, ane kehm koko ane gbalee ba bele abi atohko, ba go ege. Á kehm kame bo abi atohko nyao kpee yehke go ege ellum, fere lim aneb ayam kpee, bo nob,

¹⁷ eji l'lohko jol ana Esowo bungu sehng goji nnyehnamahr Aisaya re,
“Á rodo elleenge enahre,
fere sol ayam enyahre.”

Nong, akvne kpa akvne kak
(Luk 9:57-62)

¹⁸ Eji Jisos nyehne ellong ane gbalee ba ma ba yiimi senng-e kak, á kehm tongo abat'toono ebe re, “Wahr tahmen egbuk jehko!”

¹⁹ Owo nt'tibi atahm awohng kehm bake go ege, ba tong-e re, “Nt'tibi, m bahk-a toono rehng edi ajehng ajehng ji a fi no.”

²⁰ Jisos kehm-e faange re, “Akpangang kpi abing nya bo kpo woomo. Nruk kpi ntahk nyi bo kpo

[‡] 8:13 8:13 Mat 9:29 § 8:14 8:14 1 Kor 9:5

kang. Wo, Mmon no nne, edi ellohko esi ajehng ajehng á kpimm.”*

²¹ Nne noko no jolo nt'toono Jisos kehm-e tongo re, “Nsoo, nong, me n tohko song kpa nsoo kak.”†

²² Owo Jisos kehm-e faange re, “Tahm toon-m, nong, akvne kpa atem akvne kak!”‡

Ana Jisos bungu tong nfeb, a ebuku

(Mak 4:35-41; Luk 8:22-25)

²³ Jisos kehm yele go egbang, abat'toono ebe tahm toon-e.

²⁴ Owo egburu nfeb nyi nnen a nnen kehm ba kehme ellimi go eto jio, ebuku jo lim, bulu egbang. Ngare nyio Jisos jo l'lal.

²⁵ Abat'toono ebe kehm jeke go ege, song nyahm-e, kehm-e tongo re, “Nsoo, tahr-r, e kp'tane na a!”

²⁶ Jisos kehm faange bo re, “Jen ji wahnge á kp'fahle ana, wahn ji kp'kahn taame ntiil?”§ Owo á kehm mehle yiimi, kehm nyame nfeb, a ebuku. Edi kehm naange soom.

²⁷ Owo kehm kpoko ane bao esi. Bo kehm bungu re, “Elkohn nne awo anae, no kpo bung tong nfeb, a ebuku, bo wuk-e?”

Ana Jisos limi ane abal ba bele abi atohko, bo nob

(Mak 5:1-20; Luk 8:26-39)

²⁸ Jisos kehm bake go Gadara ji jolo go egbuk eto jehko. Owo ane abal kehm lohngo edi ji alahm akvne jolo no, ba wan-e. Bo bele abi atohko go

* **8:20 8:20** 2 Kor 8:9 † **8:21 8:21** Mat 10:37 ‡ **8:22 8:22** Ef 2:1; 5:14; Kol 2:13 § **8:26 8:26** Mat 14:31; 16:8

bo atahng. Bo jo mennge sehng. Jol nne awohng awohng joom sahb, sehng mbang nyio.

²⁹ Owo bo kehm biingi tiim re, “Anv, Mmon no Esowo, jen ji e kpi no me atemtem? Anv, a ba na re wo ba kak-r erema, eji ngare kala biinga?”*

³⁰ Ellong akuk jolo ona kpidi kpidi, jo li nsol.

³¹ Abi atohko kehm gboongo Jisos re, “A l'kehm-r kame yake, nong, wahr song yel akuk nyao go atahng.”

³² Owo Jisos kehm tongo bo re, “Songen!” Bo kehm soro lohng, song yel akuk nyao go atahng. Ellong akuk nio kehm soro rehm abahl, song fooro agbunggbung eto jio, yel go alahb tan.

³³ Ane ba jo baabe akuk nyao, kehm soro be ebo tahm, song rehng go nla ejahbe, song tooro kpee, fere tooro ejum ji ma lim ane ba bele abi atohko.

³⁴ Ejahbe jio kpee kehm tahme, song kpiri Jisos. Eji bo song nyehn-e, bo kehm-e gboongo re, á lub tahm ejahbe jio song.†

9

*Ana Jisos limi nne no ki jo ma jen, á nob
(Mak 2:1-12; Luk 5:17-26)*

¹ Jisos kehm yele go egbang, siiri eto jio, song rehng go ege ejahbe.*

² Ane bandiki kehm koko mbanne nyi noongo go edilnong ba a ne go ege. Eji Jisos nyehne eltaame ebo, á kehm tongo mbanne nyio re, “Mmon ewame, bob eltim! Abiafem enya, me n tahm ka-a.”

* 8:29 8:29 2 Pit 2:4 † 8:34 8:34 Jon 4:40 * 9:1 9:1 Mat 4:13

³ Owo at'tibi ba atahm bandiki kehm kehme elbungu atemtem re, "Nne noa kp'suku Esowo, eji á ma rod elne bum ana Esowo."

⁴ Jisos k'kahn ntir atahng ebo, owo á kehm bungu re, "Jen ji wahnge n kp'tiri elkohn abi nsol ana nyao go egahna ntim?†

⁵ Anv, jen ji ga riidi, n l'tong-e re, 'Abiafem enya me n tahm ka-a,' afi n l'tong-e re, 'Tahm, wo jen!'

⁶ M bahk-n tibi re, Mmon no nne kpi nsahm go njini nyia nyi á bahke ma tahm ka nne go ege abiafem."‡

Owo á kehm tongo mbanne nyio re, "Mehl, wo rod edilnong eja, song kehnge!"

⁷ Nne noo kehm mehle yiimi, tahm eje kehnge.

⁸ Eji ane bao nyehne ano, bo kehm kehme elfahle, fere jo tehk Esowo bi ma ka ane elkohn nsahm ana nyio.

Ana Jisos lungu Matiu

(Mak 2:13-17; Luk 5:27-32)

⁹ Jisos kehm tahme edi jio. Eji á jo sehng asongo, á kehm nyehne nne no jehk go ege a nji atak, no bo jo lung-e re Matiu. Owo á kehm-e tongo re, "Tahm toon-m!"

Matiu kehm soro tahm toon-e.

¹⁰ Efung abehng eji Jisos jolo go etahk Matiu, jo li nsol, abakokatak gbalee, a aneb ab'bi jolo a ne o, go abat'toono ebe fvfo, tob jo li nsol.

¹¹ Egom Farisi jindiki nyehne kan ano, bo kehm tongo abat'toono ebe re, "Jen ji wahnge nt'tibi ewahne kpo li nsol edi ajehng a abakokatak, go aneb ab'bi?"§

† 9:4 9:4 Jon 2:25 ‡ 9:6 9:6 Mat 1:21 § 9:11 9:11 Luk 15:2

12 Jisos kehm wuku ana bo jo bung, kehm faange re, “Ane ba li nob nob kpehme seb nlimakahm, sehngem ane ba kp'yame ba ba kpo seb nlimakahm.

13 Songen, wahn song kpili bade ana edi nwer Esowo jia lohngo no, ji bungu re, ‘Njom sang n kp'sebe, ndon nyi.’ M baam re me m ba lung anoobo ane, m ba re me m ba lung aneb ab'bi re bo gbo ndon.”*

*Mbahbe nyi li bada njal abade
(Mak 2:18-20; Luk 5:33-35)*

14 Abat'toono Jon ji nwohngalahb kehm bake goji Jisos, ba bahb-e re, “Jen ji wahnge wahr, a Bab Farisi, e kpo kono elnahre njal bade, abat'toono eba kil jo bade?”†

15 Owo Jisos kehm faange bo re, “Anv, atem nlumanne li ma ji ndon ndon go elkak elbala, eji nlumanne kpeke li a boa?‡ Efung bahke rehng bi bo bahke rodo nlumanne go bo ellong, tahm a ne. Ngare nyio nyi, bo bahke kehme elbo njal bade.

*Eltibi ni mahne mahne l'li, eltibi ni Jisos l'li
(Mak 2:21-22; Luk 5:36-39)*

16 “Nnene limm, no bahke koko mmojang mbomo no nfenfe, song baade nk'kula mbomo. Á l'lim ano, mmojang mbomo no nfenfe nehm yiimi. Nk'kula mbomo mio bahke kpe kv edi jio budu sehng ana wuku wuku.§

* 9:13 9:13 Mat 18:11 † 9:14 9:14 Luk 18:12 ‡ 9:15 9:15 Jon 3:29 § 9:16 9:16 Jon 1:17

¹⁷ Nnene limm, no bahke yaange amahm ma kp'fahle kak go nk'kohko eyahbe. Á l'lim ano, eyahbe jio bahke bahnge na, amahm sale. Nobo re nne ko amahm ma kp'fahle, song yaange kak go eyahbe nfenfe.* Eyahbe nfenfe jio, a amahm bahke jolo nob nob.”

Mmon a ntubesi, a nnenkal no kooro Jisos go ege a nsubu

(Mak 5:21-43; Luk 8:40-56)

¹⁸ Eji Jisos jo bung nsol nyia tong bo, owo ntubesi a Jus awohng kehm lohngo ba, ba jamm-e alahng, kehm bungu re, “Mmon ewame kp'na kpoko. Ba wahr tahm, wo ba koor-e ebo, eji á l'fere bel elkpin.”

¹⁹ Jisos kehm tahme toon-e, a abat'toono ebe fvfo.

²⁰ Mmonankal awohng no alung sa-e go nnahb ewubu a nnya ebal, kehm kehme Jisos toono go njahm, kehm kooro es'sili nsubu enye.

²¹ Tibre á bungu go ege eltim re, “N l'lub kooro nsubu enye nyi nyi, m bahke nobo.”†

²² Jisos kehm keebe, nyehn-e, kehm-e tongo re, “Mmon ewame, bob eltim! Eltaame ena ni ma-a lim, a ma nob.” Ngare ny'nehm ona nyi nnenkal noo kehm soro nob.

²³ Owo Jisos kehm ba rehng go etahk ntubesi noo, ba nyehn aneb ase, a ane ba ba elkv, bo kp'kubu ase, jo lim ewok.

²⁴ Á kehm tongo bo re, “Tahmen, tibre mmon noa ka kpo, á kp'lale na.”

Owo bo kehm-e elwolo.

* **9:17 9:17** Rom 7:6 † **9:21 9:21** Mat 14:36

²⁵ Bo kame kan ane bao yehke me, Jisos kehm yele eksp'kpa song jabbe mmonse nkal noo go ebo, á kehm mehle ji.‡

²⁶ Eka jio kehm yeere na yeere ejahbe jio kpee.

Ana Jisos limi awakamahr; ane abal, bo nyehn

²⁷ Jisos kehm tahme edi jio, jo jen asongo. Awakamahr ane abal kehm-e kehme eltoono, fere jo rabe re, “Mmon no Devid, nong, wahr lub fil-a ndon!”

²⁸ Eji Jisos yele go eksp'kpa, awakamahr ane bao kehm ba kpir-e. Owo Jisos kehm bahbe bo re, “Anv, n kp'taame re m bahke ma lim ejum ana jiaa?”

Owo bo kehm taame re, “Ee nsoo.”

²⁹ Jisos kehm kooro bo go amahr, kehm bungu re, “Nong, jol ana n ma taame.”§

³⁰ Amahr ebo kehm soro lennge.

Jisos kehm bungu a bo t'tahne re, “Kana tiki tong nnene!”

³¹ Bo kehm tahme, song tooro tong ejahbe jio kpee ji Jisos ma lim.

Ana Jisos limi nkamme, á bung

³² Eji ane bao kp'tahme asongo, ane bako kehm koko nkamme ba a ne go ege, nyi bele ebi etohko go ege atahng.

³³ Jisos kehm kame nne noo ebi etohko jio yehke, nne noo soro kehme elbungu.

Ane bao kehm kpoko bo esi. Bo kehm kehme elbungu re, “Elkohn ejum ana jia, e ka nyehn a nyehn go Israel.”

‡ 9:25 9:25 Luk 7:15; Jon 11:44 § 9:29 9:29 Ell 3:17-18

34 Bab Farisi kehm bungu re, “Ntul a nnehm wo ka-e nsahm re á jo kam ane abi atohko yehke.”*

Ana ane fili Jisos ndon

35 Jisos kehm tahme, jo yanngé ajahbe nya nnehm, a nya nse kpee. Á jo tibi ane go bo ntahk ero, fere jo tiingi bo nnoobo etib bi etul bi Esowo, fere jo lim ane, bo jo nob elkohn eyam abehng abehng.

36 Eji á nyehne ellong ane, bo kehm-e fili ndon. Tibre eko ebtan bo, nkakebo bo kpimm, bo jolo ana ejoro bi ki kpi mb'baabe.†

37 Owo á kehm tongo abat'toono ebe re, “Egburu egbe jia, ji elkpake, wo, abalimeltum li ntiil.‡

38 Gboongen nfono egbe, eji á l'tum abalimeltum tv re bo ba kpa egbe eje.”

10

*Abat'toono ebe, ewubu ane abal
(Mak 3:13-19; Luk 6:12-16)*

1 Jisos kehm lungu abat'toono ebe, ewubu ane abal tv elne, kehm kake bo nsahm re bo kam ane abi atohko yehke, fere lim ane, bo nob elkohn eyam abehng abehng.

2 Abing abatiingetib ewubu ane abal nya a. Ngbokambang, Saimon ji bo jo lung-e re Pita, go Andru mmonannyehn, go Jems ji mmon a Sibidi, a Jon ji mmonannyehn Jems,

3 go Filip, Batolomi, Tomos, go Matiu nkokatak, Jems ji mmon Alfeus, a Lebeus ji bo jo lung-e re Tadeus,

* 9:34 9:34 Mat 12:24 † 9:36 9:36 Mak 6:34 ‡ 9:37 9:37 Luk 10:2

⁴ a Saimon ji jo seb re ejahbe eje lohng go elwo ni aneb Rom, go Judas Iskariot ji gungu Jisos.

Eltum ni abat'toono Jisos song lim

(Mak 6:7-13; Luk 9:1-6)

⁵ Re Jisos kehm tumu ewubu ane abal bao, á tubu bo elle re, “Kana je ajahbe nya ane ba ki li Jus, a ajahbe Samaria.

⁶ Songen goji ejoro bi Israel bi ma tan.*

⁷ Song bungen alum Esowo re, ‘Etul bi Esowo ebkabbe.’

⁸ Limen aneb ayam, bo nob, wahn lim aneb abili, bo nob, fere nyahme akvne go elkv, fere kam ane abi atohko yehke.

“Ana n ka-n mbol mbol, tob kaan go mbol mbol.†

⁹ Kana fili agul, a asilva, jol kana kak apene go egahne abam fili.

¹⁰ Kana fili abam efilibo, fere fili mbomo ebal ebal, a akpaketa, a nti efilibo. Tibre nlimeltum f'fuumu re á bel nsol alehke.‡

¹¹ “Ejahbe ajehng ajehng ji n l'song rehng, afi jolo egburu ejahbe, afi jolo mmojahbe no nse, seben nne no bahke kahne re, eltum enahne ni nno ni. Kangen a ne o tete wahn tahm ejahbe jio.

¹² N l'yange go etahk nne, kaken bo nnyo.

¹³ Ane bao l'vvr-n, nong, elkoono ni n kpi no jol a bo. Bo tohko fere vvr-n, elkoono ni n kpi no bahke feere, ba tob-n.

¹⁴ Nne awohng awohng no tohk-n vvrv, k'wuungu atung go egahne alum, afi fere jolo

* **10:6 10:6** Mat 15:24; Elt 13:46 † **10:8 10:8** Elt 20:33; 1 Pit 5:2

‡ **10:10 10:10** Luk 22:35; 1 Kor 9:4-15

ejahbe, tahmen edi jio, wahn kum ebtohko go egahne akpade.§

¹⁵ Etingitingi, n kp-n tongo re, Go efung elam, elam ji ejahbe jio bahke bibi sehng ji Sodom, a Gomorra.*

Ebnohko bi kp'bake

(Mak 13:9-13; Luk 12:11-12)

¹⁶ “Anv, n kp-n tumu ana ejoro tv go ellong abi enyam. Jo bangen ana enyo, wahn fere jol ana mbehl nyi kil jo lim ebi ejum ajehng ajehng.†

¹⁷ Jo gberen! Tibre ane bahk-n jo kak go esub, fere jo dv-n go bo a ntahk ero.

¹⁸ “Bo bahke jo ko-n, song yiimi go esamahr atubesi, a atul tib go egame esi. Nsol nyia nyi bahk-n jo lim, eji n l'jo yiim-m ntianse go bo esamahr, a esamahr ane bako ba ki nyi Esowo.‡

¹⁹ Bo l'kak-n go esub, kana jo tiiri bada nsol nyi m bahke bungu, jol ana m bahke b'bung. Tibre ngare nyio bo bahk-n kake alum nya m bahke bungu.

²⁰ Tibre alum nya m bahke bungu, nyanyahne sang, bahke lohngo goji Etohko ji Nso ejahne ji kp'bungu go egahne atahng.§

²¹ “Abonanyehn nne bahke jo yake abonanyehn ka re bo wul. Babnde nne bahke tob jo yake abon ebo ka re bo wul. Abon bahke jo kpiidi kuumu babnde, jo jabbe bo ka, bo wul.

§ 10:14 10:14 Elt 13:51 * 10:15 10:15 Mat 11:24 † 10:16 10:16
Rom 16:19 ‡ 10:18 10:18 Elt 25:23; 27:24 § 10:20 10:20 Elt 4:8,13

22 Nne awohng awohng bahke jo ko-n ekv tib go egama mbing. Nne no l'kpumu tete rehng go es'kohro, ye wo bahke bele eltahre.

23 “Bo l'nohk-n go ejahbe jehko, been, song ejahbe jehko. Tibre etingitingi, n kp-n tongo re, N nehm ma tiki lim eltum go ajahbe Israel kpee mal, tete Mmon no nne feere ba.

24 “Nne no kp'kpili kpehme gbal sehng nt'tibi ewe. Nlokeltum kpehme gbal sehng nde.*

25 Nobo re nne no kp'kpili tob taame go eye-batahng jol ana nt'tibi ewe. Nobo re nlokeltum taame, jol ana nde. Nfontahk, bo l'lung-e re ntul a nnehm, bahke limi renan, bo k'tob lung ane ebe ano?†

Nne awo fuumu re nne fahl-e?

(Luk 12:2-7)

26 “Kana jo fahl ane! Ejum ajehng ajehng limm, ji bo bulu no, ji Esowo l'k'lenng. Ejum ajehng ajehng limm, ji bo behre no, ji ane l'k'kahn.‡

27 Ejum ji n kp-n tongo a mbehr mbehr, m bahke bungu gbul gbul gbuul. Ji m bungu go aw'wa tong-n, m bahke bungu go elkab ane.

28 “Kana jo fahl ane ba kpo wul ngubjing, ba l'k'ma wul etohko. Fahlen ye jio ji bahke ma ranng etohko, a ngubjing go ellulagun.§

29 Nne li ma gunu nruk ebal go are, ka mpene. Abehng abehng limm, bi bahke gboko go ndi, sehngem re no, Nso ejahne taame na.

30 Wahn, alv enyahne kpee nya li go egahne asi, bobfange.

* 10:24 10:24 Luk 6:40 † 10:25 10:25 Jon 15:20 ‡ 10:26 10:26 Rom 2:16 § 10:28 10:28 Jems 4:12

³¹ Kana kpe fahl! Wahn ba ga lub sehng nruk gbalee.

*Ana nne bahke jo yiimi ntianse ka Jisos
(Luk 12:8-9)*

³² “Fvfo, nne awohng awohng no l'yiimi ntianse ka-m go esamahr ane, ye wo fvfo, m bahke tob yiimi ntianse ka-e go esamahr bi Nsoo no li go ejahbetul.

³³ Nne awohng awohng no l'ten-m go esamahr ane, ye wo fvfo, m bahk-e tob ten go esamahr bi Nsoo no li go ejahbetul.

*Elkoono sang, ekahngkahng bi
(Luk 12:51-53; 14:26-27)*

³⁴ “Kana tir re, n ko elkoono ba a ni go njini nyia.* M baam re me n ko elkoono ba a ni, m ba re me n ko ekahngkahng ba a bi.†

³⁵ M ba re ‘mmon fere kpiidi kuumu nde, mmon no nkal kpiidi kuumu nnyehn, nkal a nne kpiidi kuumu nnyehn nlum.

³⁶ Nne, ane ebe ba bahke fere jol anebekv ebe.’

³⁷ Nne no nde, afi jolo nnyehn, bo l'kor-e sehng me, á fuumem a name. Nne no abon ebe l'kor-e sehng me, á fuumem a name.‡

³⁸ Nne awohng awohng no tohko rod ekros eje, tahm toon-m, á fuumem a name.

³⁹ Nne no l'gare re á tahre elkpín ene, á bahke tane na elkpín ene. Nne no l'tane elkpín ene tib go egame esi, á bahke tahre na elkpín ene.§

* **10:34 10:34** Jon 14:27 † **10:34 10:34** Hib 4:12 ‡ **10:37 10:37**
Luk 14:26 § **10:39 10:39** Jon 12:25

Eltuuru
(Mak 9:41)

⁴⁰ “Nne no l'vvr-n, á vvrv me. Nne no l'vvr-m, á tob vvrv nne no tum-m no.

⁴¹ Nne no l'vvrv nnyehnamahr, tib eji á kahne re nnyehnamahr Esowo wo, á bahke bele eltuuru ana ni nnyehnamahr kpo bel. Nne no l'vvrv etingitingi nne tib á li go etingitingi, á bahke bele eltuuru ana ni etingitingi nne kpo bel.

⁴² Nne awohng awohng no l'ka nne awohng go ellong abonse baa abon alahb re á wo, tib eji á kp'kahne re, nt'toono ewame wo, á bahke bele eltuuru go etingitingi.”*

11

Ane ba Jon ji nwohngalahb tumu no
(Luk 7:18-35)

¹ Eji Jisos tubu abat'toono ebe, ewubu ane abal, elle mal, á kehm tahme edi jio, song rehng go ajahbe Jus, jo bung alum Esowo, fere jo tib ane.

² Eji Jon ji nwohngalahb ji woomo go ngbekobo wuku bada nsol nyi Kraist kp'limi, á kehm yehke abat'toono ebe tum tv-e.

³ Bo kehm song bahb-e re, “Wo wo li nne no Jon tongo re á kp'baka, afi wahr ji sik nne nondiki?”

⁴ Owo Jisos kehm faange bo re, “Feeren song goji Jon, wahn song tong-e bada nsol nyi n kp'nyehne a, fere kp'wuku,

⁵ ana awakamahr kp'nyehne, abanne kp'tahme jen, aneb abili kp'nobo, alakatung kp'wuku, akvne kp'nyahme go elkv, akpak, bo kp'tiingi bo nnoobo etib.

* **10:42 10:42** Mat 25:40

⁶ Eyebatahng li ka nne no l'ki-m sel gbo.”

⁷ Eji abat'toono Jon ma feere fi, Jisos kehm bahbe ellong ane bao bada Jon re, “Elka emahng, eji n̄ jo je goji Jon, n̄ jo je re wahn song nyehn jen? Eljele ni nfeb kp'limi kp'neenga?

⁸ Anv, ejum aji n̄ jo j'je re wahn song nyehn abee? Nne no ma liibi nsol nyi nno a nnoa? Ane ba kpo liibi ano kpo jol go ntahk nyi atul.

⁹ Anv, ejum aji n̄ jo j'je o, jo song nyehn? Nnyehnamahr woa? N kp-n tongo re, Wahn ebnyehn nne no gbale sehng nnyehnamahr.*

¹⁰ Tibre Jon wo li nne no bo nyono go nwer Esowo bada ne re, ‘M bahke tumu ntiingetib ewame, á gbo-a mbang, song tuungu mbang bum-a.’

¹¹ “Etingitingi, n kp-n tongo re, nnene limm, no ma j'jol go njini nyia no gbale sehng Jon ji nwohngalahb. Nne no ga rede go ellong ane ba bahke lehke etul bi Esowo, á gbale sehng Jon.†

¹² Bomo ngare nyi Jon ji nwohngalahb tete rehng anv, etul bi Esowo li go elkake nsahm kehm kuumu, aneb nsahm bahke kuumu go eko akake.‡

¹³ Atahm nya Moses, a abanyehnamahr Esowo kpee tete ba rehng ngare nyi Jon bungu bade etul bia.

¹⁴ L'kor-n taamen tv alum nyaa, nya li re, Jon wo li Elaija, ji bo bungu re á kp'bake.§

¹⁵ Nne no kpi atung, nong, á wuk.

¹⁶ “Anv, m bahke koko ane ba li anv gara jen? Bo li ana abonse ba ma lohng elatahkgur kpi

* **11:9 11:9** Luk 1:76 † **11:11 11:11** Hib 3:5-6; Mat 13:17 ‡ **11:12 11:12** Luk 16:16; Mak 7:26-30; Luk 18:5 § **11:14 11:14** Mat 17:10-13

mbene lim. Egom jindiki tong egom jehko re,

¹⁷ “Wahr ebwor afiri ka-n,

ín bahnem.

Wahr ebling aling,

wahn tobem ling fvfo.’

¹⁸ “Eji Jon ba no, á jo kono elne njal bade, amahm á joom wo. Ane re, á kpi ebi etohko go ege atahng.

¹⁹ Eji Mmon no nne ba no, á jo li nsol, fere jo w'wo, ane jo bungu re, ‘Nyehten nlehke ebno noa, no kpo wo amahm, á li ntem no abakokatak, a aneb ab'bi!’ Nne l'kpur nsol nyi aneb elkahne kpo lim, owo á bahke tob kahn ana elkahne li no.”

Ajahbe nya ki taame

(Luk 10:13-15)

²⁰ Jisos kehm kehme ajahbe nya á ma ga lim akpokosi gbalee ebi ka, tibre bo ka gbo ndon.

²¹ “Eyu a nahne, aneb Korasin! Eyu a nahne, aneb Betsaida! Li re Taya, a Saidon nyehne agburu akpokosi ana nya wahn ma nyehn a, kehn bo jol gboko ndon wuku wuku, fere kak ajakensol, kpu atong, kak esi.*

²² Wo, n kp-n tongo re, Efung elam bio, elam nehm ga bib a bo ana bahke bibi a nahne.

²³ “Wahn aneb Kapenium, bo ma-n mehl wahre rehng go ejahbetul Esowo.† Bo bahke fere rod-n, ro kak go ellulagun. Li re aneb Sodom nyehne agburu akpokosi ana nya ín ma nyehn a, kehn bo baa, kpeke li tete sik anv.‡

* **11:21 11:21** Mak 8:22-25 † **11:23 11:23** Mat 4:13; 8:5-17

‡ **11:23 11:23** Mat 10:15

24 Owo n kp-n tongo re, Efung elam bio, elam nehm ga bib a Sodom ana bahke bibi a nahne.”§

*Baan go egame, wahn ba bel erekekv
(Luk 10:21-22)*

25 Ngare nyio Jisos kehm bungu re, “Nsoo, wo wo li Ntul go ero, a ndi. N kp-a tehke, tib eji a ma lennge abonbili nsol nyia nyi a behre re akahnkahn ane, a anebkul k'nyehn.*

26 Tibre kor-a na re wo lim ano, Nsoo.

27 “Nsoo ebyake ejum ajehng ajehng kak go egame abo.† Nnene limm, no kp'kahne Mmon, sehngem Nde ntahngtahng wo kp-e kahne. Nnene limm, no kp'kahne Nde, sehngem Mmon ntahngtahng wo kp-e kahne, a nne awohng awohng no Mmon kp'sebe re á lennge Nde tib-e.

28 “Baan go egame, wahn ane kpee ba ma lahng go elsolo nsol nyi kp'lubu. M bahk-n kake erekekv.‡

29 Taamen, wahn woom-m go elwo, fere jo kpili go egame. Tibre me n li soom, fere jol reed. Owo atohko enyahne bahke bele erekekv.

30 Tibre eltum ename riidem. Elsol ename ni m bahk-n sehke kp'yaare.”§

12

*Mbahbe nyi li bade efung Esabat
(Mak 2:23-28; Luk 6:1-5)*

§ 11:24 11:24 Luk 12:48 * 11:25 11:25 1 Kor 1:26-29; 2 Kor 4:3

† 11:27 11:27 Mat 28:18 ‡ 11:28 11:28 Hib 4:10-11 § 11:30 11:30 1 Jon 5:3

¹ Ngare nyio eji Jisos jo jen go mbang egbe efung Esabat, abat'toono ebe njal y'yam bo. Bo kehm kehme amohk nkohl monngo tv go arahn, jo li.

² Eji Bab Farisi nyehne ano, bo kehm tongo Jisos re, "Nyehn ana abat'toono eba kp'limi ejum ji ki fuumu re nne lim efung Esabat!"

³ Jisos kehm faange bo re, "N ka lung a lung bade ana Devid njal yam-e no, a ane ebea?"

⁴ Á song yele ekp'kpa Esowo, song li abred nya bo limi no bum go ekp'kpa Esowo jio, nya ki tohko f'fuumu re á li, a ane ebe, sehngem abalimajom ba ba fuumu re bo jo li.

⁵ N ka lung a lung go atahm nya Moses re, efung Esabat abehng abehng abalimajom ba kpo lim eltum go etahk Esowo kpo s'soodo ntahm nyi Esabat, jol ntahm nyio bo joom gbo.

⁶ "N kp-n tongo re, Ejum jia, ji gbale sehng etahk Esowo.*

⁷ Li re n kp'kahne ana edi nwer Esowo jia lohngo no, ji bungu re, 'Njom sang n kp'sebe, ndon nyi', kehn n kpehme ka ane ba ki gbo ntahm ebi.†

⁸ Tibre Mmon no nne tob li nfono Esabat."

*Nne no ebo ebe lohngo no
(Mak 3:1-6; Luk 6:6-11)*

⁹ Jisos kehm tahme edi jio, song rehng go etahk ero ajehng.

¹⁰ Nne jolo o, no ebo ebe lohngo no. Bo kehm bahbe Jisos re, "Anv, n'nob re nne lim ane, bo nob ayam ebo efung Esabata?" Tibre bo jo sebe ejum ji bo bahke koko ka Jisos ebi.

* 12:6 12:6 Jon 2:21 † 12:7 12:7 Mat 9:13

11 Owo Jisos kehm tongo bo re, “Anv, nne awohng ewahne l'bel njoro, njoro nyio l'fere gbo yel go elbing efung Esabat, á nehm song yehk-ea?

12 Anv, nne sang ga gbal sehng njora? Ano wo wahng ka atahm enyahre bungu re, nne jo lim nnoobo efung Esabat.”

13 Owo á kehm tongo nne noo re, “Tanne ebo eba!” Á kehm tanne ebo, ebo fere feere ana wuku wuku, nob kpee ana ebo behko.

14 Bab Farisi kehm soro tahm, song lam kak-e, ana bo bahk-e wulu.‡

15 Eji Jisos sebe ano kahn, á kehm tahme eje. Ane gbalee kehm tahme toon-e. Á limi bo kpee, bo nob ayam ebo.

16 Á tongo bo re, bo k'tooro tong ane bako bada ne,

17 eji l'lohko jol ana Esowo bungu sehng go nnyo mi nnyehnamahr Aisaya re,

18 “Nyehnee, a wo li nlokeltum ewame no m ma yehke.

Akor-m ejame ji kpo kor-m s'sehng.

M bahk-e kake etohko ejame.

Á bahke jo tiingi ane baka baka elam ejame.

19 Á nehm jo taange ntaange, fere jo rabe.

Bo nehm jo wuk ewok eje go nla ejahbe.

20 Eljele ni ma bahne, á nehm wob.

Et'rekahng ji kp'rede ellulu,

á nehm lahme,§

tete etingitingi ba ko nji.

‡ 12:14 12:14 Jon 5:16 § 12:20 12:20 Mak 2:17

21 Go ege a mbing wo ane baka baka bahke jo kunu ekpu.”*

Jisos abola ntul a nnehm
(Mak 3:20-30; Luk 11:14-23)

22 Ane bandiki kehm koko nwakamahr nyi ki jo ma bung, ba a ne, nyi bele ebi etohko go ege atahng. Jisos kehm limi nne noo, á nyehn, fere bung.

23 Ellong ane bao kehm kpoko bo esi. Bo kehm bungu re, “Anv, mmon a Devid wo aa?”

24 Bab Farisi wuku kan a me, bo kehm bungu re, “Á kpo kam ane abi atohko yehke tib go nsahm nyi Belsebul, ntul a nnehm ka-e no.”

25 Jisos k'kahn ntir atahng ebo, kehm tongo bo re, “Ejahbe ajehng ajehng ji l'yab, jol ebo ebo, bahke tane na. Nfam anyehng anyehng nyi l'yab, jol ebo ebo, afi fere jol nlaaga, nehm yiimi.

26 Nnehm l'kam nnehm yake go, lohngo re eblehm ebyab. Ejahbetul eje bahke yiimi renan?

27 “L'fere jol re, n kpo kam ane abi atohko yehke go nsahm nyi ntul a nnehm, anv abon ebahne kpo kam bo yehke go nsahm anyii?† Owo wahng ka bo bahke jolo ane ba bahk-n lame.

28 N kpo kam ane abi atohko yehke go nsahm nyi etohko ji Esowo, eblohng re, Esowo ebbadde ba go egahne, a etul etul ebe.‡

29 Nnene limm, no bahke ma wa etahk etah-ntahn nne yel, song kpu nsol enye tahm a nyi, sehngem re no, á tohko gbo mbang gba etahntahn

* 12:21 12:21 Mat 8:11 † 12:27 12:27 Luk 9:49; Elt 19:13

‡ 12:28 12:28 1 Jon 3:8

nne jio alehke, á kehm ma yel, song kpu nsol enye.

³⁰ “Nne no ki li ka me, á li nnekv ewame. Nne no tohk-m tob elkpiimi, no lun á kp'fare na faade.

³¹ Owo wahnge n kp-n tongo re, ane bahke ma bel eltahmeka go bo abiafem anyehng anyehng nya bo limi no, a eb'bi ajehng ajehng ji bo bungu no, sehngem ab'bi nya bo kpo bung bade Etingi Etohko, nya nya bo l'k'tiki bel eltahmeka. §

³² Nne awohng awohng no l'bung eb'bi bada Mmon no nne, á bahke bele eltahmeka. Nne awohng awohng no l'bung eb'bi bade Etingi Etohko, á nehm bel eltahmeka, jol eying jia ji anv, afi fere jol eying ji kp'bake.

Eti, a akab enye
(Luk 6:43-45)

³³ “Re wahn kehm jo bong anoobo akab nti, lohngo re m bahke bahme na nnoobo eti. N l'bahm ebi eti, m bahke bongo abi akab. Tibre go akab nya kabe no nya, bo bahke liingi eti jio.

³⁴ Wahn ane ba li ana akumbad ba! M bahke ma bung anoobo nsol renan, eji n li ab'bi ab'bi? Tibre nsol nyi ma rur nne go ege eltim, nyi nyi nne kpo bung go ege a nnyo.

³⁵ Nnooba nne kpo yehke anoobo nsol nya wob-e go ege atahng. Ebi nne kpo yehke abi nsol nya wob-e go ege atahng.

³⁶ N kp-n tongo re, Efung elam bio, nne awohng awohng, Esowo bahk-e bahbe bade ellum anehng anehng ni á bungu no, ni ki lohng ejumjum.*

§ 12:31 12:31 Jon 16:7-9; 1 Tim 1:13 * 12:36 12:36 Jems 1:19; Ef 5:4

³⁷ Tibre Esowo bahke koko alum enya nya a bungu no, lam-a.[†] Fundiki a bahke lehke eno. Fundiki a bahke lehke ebi.”

*Ana bo sebe re bo nyehn nkpokosi
(Mak 8:11-12; Luk 11:29-32)*

³⁸ Egom Farisi, a at'tibi ba atahm bandiki kehm tongo Jisos re, “Nt'tibi, e kp'sebe re wo lim nkpokosi, wahr nyehn.”[‡]

³⁹ Á kehm faange bo re, “Abi ane ba li anv, ba ma sennge Esowo njahm kp'sebe re bo nyehn nkpokosi. Jol nkpokosi anyehng anyehng bo nehm nyehn, sehngem nkpokosi ana nyi nnyehnamahr a Jona nyi nyi bo bahke nyehne.

⁴⁰ Tibre, ana Jona kange ala nnyam alahb nfung era, ano wo fvfo Mmon no nne bahke tob kang atahng ndi nfung era.[§]

⁴¹ “Go efung elam bio, aneb Ninive bahke mehle yiimi, ka ane ba li anv ebi. Tibre bo gb'gbo ndon go bo abiafem, eji bo wuku alum Esowo nya Jona bungu no.* Nyehnen ga, a wo li nne no ga gbal sehng Jona.

⁴² Go efung elam bio, ntul a nnenkal no Seba bahke mehle yiimi, ka ane ba li anv ebi. Tibre á lohngo nlaabambang ejahbe ba goji Solomon re á ba wuk elkahne ene. Nyehnen ga, a wo li nne no ga gbal sehng Solomon.[†]

*Ana ebi etohko kpo feere, ba yel nne
(Luk 11:24-26)*

[†] 12:37 12:37 Luk 19:22 [‡] 12:38 12:38 Mat 16:1; 1 Kor 1:22
[§] 12:40 12:40 Rom 1:4 * 12:41 12:41 Mat 11:20-24 [†] 12:42
 12:42 Mat 12:6

43 “Ebi etohko l'lohng nne, á kpo yannge go adi nya kp'waange, jo seb edi ji á bahke reke ekv, á nehm tiki ting.‡

44 Owo ebi etohko jio bahke kehm bungu re, ‘M bahke feere go etahk ji n lohng no abake.’ Á l'feere song nyehn etahk jio, li nehme nehme, bo ma feenge kpee, tuungu kpee bum,

45 owo á bahke tahme, song ko atohko nyako na asehma ba a nya, nya sahb b'bib sehng ye. Bo feere ba lene etahk jio. Nne noo bahke kpe sab na sehng ana wuku wuku. Ano wo fvfo bahke tob jol ka abi ane ba li anv.”§

Nnyehn Jisos, a abonanyehn Jisos
(Mak 3:31-35; Luk 8:19-21)

46 Ngare nyi Jisos kpi mbungu mbungu a ane bao, nnyehn kehm lohngo ba, a abonanyehn.* Bo yiimi go elatahk, jo seb re bo bung a ne.

47 Owo nne awohng kehm tongo Jisos re, “Nyhnee, nne, a abonane yim go elatahk kp'sebe re bo bung a na.”†

48 Jisos kehm faange nne no tong-e no re, “Nne awo li nnee? Ane aba li abonanee?”

49 Á kehm tono ebo tv abat'toono ebe, kehm bungu re, “A wo li nnee. A wo li abonanee.‡

50 Tibre nne awohng awohng no l'lim ji Nsoo no li go ero kp'sebe re á lim, ye wo li mmonanee, a nnee.”§

‡ 12:43 12:43 2 Pit 2:17 § 12:45 12:45 2 Pit 2:20 * 12:46
12:46 Mat 13:55 † 12:47 12:47 Luk 2:49 ‡ 12:49 12:49 Jon
7:5 § 12:50 12:50 Rom 8:29

13

Elgan ni li bada mbahmgbe

(Mak 4:1-9; Luk 8:4-8)

¹ Efung b'nehm ona, Jisos kehm mehle go etahk, song ji go nkpe eto.

² Eji ellong ane gbalee ba go ege, owo á kehm yele go egbang, song ji. Ane bao kpee yiimi go nkpe egbuk.

³ Á ko ngaane, jo tong bo nsol gbalee re, “Nne jolo gona, no tahme no, song wohngo amohk nti enye go ege egbe.

⁴ Eji á jo wohngo, nyandiki gbo noongo go mbang. Nruk ba suudu kpee mele.

⁵ “Nyandiki gbo noongo go ndi nyi jolo atal atal. Abon ndi jolo ntiil. Amohk nti nyao gulu elmahnge. Tibre edi jio ndi gbalem.

⁶ Njul nyaare kan a me, akohdo nti nyao wu-udu, fere kpo. Tibre alohk jolem.

⁷ “Nyandiki gbo kuumu go elkob akpiri. Akpiri nyao gbale, bulu akohdo nti nyao.

⁸ “Amohk nti nyako gbo noongo go nnooba ndi, kab akab. Atasok nyandiki jo jolo nkab atahl alon alon, atasok nyandiki nkab atahl ara ara, atasok nyandiki eltahl a nkab ewubu eltahl a nkab ewubu.

⁹ “Nne no kpi atung, nong, á wuk!”*

Ji wahnge Jisos jo t'tuubu ngaane

(Mak 4:10-12; Luk 8:9-10)

¹⁰ Owo abat'toono Jisos kehm bake go ege, ba bahb-e re, “Jen ji wahnge a kpo ko ngaane, jo bung a bo?”

* **13:9 13:9** Mat 13:18-23

¹¹ Jisos kehm faange bo re, “Bo ma-n ka elkahne nio ni etul bi Esowo, bi Esowo behre no. Ane bao, bo kaam bo.

¹² Nne no kpi no, bo bahk-e budu na, á bel gbalee. Nne no ki kpi, bo bahk-e taare na ji á kpi no.[†]

¹³ Owo wahng ka n kpo bung a bo go ngaane. Tibre bo kpo seenge, jol bo kpehme nyehn. Bo kpo wuungu atung, jol bo kpehme wuk, fere kahn.

¹⁴ Bo ba li ane ba nnyehnamahr Aisaya bungu no bada bo re,

“ ‘M bahke wuungu na wuungu wuungu atung, n nehm tiki kahn.

‘M bahke seenge na seenge seenge, n nehm tiki nyehn.

¹⁵ Tibre asi ane bao ebferetahne. Bobsahde atung ebo.

Bobbulu amahr ebo.

Ki li ano, kehn, bo kp'nyehne, fere wuk, fere k'kahn go bo a ntim, fere senngé, feere go egame, eji n l'lim bo, bo nob.[‡]

¹⁶ Elfuulu li ka amahr enyahne, eji kp'nyehne. Elfuulu li ka atung enyahne, eji kp'wuku.

¹⁷ Etingitingi, n kp-n tongo re, Abanyehnamahr gbalee, a aneb Esowo gbalee jo sebe re bo nyehn ji n kp'nyehne a. Jol bo tikem nyehn. Bo jo sebe re bo wuk ji n kp'wuku a. Jol bo tikem wuk.[§]

*Ana Jisos lennge elgan ni li bada mbahmgbe
(Mak 4:13-20; Luk 8:11-15)*

[†] 13:12 13:12 Mat 25:28 [‡] 13:15 13:15 2 Tes 2:11-12 [§] 13:17 13:17 Luk 10:23-24

18 “Wuungen atung anv, wahn kahn ana elgan ni li bada mbahmgbe lohngo no.

19 “Ane ba l'wuk alum nya etul bi Esowo, k'kahn ana lohngo no, Ebinne bahke bake, ba yehke nsol nyi bo ma bahm go bo a ntim tahm a nyi. Nyao nya li amohk nti nya gbo noongo go mbang.

20 “Ane bandiki li ana amohk nti nya gbo noongo go ndi nyi jolo atal atal. Bo l'wuk alum Esowo nyao o, bo ko tvtv a eyebatahng.

21 Eji bo ki kpi alohk, bo kpehme kang. Erem l'ba, a ntong tib go alum Esowo nya bo wuku no, bo soro gbo tvtv.

22 “Ane bandiki li ana amohk nti nya fooro gbo go elkob akpiri. Bo kp'wuku alum Esowo, wo, nsol nyi njini nyia kpo gbiingi bo go bo a ntim. Ekor akpohko kpo nehm bo.* Nsol nyia kpee kpo bulu alum Esowo nyao tv. Akab bo nehm kab.

23 “Ane bako li ana amohk nti nya bo wohngo go nnooba ndi.† Bo l'wuk alum Esowo kahn, bo lohko kab akab, egom jindiki nkab atahl alon alon, egom jindiki nkab atahl ara ara, egom jindiki eltahl a nkab ewubu eltahl a nkab ewubu.”‡

Elgan ni li bade agasame

24 Jisos kehm kpe tub bo elgan nehko re, “Etul bi Esowo li ana nne no tahme song kak nkohl go ege egbe.

25 Eji ane ma lal, nnekv ewe kehm tahme song wohngo afem agasame semme go nkohl nyio, tahm eje.

* 13:22 13:22 1 Tim 6:9 † 13:23 13:23 Elt 17:11 ‡ 13:23 13:23 Gal 5:22

²⁶ Eji nkohl ma mahng, gbal, fere lake abon, agasame kehm tob mahng.

²⁷ Owo alokeltum ba nfono egbe noo kehm ba bahb-e re, 'Nsoo, nkohl sang a kake go ega egbea? Anv, agasame nyao lohngo gan ba?'

²⁸ Owo á kehm tongo bo re, 'Nnekv wo ma lim ejum jio.' Alokeltum bao kehm-e bahbe re, 'Anv, a kp'sebe re wahr song wooba?'

²⁹ Á kehm tene re, 'E'ee, n l'song woobo agasame, n bahke woobo nkohl semme.

³⁰ Nong, nsol ebal ebal gbal ano tete rehng go efung elbanne. Owo m bahke tongo abab'banne re, Gboon mbang, wahn tohko woobo agasame, gba agan agan, eji bo l'jahm fi, wahn kehm banne nkohl kanne, kpu song kpake go egame etahk.' "§

Elgan ni li bada mmohk asia

(Mak 4:30-32; Luk 13:18-19)

³¹ Jisos kehm kpe tub bo elgan nehko re, "Etul bi Esowo li ana mmohk asia nyi nne ko no, song bahm go ege etahngga.

³² Se sehngge mmohk eti anyehng anyehng.* Eji gbale no, gbale sehngge eti ajehng ajehng ji bo kpo bahm etahngga.† Owo nruk kehm bake, ba si ntahk o."‡

Elgan nyi li bade ayist

(Luk 13:20-21)

³³ Jisos kehm kpe tub bo elgan nehko re, "Etul bi Esowo li ana ayist,§ nya nnenkal ko song behr

§ 13:30 13:30 Mat 13:37-43 * 13:32 13:32 Fil 2:8 † 13:32 13:32 Jon 12:24 ‡ 13:32 13:32 Elt 20:29-30; Mat 13:30 § 13:33 13:33 Mak 8:15; 1 Kor 5:6-8

go ebam aflawa na ebra tete semme kpee, fere tung.”*

*Ana Jisos lennge elgan ni li bade agasame
(Mak 4:33-34)*

³⁴ Nsol nyia kpee, Jisos jo bungu go ngaane, tong ellong ane. Á joom tiki bung na bung, k'bung go elgan,

³⁵ eji l'lohko jol ana nnyehnamahr bungu no re, “M bahke jo bung a bo go ngaane.

M bahke tongo bo nsol nyi Esowo behre no ngare nyi njini bomo no.”

³⁶ Jisos kehm tahme ellong ane bao sa, song yel ekp'kpa. Abat'toono ebe kehm bake go ege, ba bahb-e re, “Tong-r ana elgan ni li bade agasame lohngo no.”

³⁷ Owo Jisos kehm faange re, “Nne no kake nkohl, Mmon no nne wo.

³⁸ Edi egbe jio, njini nyi. Nkohl nyio, abon Ntul ba. Agasame nyao, abon ba Ebinne jio ba.

³⁹ Nnekv no wohngo afem agasame, nnehm nyi. Ngare elbanne nyio, es'kohro eying jia ji. Abab'banne bao, babenjel ba.

⁴⁰ “Ana bo bahke kpuku agasame nyao, jamme fi, ano wo bahke jolo es'kohro eying jia.

⁴¹ Owo Mmon no nne bahke tumu enjel enye,† bo bahke yanngre go ege ejahbetul, kpu ane kpee ba jo wahng re ane jo lim abiafem, a aneb ab'bi,

⁴² ro bo, kak go agun. Owo bo bahke woomo, jo ling, fere jo kono amahn.

* 13:33 13:33 Mat 13:30 † 13:41 13:41 Mat 25:31-46

⁴³ Aneb Esowo bahke jo ya ana njul go ejahbetul ji Nde ebo.

“Nne no kpi atung, nong, á wuk.

Elgan ni li bade elkohl akpohko

⁴⁴ “Etul bi Esowo tob li ana elkohl akpohko ni bo behre edi egbe.‡ Nne awohng kehm song nyehn, tuungu behr. Á bele eyebatahng sehng, kehm song gungu nsol enye kpee nyi á bele no,§ fere ba gunu edi egbe jio.*

Elgan ni li bada mmohkesol

⁴⁵ “Etul bi Esowo tob li ana njenare no jo seb anoobo amohkesol.

⁴⁶ Eji á nyehne anyehng nyi sahb k'kim ekun, fere n'nob, owo á kehm soro tahm, song gungu nsol enye kpee, nyi á bele no, fere ba gunu mmohkesol nyio.

Elgan ni li bade erim

⁴⁷ “Etul bi Esowo tob li ana erim bi bo ma kak go aya, fere bob nsahre go nkohn a nkohn.†

⁴⁸ Eji nsahre ma rur, bo kehm tohngo, bum egbuk.‡ Owo bo kehm jehke, kehm kehme nsahre jak. Nyi nno, bo jo kake go ajeere. Abi nsahre, bo ro go.

⁴⁹ Ano wo bahke jolo go es'kohro eying jia. Babenjel bahke bake, ba jak abi ane go ellong anoobo ane,

⁵⁰ fere ro bo kak agun. Owo bo bahke woomo, jo ling, fere jo kono amahn.”§

‡ 13:44 13:44 1 Pit 1:7; Kol 3:3 § 13:44 13:44 Fil 2:6-8 * 13:44 13:44 Ell 5:9 † 13:47 13:47 Mat 22:9-10 ‡ 13:48 13:48 Mat 24:14 § 13:50 13:50 Elt 10:35; 1 Kor 6:9-11

Ak'kulu nsol, a nsol nfenfe

⁵¹ Jisos kehm bahbe bo re, “Anv, nsol nyia lenng-n lennga?” Owo bo kehm-e faange re, “Ee nsoo.”

⁵² Á kehm tongo bo re, “Owo wahnge nt'tibi no atahm awohng awohng no ma jol nt'toono Esowo, no ma kpili bade etul bi Esowo, á li ana nfontahk no kpo yehke nsol afang enye go elkohl, nyindiki nsol nfenfe,* nyindiki ak'kulu nsol.”†

*Ana bo tene Jisos go Nasaret
(Mak 6:1-6; Luk 4:16-30)*

⁵³ Eji Jisos tuubu ngaane nyio kpee mal, owo á kehm tahme edi jio,

⁵⁴ song rehng go ege ejahbe, song kehme bo tib go bo etahk ero.

Ane ba wuk-e no, jo kpo bo esi sehng, bo kehm bahbe re, “Gan wo á bele elkohn elkahne ana nia, a nsahm nyi á kpo ko lim agburu akpokosi nyaa?‡

⁵⁵ Ye sang li mmon a kapentaa? Nnyehn sang bo kpo lung-e re Meria? Abonanyehn sang bo kpo lung bo re Jems, Joses, Saimon a Judasa?

⁵⁶ Abonanyehn ba nkal sang li a nahre a kpeea? Anv, gan wo á bele bel nsol nyio kpee?”

⁵⁷ Owo bo kehm-e tene.

Jisos kehm tongo bo re, “Nnyehnamahr, bo kpo kak-e edi ajehng ajehng, sehngem ane ebe, a ejahbe eje ji kil jo kak-e.”§

⁵⁸ Á limem akpokosi gbalee ejahbe jio tib go bo ek'taame.

* **13:52 13:52** Jon 13:34 † **13:52 13:52** 1 Tim 1:8; Rom 7:12,14

‡ **13:54 13:54** Jon 7:15 § **13:57 13:57** Jon 4:44

14

Ana Jon ji nwohngalahb kpo no

(Mak 6:14-29; Luk 9:7-9)

¹ Ngare nyio Herod ji jolo ntul a Galili kehm wuku bada Jisos.

² Owo á kehm tongo alokeltum ebe re, “Jon ji nwohngalahb wo ona ma nyahme go elkv. Ano wo wahnge á kpi egburu nsahm ana nyio nyi kpo mehl-e.”

³ Tibre Herod bobo Jon, gba-e, kak go ngbekobo tib esi ji Herodias ji jolo nkal a Filip mmonan-nyehn.*

⁴ Tibre Jon jo tong-e re, “Fuumem re a ko-e.”

⁵ Herod jo sebe re á wul-e. Á jo fahle Jus, tibre bo jo bumu Jon ana nnyehnamahr.†

⁶ Efung bi bo ji, buumu efung bi bo jele Herod, mmon no nkal no Herodias kehm kehme ase bahn go elkab ane nio. Herod, atahng yeb-e sehng,

⁷ á kehm nyame, fere t'tir re, “M bahk-a kake ejum ajehng ajehng ji a l'bahb-m.”

⁸ Nnyehn kehm toobo a ne. Mmon noo kehm song tong Herod re, “Ka-m esi Jon ji nwohngalahb anv anv go ekpingi.”

⁹ Ntul kpeem bang, wo, tib go esi ji á tiri no go esamahr ane ba á tiingi bo elkak, owo á kehm tongo re bo lim ka-e ana á bahbe no.

¹⁰ Á kehm tumu ane, bo song kim Jon esi go ngbekobo,

¹¹ ko esi jio go ekpingi ba a ji, ba ka mmon noo. Mmon noo kehm soro ko, song ka nnyehn.

* 14:3 14:3 Mat 11:2 † 14:5 14:5 Mat 21:26

¹² Abat'toono Jon kehm bake, ba rod ekv eje, song kpa kak, kehm feere song tong Jisos.

*Ana Jisos le ellong ane gbalee (5,000)
(Mak 6:30-44; Luk 9:10-17; Jon 6:1-14)*

¹³ Eji Jisos wuku eka jio bada Jon, owo á kehm tahme edi jio, song yel egbang antahng, song rehng edi ji li soom. Ellong ane ba wuku no, kehm tahme ajahbe ebo, jo jen egbuk egbuk, jo toon-e.

¹⁴ Jisos lohngo kan egbang me, á kehm nyehne ellong ane gbalee. Bo kehm-e fili ndon. Á kehm limi aneb ayam ebo, bo nob.

¹⁵ Eji elgung ma ba, abat'toono ebe kehm song kpir-e, kehm-e tongo re, "Tahm edi jia ana rehng go ajahbe, ekidi kp'labe. Wo gana, ngare ebsehng. Nong, ane baa song gunu nsol alehke go abon ajahbe li me."

¹⁶ Owo Jisos kehm tongo bo re, "Bo sang bahke tahme song gunu nsol alehke li, wahn kaan bo nsol alehke, bo li."

¹⁷ Owo bo kehm-e faange re, "Nsol nyi e kpi a kpee li abon abred na alon, kumu abon nsahre abal."

¹⁸ Jisos kehm tongo bo re, "Koon nsol nyio ba ka-m wahn!"

¹⁹ Owo á kehm tongo ane bao re, bo ji go ajele. Á kehm rodo abon abred bao na alon, a abon nsahre na abal, kehm kpiidi amahr enye go elbung, kak Esowo saam, fere bakke abon abred bao, ka abat'toono ebe. Abat'toono ebe ko, song bak ellong ane bao.

²⁰ Bo li ane kpee wohngo. Abat'toono ebe kehm song taare bo erik ji sa no, ruru ewubu ejeere na ebbal.

²¹ Aneblum ba li nsol nyio jolo ejum ane atahltahl nkpel ewubbal ane atahl awubu (5,000). Jol anebkal, a abonse, bo fangem bo.

*Ana Jisos jene go ero alahb
(Mak 6:45-52; Jon 6:15-21)*

²² Jisos kehm tongo abat'toono ebe re bo yel egbang, gbo-e mbang, song go egbuk jehko, ye samme ji, yaame ane bao.

²³ Eji á ma yaame ane bao, owo á kehm tahme go ewong antahng re á song kak ero. Eji elgung ba no, Jisos noa, kpeke li go ntahngtahng.†

²⁴ Ngare nyio egbang ebrehng go nlum alahb. Ebuku jo gbulu egbang bio tv edi ajehng ajehng. Tibre nfeb jo lohngo go bo a mbuksong.

²⁵ Nkpese efungfu wo, Jisos jene ero alahb, song kpiri bo.

²⁶ Eji abat'toono ebe nyehn-e no á kp'jene go ero alahb, kehm mennge bo. Bo kehm bungu re, "Etohko ji," fere rabe elfahle elfahle.§

²⁷ Jisos kehm soro bung a bo tvtv re, "Boben eltim, me wo, kana kpe fahl!"

²⁸ Owo Pita kehm-e faange re, "Nsoo, l'lohko jol re wo wo, tong-m, me n lohng, jen go alahb, ba kpir-a!"

²⁹ Jisos kehm-e tongo re, "Ba!" Pita kehm lohngo go egbang, kehm kehme eljene go ero alahb asongo goji Jisos.*

† 14:23 14:23 Luk 6:12 § 14:26 14:26 Luk 24:37 * 14:29 14:29
Jon 21:7

³⁰ Eji á nyehne re, nfeb nyio kp'limi area, á kehm kehme elfahle, soro kehme eltere, kehm rabe re, “Nsoo, tahr-m!”

³¹ Owo Jisos kehm soro tanne ebo ebe, jabb-e kehm-e tongo re, “Wo ji kp'kahn taame ntiil, jen ji wahnge a kehm f'faabe me?”

³² Eji bo feere song yel go egbang, nfeb nyio kehm soro naange.

³³ Ane ba woomo go egbang kehm ba jamm-e alahng, kehm bungu re, “Etingitingi, wo Mmon Esowo wo.”

Ana Jisos limi aneb ayam, bo nob go Genesaret (Mak 6:53-56)

³⁴ Bo kehm gohro siiri, song rehng go egbuk jehko ji Genesaret.

³⁵ Ane bao liingi kan Jisos, bo kehm tiingi etib tv ajahbe kpee nya jolo o. Bo kehm koko aneb ayam kpee, ba a bo go ege.

³⁶ Bo fere gboong-e re, á nong, aneb ayam lub koor-e go ege as'sili nsubu. Ane kpee ba koor-e no, bo nobo ayam ebo.[†]

15

Eltibi ni anebkul jo tib (Mak 7:1-13)

¹ At'tibi ba atahm, a egom Farisi jindiki kehm lohngo go Jeusalem ba goji Jisos, ba bahbe re,

² “Jen ji wahnge abat'toono eba kp'daange atahm nya babnsoo, tib eji bo kil jo ru abo, kehm jo li nsol?”*

[†] 14:36 14:36 Mat 9:21; Luk 6:19 * 15:2 15:2 Luk 11:38

³ Owo á kehm faange bo re, “Jen ji wahnge n kpo daange atahm Esowo, fere kp'toono eljini n'nahne?

⁴ Tibre Esowo jehke ntahm re, ‘Jo kak nso, a nne!’ Nyehko kpe li re, ‘Nne no l'su nde, afi jolo nnyehn, bo bahk-e wulu.’

⁵ Wahn kpo tib re, ‘Nne no l'bel ejum ji á jol kake nde ebo, afi jolo nnyehn, á l'fere bung re, Ejum jia li ka Esowo, kpeem li ka-e re, á kpe kak nde, a nnyehn.’†

⁶ Eji n kpo tib ana wo wahnge m ma range ntahm nyi Esowo, fere kp'toono eljini n'nahne.

⁷ Wahn aneb alum abal abal ba! Aisaya lohko nyehn enyehnamahr ji nno bada nahne, eji á bungu re,

⁸ “ ‘Ane baa kpo kak-m go nnyo a nnyo.

Ntim ebo n wobem.

⁹ Bo kp-m kake mbol mbol,
eji bo kp'tibi atahm nya ane baka baka jehke no,
nya ki li nya Esowo.’ ”

Nsol nyi kpo lim eltim nne, k'jol saang
(Mak 7:14-23)

¹⁰ Jisos kehm lungu ellong ane tv elne, kehm tongo bo re, “Wuungen atung, wahn kahn!

¹¹ Ejum ji kpo yel nne go nnyo sang kpo lim eltim nne k'kpe jol saang.‡ Jio ji kpo lohng na go ege a nnyo, ji ji kpo lim eltim nne re k'kpe jol saang.”§

† 15:5 15:5 1 Tim 5:8 ‡ 15:11 15:11 1 Kor 8:8 § 15:11 15:11
Jems 3:6

¹² Abat'toono ebe kehm bake go ege, ba tong-e re, "Anv, a kp'kahne re, alum nya wuku a bungu no s'sab Bab Farisia?"

¹³ Owo á kehm faange re, "Eti ajehng ajehng ji Nsoo no li go ero ki bahm, bo bahke mehle na tub go.

¹⁴ Yaken na yake bo go! Bo li awakamahr atubesi! Nwakamahr l'seb re á tib ntem nwakamahr mbang, bo ane abal abal bahke gboko na, yel go elbing."*

¹⁵ Owo Pita kehm-e tongo re, "Tong-r ana elgan nia lohngo no!"

¹⁶ Jisos kehm faange re, "Wahn fvfo, á nehme tob kahna?

¹⁷ Á nehme kahn re, ejum ajehng ajehng ji l'yel nne go nnyo kpo sehng go ala, lohng go ngubjinga?

¹⁸ Nsol nyi kpo lohng nne go nnyo kpo lohng-e go eltim. Nsol nyio nyi kpo lim nne, k'kpe jol saang.

¹⁹ Tibre go eltim nne wo ebi ntir kpo lohng, a ewulane, erehbe alimi, anebkal akono, ejv avohko, ntianse efahnge, a afahnge akiimi lake ane.

²⁰ Nsol nyia ana nyi kpo lim nne, k'kpe jol saang. Re nne li nsol k'ru abo, we nehm ma lim á k'kpe jol saang."

*Nnenkal no taame no
(Mak 7:24-30)*

²¹ Jisos kehm tahme edi jio, song rehng go ejang bi Taya, a Saidon.

* **15:14 15:14** Rom 2:17-24

22 Nnenkal a Kenan awohng no lohng ejahbe jio kehm bake go ege, ba rabe gboong-e re, “Nsoo, mmon no Devid, nong, me n fil-a ndon! Mmon ewame, ebi etohko wob-e go atahng, kp-e gbiingi sehng.”

23 Jisos we tikem faange.

Abat'toono ebe kehm bake go ege, ba gboong-e re, “Tong-e á song. Tibre á kp'rabe tob-r sehng.”

24 Owo Jisos kehm faange re, “Bo tum-m tv go ejoro bio bi Israel bi ma tan bi bi.”†

25 Owo nnenkal noo kehm ba gbo go ege alata, kehm bungu re, “Nsoo, kak-m ebo!”

26 Owo Jisos kehm faange re, “Nobem re nne rod nsol alehke nyi abon, ka ebv.”

27 Nnenkal noo kehm taame re, “Ee nsoo, jol ebv kpo kpiimi akahb elang nya kpo fooro eksp'kuru nde ebo gbo.”

28 Owo Jisos kehm-e faange re, “Nnenkal, eltaame ena kp'gbale gbalee.‡ Nong, lohko jol ana a kp'sebe.”

Ngare ny'nehm ona nyi mmon ewe noo no nkal nobo eyam bio.

Ana Jisos limi ane gbalee, bo nob

29 Jisos kehm tahme edi jio, song rehng go eto jio ji Galili, kehm wahre go ewong, song ji.

30 Ellong ane gbalee kehm koko aneb ayam ba a bo goji Jisos. Bandiki jolo abanne, bandiki agboodo, bandiki awakamahr, bandiki akamme. Ane bako gbalee ba jo yame ayam nyandikandiki.

† 15:24 15:24 Mat 10:6 ‡ 15:28 15:28 Luk 11:5-8; 18:2-8

Bo jo ba bumu aneb ayam bao go alata nya Jisos. Á jo lim bo, bo nob.

³¹ Jo kpo ane esi sehng, eji bo nyehne akamme kp'bungu, fere nyehn agboodo ma nob, fere nyehn abanne kp'jene, awakamahr fere jo nyehn. Bo kehm kehme Esowo bio bi Israel ellub ka. §

*Ana Jisos kpe le ellong ane nehko (4,000)
(Mak 8:1-10)*

³² Jisos kehm lungu abat'toono ebe tv elne, kehm tongo bo re, “Ane baa ma-m fili ndon. Tibre nfung era nyi a, nyi bo ma kang a name. Anv, bo kpeem kpi ejum alehke ajehng ajehng. N nehme seb re me n yake bo, bo song njal njal. Fundiki bo bahke gboko awo go mbang.”

³³ Owo abat'toono Jisos kehm-e bahbe re, “Gan wo e bahke tingi nsol alehke elka emahng nia, kehm leke ellong ane ana nia?”

³⁴ Owo Jisos kehm bahbe bo re, “Abon abred abik ní kpi no?”

Bo kehm-e faange re, “E kpi abon abred na asehma, kunu abon nsahre abik abik.”

³⁵ Jisos kehm tongo ellong ane bao re, bo ji go ndi.

³⁶ Á kehm rodo abon abred bao na asehma, a nsahre nyio, kehm kake Esowo saam, bakke, ka abat'toono ebe, abat'toono ebe kehm koko, song bak ane.

³⁷ Bo li ane kpee wohngo. Abat'toono ebe kehm taare bo erik ji sa no, ruru ejeere na ebsehma.

³⁸ Aneblum ba li nsol nyio jolo ane atahltahl nkpel ewubu (4,000). Jol anebkal, a abonse, bo fangem.

³⁹ Jisos kehm yaame ane bao re bo song kehng, kehm yele egbang, song rehng go egbuk jehko ji Magadan.

16

*Ana bo sebe re bo nyehn nkpokosi
(Mak 8:11-13; Luk 12:54-56)*

¹ Egom Farisi jindiki, a Bab Sadusi kehm bake goji Jisos re bo ba gar-e. Owo bo kehm-e tongo re, á lim nkpokosi nyi lohng go ejahbetul Esowo tib bo.*

² Owo Jisos kehm faange bo re, “Ana wo ń kpo kono elbungu. Elgung l'ba, eji elbung ma biili, ń re, ‘Elahb nehm na.’

³ Efungfu atv atv eji elbung ma biili, fere ny'nyak, ń re, ‘Elahb bahke nake.’ ń kpo kahn ana elbung li no, joare elahb bahke nake, afi nehm na. Anv, nliingi nyi kp'tibi bada ngare ń nehme ma liinga?†

⁴ Abi ane ba li anv, ba ma senngé Esowo njahm kp'sebe re bo nyehn nkpokosi. Jol nkpokosi anyehng anyehng bo nehm nyehn, sehngem nkpokosi ana nyio nyi nnyehnamahr Jona nyi nyi bo bahke nyehne.”

Owo á kehm soro tahm bo sa o, tahm eje.

*Ayist nya Farisis, a nya Sadusis
(Mak 8:14-21)*

* **16:1 16:1** Mat 12:38 † **16:3 16:3** 1 Tes 5:1; Luk 2:12; Mat 24:3,30

⁵ Eji abat'toono Jisos siiri eto jio, song rehng egbuk jehko, ebred ajehng ajehng bo belem. Tibre bo y'yini, bo rodem.

⁶ Owo Jisos kehm tongo bo re, “Jo gberen, wahn jo kunu ekpu go ayist nyao nya Farisis, a nya Sadusis.”[‡]

⁷ Bo kehm kehme elbungu atemtem re, “Á bungu ellum nia a, tib eji e ki rod abred ba a nya.”

⁸ Eji Jisos sebe kahn ana bo jo bung, á kehm bahbe bo re, “Wahn ane ba kp'kahn taame ntiil ba! Jen ji wahnge n kp'bungu atemtem bade ana n ki rod abred ba a nya?

⁹ Anv, n ka tiki kahn naa? Anv, n nehme kpe buumu ana m bakke abon abred bao na alon, ka ane atahltahl nkpel ewubbal atahl awuba? Anv, erik ji sa no, ji n taare no, ruru ejeere ebbik?

¹⁰ Abon abred bao na asehma ba m bakke, ka ane atahltahl nkpel ewubu, erik ji sa no, ji n taare no, ruru ejeere ebbik?

¹¹ Jen ji wahnge n kil tiki kahn re, n joom bung a nahne bade abred? Jo gberen elnahne tib ayist nya Farisis, a nya Sadusis.”

¹² Owo abat'toono ebe kehm kahne re, Jisos jo tongo bo re, bo gbere eltibi nio ni Farisis, a ni Sadusis, bo k'gbere ayist nya bo kpo kak go abred.

Ana Pita bungu bada Jisos

(Mak 8:27-30; Luk 9:18-21)

¹³ Eji Jisos rehng go ejang bi Sisaria Filipi, owo á kehm bahbe abat'toono ebe re, “Anv, ane kpo bung renan bada Mmon no nne? Nne awo li Mmon no nne?”

[‡] **16:6 16:6** Luk 12:1; Gal 5:9

14 Owo bo kehm faange re, “Ane bandiki kpo bung re, wo Jon ji nwohngalahb wo. Ane bandiki bung re, wo Elaija wo. Ane bandiki re, wo Jere-maya wo, tohko jol ano nnyehnamahr nondiki wo.”

15 Owo Jisos kehm bahbe bo re, “Anv, wahn kpo tir re, me n li elkohn nne awo?”

16 Saimon Pita kehm faange re, “Wo wo li Mesaya ji Mmon no Esowo bi li go elkpin.”§

17 Owo Jisos kehm-e faange re, “Eyebatahng li a na, Saimon, mmon a Jona. Ji a bungu a, nne sang tib-a na. Nsoo no li go ero wo ma lennge ka-a.

18 N kp-a kpeke tong re, Wo wo li Pita (ji lohngo re eltal).* Go ekpartal jia wo m bahke sehke etahk ero ejame.† Jol elkv nehm ma ranng e etahk jio.

19 M bahk-a kake agbokoro nya ejahbetul Esowo.‡ Ji a l'gba go njini nyia, bobtob gba go ejahbetul Esowo. Ji a l'fanng e go njini nyia, bobtob fanng e go ejahbetul Esowo.”§

20 Owo Jisos kehm tongo abat'toono ebe re, bo k'tiki tong nne awohng awohng re, ye wo li Mesaya.

*Ana Jisos bungu bade erem ebe, a elkv ene
(Mak 8:31-9:1; Luk 9:22-27)*

21 Bomo ngare nyio asongo, Jisos kehm bom o abat'toono ebe eltongo gbul gbul gbuul re, “M bahke jeke go Jeusalem, song nyehn erem gbalee, bi anebkul nfam, a atubesi abalimajom, a at'tibi

§ 16:16 16:16 Jon 6:69 * 16:18 16:18 Jon 1:42 † 16:18 16:18 Ef 2:20 ‡ 16:19 16:19 Elt 15:7 § 16:19 16:19 Mat 18:18; Jon 20:23

ba atahm bahk-m kake. Bo bahk-m wulu. L'kang nfung era, n nyahme go elkv.”*

²² Pita kehm koko Jisos, tahm a ne go nkphoko, kehm-e rehke re, “Nsoo, Esowo k'taame re ejum ana jia lim-a.”

²³ Owo Jisos kehm sennge, tong Pita re, “Nnehm, fak-m go esamahr! Wo kp-m kpane. Tibre a kpo tir ntir nyehka nyehka nyi ane. A kpehme tir ntir nyi Esowo.”†

²⁴ Owo Jisos kehm tongo abat'toono ebe re, “Nne awohng awohng no l'seb re á toon-m, nong á ten elne tv-m, fere rod ekros eje tahm toon-m.

²⁵ Tibre nne awohng awohng no l'seb re á tahre elkpin ene, á bahke tane na elkpin ene. Nne awohng awohng no l'tane elkpin ene tib go egame esi, á bahke bele etingitingi elkpin.

²⁶ Nsehng anyi nne bahke lehke, afi á gbo afang nya njini nyia kpee, fere tane etohko eje? Ejum aji nne bahke kake, kehm fake etohko eje?‡

²⁷ “Tibre Mmon no nne yahke ba elbake go ellub ni nde, a enjel enye. Owo á bahke tuuru nne awohng awohng jang jang ana á limi no.§

²⁸ Etingitingi, n kp-n tongo re, Egom ejahne jindiki jia ana, ji l'k'kpo tete bo nyehn Mmon no nne kp'bake ana ntul.”*

17

Ana Jisos yaange ngubjing
(Mak 9:2-13; Luk 9:28-36)

* **16:21 16:21** Jon 2:19,21 † **16:23 16:23** Mat 4:10 ‡ **16:26 16:26**

Elt 8:18-20; 1 Pit 1:18-19 § **16:27 16:27** Rom 2:6; Luk 19:16-19

* **16:28 16:28** Mat 17:2

¹ Eji ma kang nfung erakera, Jisos kehm yehke Pita, Jems, a Jon ji mmonannyehn a Jems. Bo kehm tahme bo bo, song wahr nwahrewahre ewong.

² Eji bo jo seenge Jisos, á kehm yaange. Esamahr ebe fere jo ya ana njul. Nsol nyi á kake go ngubjing kehm bare kpaaang.

³ Owo bo kehm soro nyehn Moses abola Elaija ma lohng ba, ba kehme elbunu a Jisos.

⁴ Pita kehm tongo Jisos re, “Nsoo, a wo li nnoobo edi ji fuumu re wahr jol. L'kor-a, nong, wahr si nkpatahk era a, behko jol b'ba, behko jol bi Moses, behko jol bi Elaija.”

⁵ Eji Pita kpi mbunu mbunu, ekparesemsem ji jo ya, kehm tahle ba bulu bo. Owo bo kehm wuku ellum go ekparesemsem jio re,

“A wo li akor-m mmon ewame no kpo kor-m s'sehng. Wuken ye!”*

⁶ Abat'toono bao wuku kan ano, bo kehm gboko, kohk asamahr ebo go ndi, kehm kehme elfahle gbalee.

⁷ Jisos kehm bake, ba kpiri bo, koro bo, kehm bunu re, “Mehlen yiimi, kana kpe fahl!”

⁸ Eji bo tabe asamahr ebo wahre, bo kpeem nyehn nnene, sehngem Jisos ntahngtahng wo bo nyehn-e no.

⁹ Eji bo jo badde go ewong abake, Jisos kehm tongo bo re, “Kana tiki tong nne awohng awohng bada nkpokosi nyi m ma nyehn a, tete Mmon no nne nyahme go elkv.”†

* 17:5 17:5 2 Pit 1:16-18 † 17:9 17:9 Mat 16:20

¹⁰ Abat'toono bao kehm-e bahbe re, “Jen ji wah-nge at'tibi ba atahm kpo bung re, Elaija bahke tohko gbo mbang ba?”

¹¹ Á kehm faange re, “Elaija bahke gboko mbang ba, ba tuungu ejum ajehng ajehng.

¹² N kp-n tongo re, Elaija ebsi b'ba. Bo we liingem. Bo lim-e ejum ajehng ajehng ji koro bo.‡ Ano wo fvfo Mmon no nne bahke tob nyehn erem bi ane bao bahk-e kake.”

¹³ Owo kehm lennge abat'toono bao re, á jo bungu abo bada Jon ji nwohngalahb.

*Ana Jisos limi mmon no bele ebi etohko, á nob
(Mak 9:14-29; Luk 9:37-43)*

¹⁴ Eji bo feere no, ba rehng edi ji ellong ane jolo no, nne awohng kehm lohngo ba, ba jamme Jisos alahng,

¹⁵ kehm-e tongo re, “Nsoo, nong, mmon ewame fil-a ndon. Á kpo gbo ngboko, kpo gbiing-e sehng. Nkpel tvv á kpo kono elgboko yel agun, fere jo gbo yel alahb.

¹⁶ N ko-e ba a ne goji abat'toono eba. Bo we maam lim, á nob.”

¹⁷ Owo Jisos kehm faange re, “Wahn ane ba kpo soodo, fere k'taame ba! M bahke kange renan a nahne? Anv, bahke kange renan, ji m bahke koko tib-n, á kehm kahne? Ko mmon noo, ba a ne!”

¹⁸ Jisos kehm nyame ebi etohko jio, ebi etohko jio kehm soro lohng mmon noo. Mmon noo lohko nob tvtv.

‡ 17:12 17:12 Mat 11:14

¹⁹ Owo abat'toono Jisos kehm bake, ba kpiri Jisos, eji á li ntahngtahng, kehm-e bahbe re, “Jen ji wahnge wahr ki ma kam ebi etohko jio yehke?”

²⁰ Owo Jisos kehm faange bo re, “Ek'taame ejahne ji wahnge. Etingitingi, n kp-n tongo re, N l'taame, jol afi eltaame enahne se ana mmohk asia, n li ma tong ewong jia re, ‘Mehl, song rehng o!’ Ewong jio bahke lohko mehl tahm. Ejumjum limm, ji bahk-n riidi. §

²¹ Elkohn ebi etohko ana jio n nehm ma kam yehke, tohko jol re n kake ero, fere bade elnahne njal.”

*Ana Jisos kpe bung bade elkv ene
(Mak 9:30-32; Luk 9:43-45)*

²² Ngare nyi bo jolo go Galili, Jisos kehm tongo bo re, “Mmon no nne, bo yahk-e ba elyake, kak ane go ebo.

²³ Bo bahk-e wulu. L'kang nfung era, á nyahme go elkv.”

Abat'toono ebe, ndon kehm gbale bo go eltim.

Bade etak atahbe

²⁴ Eji Jisos, a abat'toono ebe ba rehng go Kape-nium, ane ba kpo ko etak ji etahk Esowo kehm ba bahb Pita re, “Anv, nt'tibi ewahne kpehme tahb etak ji etahk Esowoa?”

²⁵ Pita kehm faange re, “Ee.”

Eji Pita yele ekp'kpa, owo Jisos kehm gboko mbang bahb-e re, “Saimon, anv, a kpo tir renan bade ejum jia? Atul ba njini nyia kpo ko atak goji abon ebo, afi bo kpo ko goji ane baka baka?”

§ 17:20 17:20 Mat 21:21; Luk 17:6

²⁶ Owo Pita kehm faange re, “Goji ane baka baka.”

Jisos kehm bungu re, “L'fere jol ano, lohngo re, abon, ntahm bo wobem.

²⁷ Nong, wahr lim, eji l'k'sab bo. Song, wo song tub eblo go eto! Yehke ngbokambang a nnyam alahb nyi gbo eblo, wo lennge nnyo eme. Owo a bahke nyehne akpohko nya bahke biingi etak ejame, a j'ja. Nyao nya a bahke koko, song ka bo.”*

18

Nne awo ga gbal?

(Mak 9:33-37; Luk 9:46-48)

¹ Ngare nyio nyi abat'toono Jisos ba rehng go ege, owo bo kehm-e bahbe re, “Nne awo ga gbal go ellong ane ba wob go elwo ni Esowo?”

² Jisos kehm lungu mmonse, ba yiimi go bo a mbuksong,

³ kehm bungu re, “Etingitingi, n kp-n tongo re, N tohko tiki yaange jol ana abonse, n nehm tiki li etul bi Esowo.

⁴ Fvfo, nne no l'rede elne, jol ana mmonse noa, ye wo ga gbal go ellong ane ba wob go elwo ni Esowo.

⁵ Nne awohng awohng no l'vvrv elkohn mmonse ana noa tib go egama mbing, á vvrv me.”*

Nsol nyi kpo wahng nne yel abiafem

(Mak 9:42-48; Luk 17:1-2)

⁶ “Ga nob re bo kahn nne egburu eltal go emel, tub-e kak alahb, sehng re á lim mmonse awohng no ma taame tv-m, á gbo yel abiafem.

* 17:27 17:27 1 Kor 9:19 * 18:5 18:5 Mat 10:40

⁷ “Eyu a ane ba njini nyia tib nsol nyi kpo wahng re ane jo lim abiafem! Nsol nyio bahke tiki ba. Eyu a ane ba kp'koko ba a nyi!

⁸ “Ebo eba, afi jolo ekpade eja l'kehm-a limi re wo gbo yel abiafem, kim tub go! Ga nob re wo yel go edi elkpín ebo abehng, tohko jol ano ekpade ajehng, sehng re wo bel abo abal abal, a akpade abal abal, bo ro-a kak go agun nya li go njinanjini.[†]

⁹ “Elmahr ena l'kehm-a limi re wo lim abiafem, luudu ro go! Ga nob re wo bel elmahr anehng, yel edi elkpín, sehng re wo bel amahr abal abal, bo ro-a kak ellulagun.

¹⁰ “Jo kunen ekpu, eji n l'k'daange mmonse awohng awohng no wob go ellong abonse baa. Tibre n kp-n tongo re, Enjel ebo nya li go ejahbetul Esowo kpo nyehn esamahr Nsoo no li go ero ngare anyehng anyehng.[‡]

¹¹ Tibre Mmon no nne ba re, á ba tahre jio ji ma tan.

Elgan ni li bada njoro nyi tane no
(Luk 15:3-7)

¹² “Anv, n kp'tiri renan bade ejum jia? Nne l'bel ejoro atahl alon, anyehng kehm ba tan, nfono ejoro nehm tahm ejoro behko sa go awong, song seb nyio nyi ma tana? ¹³ Á l'seb-e nyehn, etingitingi, n kp-n tongo re, á bahke ga bel eyebatahng go njoro nyio, sehng ejoro behko bi ki tan.

[†] 18:8 18:8 Mat 5:29-30 [‡] 18:10 18:10 Hib 1:14

14 Ano wo fvfo Nso ejahne no li go ero kil sebe re mmonse awohng awohng go ellong abonse baa tan.

Ana nne Esowo bahke jo lim mmonannyeahn l'sood-e

15 “Mmonanne l'lim abiafem bada na, song lennge ebi ji á lim-a no ka-e wahn wahn. Á l'wuk-a, a m-e ko, feere a ne.§

16 Á tohk-a fere wuk, ko ntianse anyehng, tohko jol ano ebal, je a bo, ‘eji ellum anehng anehng l'jo yiimi, ni ntianse ebal, tohko jol ano ni ntianse era bungu no, bum nnyo amehng.’

17 Á tohko fere wuk bo, tooro tong aneb ero. Á tohko fere wuk aneb ero, ko-e na ko ana nne no ki nyi Esowo, tohko jol ano ana nkokatak.*

Nsahm nyi li go ero akake

18 “Etingitingi, n kp-n tongo re, Ejum ajehng ajehng ji n l'gba go njini nyia, bobtob gba go ejahbetul Esowo. Ejum ajehng ajehng ji n l'fanngge go njini nyia, bobtob fanngge go ejahbetul Esowo.†

19 “N kp-n kpeke tong re, Ejum ajehng ajehng ji ane abal ebahne l'kod abo kak ero go njini nyia, Nsoo no li go ero bahke limi ka bo.‡

20 Tibre edi jio ji ane abal, ane ara l'kono go egama mbing, me n li go bo ellong.”

Elgan ni li bada nne no ki tahm ka ntem

§ 18:15 18:15 Luk 17:3; Mat 18:21-22; Gal 6:1 * 18:17 18:17 1 Kor 5:9-13 † 18:18 18:18 Jon 20:23 ‡ 18:19 18:19 Mak 11:24

21 Pita kehm bake goji Jisos, kehm ba bahb-e re, “Nsoo, nkpel ebik nyi mmonannee l'sood-m, m bahke jo tahm ka-e?”

22 Owo Jisos kehm-e faange re, “N kp-a tongo re, Nkpel esehma sang, li nkpel atahltahl atahl ani nkpel ewubu. §

23 “Etul bi Esowo li ana ntul awohng no lungu alokeltum ebe re bo ba toobo akpohko enye ka-e.

24 Á bomo kan eltoobo a alokeltum ebe, owo bo kehm koko nne awohng ba go ege, no bel-e mbong ekpa akpohko atahltahl nkpel atahltahl.

25 Eji nlokeltum noo ki bel ejumjum ji á bahke kake, owo nde kehm tongo re, bo gung-e, fere gungu nkal ewe, gungu abon ebe, a nsol kpee nyi á kpi no, ko akpohko nyao gal mbong.

26 “Owo nlokeltum noo kehm jamme nde alahng, kehm-e gboongo re, ‘Nsoo titi, tohko kpe nong, m bahk-a gale mbong enya kpee.’

27 “Nde nlokeltum noo, ndon kehm-e fili, á kehm-e yake, á song, fere yake mbong nyi á bel-e no tv-e.*

28 “Nlokeltum nonehm o kehm tahme song kpiri nte ewe, no jo tob loko nde nonehm o. Nte ewe noo bel-e mbong a mpon esehma. Á kehm-e tubu ejahm go nkahng, fere tong-e re, ‘Gal-m mbong enyame!’

29 “Nte ewe noo kehm-e jamme alahng, fere jo gboong-e re, ‘Titi, tohko kpe nong, m bahk-a gale mbong enya.’

§ 18:22 18:22 Luk 17:3-4 * 18:27 18:27 Luk 6:36; Ef 4:32

³⁰ “Jol atung we á joom wuungu. Á tahm a ne, song kak-e ngbekobo re á woomo o tete gal-e mbong enye.

³¹ “Eji alokeltum bako nyehne ano, bo kpeem jo bang. Bo kehm tahme, song tooro nsol kpee nyi ma lim, tong nde ebo.

³² “Owo nde kehm-e lungu, kehm-e tongo re, ‘Wo ebi nlokeltum wo. Mbong nyio nyi a bel-m no kpee, me n yake tv-a, tib eji a gboong-m no.

³³ Anv, limm nyi kehn nte ewa jol-a tob fili ndon, ana a fil-m ndona?’

³⁴ “Nde noo, atahng rak-e sehng, owo á kehm tumu nlokeltum noo ngbekobo re bo kak-e erem tete á gal-e mbong enye kpee.†

³⁵ “Ano wo Nsoo no li go ero bahke limi nne awohng awohng ewahne no tohko jo tahm ka mmonannyehn go abiafem nya á lim-e no kpee eltim eltim ene.”‡

19

Ana Jisos tibi bade elbal amale

(Mak 10:1-12)

¹ Eji Jisos ma bung ano mal, á kehm tahme o Galili, feere go Judea, egbuk Jordan jehko.

² Ellong ane gbalee kehm tahme toon-e. Á kehm limi bo, bo nob ayam ebo.

³ Egom Farisi jindiki kehm bake re bo ba gar-e. Bo bahb-e re, “Anv, ntahm enyahre b'bung re, nfem anyehng anyehng l'gbo nne abola nkal ewe, á yehk-e na yehke elbala?”*

† 18:34 18:34 Mat 5:26 ‡ 18:35 18:35 Jems 2:13 * 19:3 19:3
Mat 5:31-32

⁴ Owo Jisos kehm faange re, “Anv á ka tiki lung bade ana Esowo limi ane go mbomannahb re, á limi ‘nnenlum, a nnenkala?’

⁵ fere bung re, ‘Ano wo wahnge nne bahke tahme nde, a nnyehn sa, bo song jol ebo ebo abola nkal ewe. Ane bao na abal bahke fere jol ajehng.’

⁶ Bo nehm kpe jol ane abal, bo bahke fere jol ana ngubjing anyehng. Ejum ji Esowo ma kono edi ajehng, nne k'yaame.”[†]

⁷ Owo Bab Farisi kehm-e bahbe re, “Jen ji wahnge Moses kehm jehke ntahm re, nne jo nyon nwer, ka nkal ewe, kehm-e kame, á song?”

⁸ Jisos kehm faange re, “Moses jehke ntahm re wahn jo yehke akal ebahne ano tib go egahne etahnsi. Go mbomannahb jolem ano.

⁹ Wo, n kp-n tongo re, Nne awohng awohng no l'kam nkal ewe, eji nnenlum nondiki ki noongo a ne, fere ko nkal nondiki, yebli abiafem nyao nya erehbe. Nne no l'ko nnenkal no bo m-e yehke elbal, yebtob lim abiafem nya erehbe.”[‡]

¹⁰ Abat'toono ebe kehm-e tongo re, “Joare ano wo li no bada nnenlum, a nnenkal, ga nob re nne k'ko nkal.”

¹¹ Owo Jisos kehm tongo bo re, “Ellum ni n fi elbunu a, ane kpee sang bahke lennge bo, sehngem ane bao ba Esowo ma lennge ka bo, bo ba bahke lennge bo.

¹² Ane baa, ba bo ma fang bo. Ane baa, ba bo jele na bo ano. Ane baa, ba fange elbo antahng tib esi jio ona ji etul bi Esowo.[§] Nne no l'mal kahn ana lohngo no, nong, á kahn.”

[†] 19:6 19:6 1 Kor 7:10-11 [‡] 19:9 19:9 Luk 16:18 [§] 19:12 19:12
1 Kor 7:7,32-35

*Ana Jisos jo fuulu abon ba nse
(Mak 10:13-16; Luk 18:15-17)*

¹³ Ane bandiki kehm koko abon ba nse, ba goji Jisos re á kunu bo abo, kak ero. Abat'toono Jisos kehm nyame ane bao.

¹⁴ Owo Jisos kehm tongo bo re, “Yaken abon ba nse, bo jo ba ga egame. Kana jo sahde bo! Tibre etul ɓi Esowo li ka ane ba li ana bo.”*

¹⁵ Á kehm kunu bo abo, kehm tahme eje o.

*Njangkun nyi jolo efange nne
(Mak 10:17-31; Luk 18:18-30)*

¹⁶ Nne awohng kehm bake goji Jisos, ba bahb-e re, “Nt'tibi, nnoobo anyi m bahke limi, eji n l'bel elkpín ni li go njinanjini?”†

¹⁷ Owo Jisos kehm-e faange re, “Jen ji wahnge a kehm-m bahbe bade ji kp'nobo? Esowo ntahngtahng bi kp'nobo. L'jol re a kp'sebe re wo bel elkpín, jo bum atahm!”

¹⁸ Owo á kehm-e bahbe re, “Atahm anya?”

Jisos kehm-e faange re, “Ka jo wul nne! Ka jo lim erehbe! Ka jo v ejv! Ka jo yiimi ntianse efahnge!

¹⁹ Kak nso, a nne! Nne ebjing ewa jo kor-a ana ebjing eba!”

²⁰ Owo njangkun nyio kehm-e faange re, “Nyaa kpee n kpo b'bum. Anv, ejum aji kpe li, ji m bahke kpe lim!”

²¹ Jisos kehm-e tongo re, “A l'seb re wo jol go nseenge, song, wo song gungu nsol kpee nyi a kpi

* **19:14 19:14** Mat 18:2-3 † **19:16 19:16** Luk 10:25-28

no, ko akpohko nyao song ka akpak, a bahke bele afang go ejahbetul Esowo, wo feere ba toon-m.”‡

²² Eji njangkun nyio wuku ano, á kehm tahme eje ndon ndon. Tibre á fange sehng.

²³ Jisos kehm bungu tong abat'toono ebe re, “Etingitingi, n kp-n tongo re, Bahke riidi sehng re, efange nne kehm lehke etul bi Esowo.

²⁴ N kp-n kpeke tong re, Re efange nne kehm yele go ejahbetul Esowo, ekamel bahke sehng go mbang a nga.”

²⁵ Abat'toono ebe wuku ano, kehm sahb kp'kpo bo esi, bo kehm bahbe re, “Wo anv, nne awo bahke kehm bele eltahre me?”

²⁶ Jisos kehm seenge bo too, kehm bungu tong bo re, “Jia, nne nehm ma lim. Wo, goji Esowo ejum ajehng ajehng riidem.”

²⁷ Owo Pita kehm bungu re, “Nyehn ana e ma yake nsol kpee kp-a toono. Ejum aji e bahke bele?”

²⁸ Jisos kehm tongo bo re, “Etingitingi, n kp-n tongo re, Ngare nyi Mmon no nne bahke jehke go eti etul ji ellub ene, ngare nyio nyi nsol kpee ma yaange, jol nyi nfenfe, owo wahn jia ji jo toon-m m bahke tob ji go ewubu a nti etul ebal, fere lam ewubu et'tohngo ebbal bi Israel.§

²⁹ Nne awohng awohng no l'yake etahk eje, yake abonanyehn, yake nde, yake nnyehn, yake abon ebe, fere yake egbe eje tib go esi mbing enyame, á bahke bele budu nkpel atahl alon, fere bel elkpin ni li go njinanjini.

‡ 19:21 19:21 Luk 12:33-34 § 19:28 19:28 Luk 22:30; 1 Kor 6:2-3

³⁰ Ane gbalee ba li agbokombang bahke fere jol akahlenjahm. Akahlenjahm bahke fere jol agbokombang.*

20

Elgan ni li bade ane ba bo lake bo egbe

¹ “Etul bi Esowo li ana nfono egbe no tahme no efungfu atv atv, song lak ane egbe eje.*

² Eji á ma lam are ane bao re á bahke kake bo nne awohng awohng nsiring elon elon efung, owo á kehm tubu bo tv go ege egbe re bo song lim eltum.

³ “Eji ma rehng nkaranka esehmwubu, á kehm jeke are, song nyehn ane bamongo yim no mbol mbol, kil ejumjum lim.

⁴ Owo á kehm tongo bo re, ‘Wahn tob songen go egame egbe, wahn song lim eltum. M bahk-n kpiki nob nob ana bo kpo kono elkpiki.’

⁵ “Owo bo kehm tahme.

“Nfono egbe noo kehm kpe je ngare efin, fere kpe je go nkaranka era nyi elgung, tob lim ano jang jang.

⁶ Eji ma rehng nkaranka elon nyi elgung, á kehm kpe je, song nyehn ane bako yim no mbol mbol, kil ejumjum lim. Owo á kehm tongo bo re, ‘Jen ji wahnge n yim na yim ana efung kohro kohro, n kil ejumjum lim?’

⁷ “Owo bo kehm-e faange re, ‘Nnene limm, no ma-r lak eltum.’

* **19:30 19:30** Mat 20:16 * **20:1 20:1** Mat 9:37

“Á kehm tongo bo re, ‘Tob songen fvfo go egame egbe, wahn song lim eltum. M bahk-n kpiki nob nob ana bo kpo kono elkpiki.’

⁸ “Eji elgung ba no, nfono egbe noo kehm tongo ntubesi a nlokeltum ewe re, ‘Lung aneb eltum ebame, bo ba, wo kpi bo. Gbo mbang bom goji ane ba n gohro ko bo ba, wo kehm gohro kpi ane ba n gbo mbang ko bo.’

⁹ “Ane ba bomo eltum nkaranka elon nyi elgung kehm bake, ba ko nsiring elon elon.

¹⁰ Owo ane ba, á gbo mbang lak bo kehm bake. Bo jo tiri re, bo bahke koko akpohko sehng ane bao. Bo fvfo tob ko nsiring elon elon.

¹¹ Eji bo ma ko ano, owo bo kehm kehme elmemme tob nfono egbe noo re,

¹² ‘Ane baa ba a gohro ko bo ba, bo limi eltum awa anyehng nya nya, wobkpi bo jang jang ana a kpi-r no, wahr ji ma nyehn erem go nfuba njul nyia efung kohro kohro.’

¹³ “Owo nfono egbe kehm faange nne awohng re, ‘Mbi, wa n nehmem na. Nsiring elon sang wuku e lame area?

¹⁴ Ko akpohko enya, wo song a nya! Anv, l'kor-m re me n ka ane ba gohro ba ekahlenjahm ana n ka-a no,

¹⁵ anv, akpohko enyame sang n kp'koko lim ana kor-m noa? Anv, a kp'memme tib eji m ma wehr aboa?’ ”†

¹⁶ Jisos kehm gohro bung re, “Akahlenjahm bahke gboko mbang, agbokombang fere kahle

† 20:15 20:15 Rom 9:16

njahm.‡ Ane gbalee ba bo ma lung bo, wo, abon amohk ane ntiil ba bo ma jak.”§

*Ana Jisos gohro bung bade elkv ene
(Mak 10:32-34; Luk 18:31-34)*

¹⁷ Eji Jisos jo tahm go Jeusalem, ngare nyi bo li go mbang, á kehm koko abat'toono ebe, ewubu ane abal, tahm a bo go nkpohko anyehng, song tong bo re,

¹⁸ “Nyehnen, anv, e kp'tahme go Jeusalem. Mmon no nne, bo bahk-e yake, kak atubesi abalimajom, a at'tibi ba atahm go ebo. Bo bahke lame elam ji bo bahk-e wulu,

¹⁹ fere yak-e, kak ane baka baka go ebo, ba bahk-e nyoko, fere dv-e, kum-e go ekros. L'kang nfung era, á nyahme go elkv.”

*Ejum ji nnyehn Bab Jon gboongo no
(Mak 10:35-45)*

²⁰ Nkal a Sibidi kehm koko abon ebe Jon, a Jems, ba a bo goji Jisos, kehm ba gong go ege alata, kehm-e gboongo re, á lub lim ejum ka-e.

²¹ Jisos kehm-e bahbe re, “Jen ji a kp'sebe me?”

Á kehm-e faange re, “Ka abon ebame baa na abal nsahm, eji noko l'ji go ega ejang eboblum, noko go ega ejang ebobkal ngare nyi a ma jol ntul.”

²² Owo Jisos kehm faange re, “Ní nehme kahn ji n kp'b'bahb. Anv, m bahke ma wo go nkob nyi n yahke ba elwoka?”*

Bo kehm-e faange re, “Ee, e bahke ma wo.”†

‡ 20:16 20:16 Rom 11:25-26 § 20:16 20:16 Rom 10:21 * 20:22
20:22 Mat 26:39; Luk 12:50 † 20:22 20:22 Luk 22:33

²³ Jisos kehm tongo bo re, “Etingitingi, rí bahke lohko wo go egama nkob.‡ Me, nsahm n kpimm, nyi m bahke yehke ane, noko ji go egame ejang eboblum, noko ji go egame ejang ebobkal. Adi nyao li ka ane ba wahnge Nsoo toobo bum.”

²⁴ Abat'toono bako na ewubu wuku kan ano, atahng kehm rake bo tob Jon, a Jems.

²⁵ Owo Jisos kehm lungu bo tv elne, kehm bungu re, “N kp'kahne re, atubesi ba njini nyia kpi nsahm nyi bo kpo fili ane. Aj'jok ane kpo tob fili ane.

²⁶ Wahn, kana jo lim ano go egahne ellong. Nne awohng awohng ewahne no l'seb re á jol nj'joka nne, á bahke jolo na nlokeltum ewahne.

²⁷ Nne awohng awohng ewahne no l'seb re á jol ntubesi, á bahke fere jol na nlokeltum ewahne,

²⁸ ana Mmon no nne ki ba re bo lok-e, á ba re á ba loko, fere ka elkpin ene, fak ane gbalee yake.”§

*Ana Jisos limi awakamahr abal, bo nyehn
(Mak 10:46-52; Luk 18:35-43)*

²⁹ Eji bo jo tahm go Jeriko asongo, ellong ane gbalee kehm tahme toono Jisos.

³⁰ Awakamahr na abal ji o nkpe a mbang. Eji bo wuku re, Jisos kp'bake elsehng, bo kehm kehme elrabe re, “Mmon no Devid, nong, wahr fil-a ndon!”

³¹ Ellong ane bao kehm sahde bo re bo rahke ewok. Bo jo kpe nyenng na rabe re, “Mmon no Devid, nong, wahr fil-a ndon, nsoo!”

‡ 20:23 20:23 Elt 12:2; Ell 1:9 § 20:28 20:28 Fil 2:7-8; 1 Tim 2:6

³² Jisos kehm yiimi, lung bo re bo ba. Á kehm bahbe bo re, “N’ kp’sebe re me n lim jen ka-n?”

³³ Owo bo kehm-e faange re, “Nsoo, lub lenng-r amahr enyahre!”

³⁴ Owo Jisos ndon kehm-e fili. Á kehm song kooro bo abo go amahr, bo kehm soro nyehn tvtv, soro tahm toon-e.

21

*Ana Jisos yele go Jeusalem, a egburu ellub
(Mak 11:1-11; Luk 19:28-40; Jon 12:12-19)*

¹ Eji bo ma kabbe Jeusalem, bo kehm ba rehng go Betfage ji jolo go nnahb ewong ji bo kpo lung re Oliv. Owo Jisos kehm yehke abat’toono ebe, ane na abal,

² kehm tongo bo re, “Songen ejahbe ji li-n o mbuksong. Owo m’ bahke nyehne mbvankang nyi bo kahn-e go eti, a mmon ewe. Fanngen bo, wahn ko bo ba ka-m.*

³ Nne awohng awohng no l’bahb-n ejum bade ebvnkang bio, tongen ye re, ‘Nsoo kp’sebe bo,’ nfono ebvnkang bio bahke yake bo elwaare ka.”

⁴ Nsol nyia limi, eji l’lohko jol go etingitingi ana nnyehnamahr Esowo bungu no re,

⁵ “Tong Sayon re,
Nyehnen,
ntul ewahne kp’bake go egahne.

Á li soom,
á kun go mbvankang.†

Á kun go mmon a nnyam no kpo sol nsol.”

* 21:2 21:2 Mak 14:13 † 21:5 21:5 Mat 11:29

⁶ Abat'toono ebe kehm tahme, song lim ana Jisos tongo bo.

⁷ Bo kehm koko mbvankang nyio, a mmon ba a bo, yehke awobo ebo, kunu go bo a njahm, Jisos kehm wahre, kuumu mmon a mbvankang noo.

⁸ Ellong ane gbalee kehm yehke awobo ebo, yal go mbang. Ane bandiki song ja amang, jo ba yal go mbang.

⁹ Ellong ane ba gbo Jisos mbang, a ellong ane ba jo toon-e njahm kehm kehme elrabe re, "Tehken mmon no Devid! Elfuulu li ka nne no kp'bake go mbing nyi Jehova. Tehken Esowo bi li go ero!"

¹⁰ Eji Jisos yele go nla Jeusalem, edi kehm kehme elvvr na vvr. Ane kehm kehme elbahbe re, "Nne awo ona?"

¹¹ Owo ellong ane bao kehm jo bung re, "Jisos wo ana, ji li nnyehnamahr. Á lohng go Nasaret nyi Galili."

*Ana Jisos sehng song yange go etahk Esowo
(Mak 11:15-19; Luk 19:45-48; Jon 2:13-22)*

¹² Jisos kehm yange go etahk Esowo, song kam ane ba jo gungu, a ane ba jo gunu, fere gbul akp'kuru nya abayaangakpohko tuubu go, a nti nyi abagungumbehl.

¹³ Á kehm tongo bo re, "Bo nyono go nwer Esowo re, 'Etahk ejame, bo bahke jo lungre, etahk ero akake.' Wahn ebfere rod, bum ana ebehre awajv."‡

¹⁴ Awakamahr ane, a abanne kehm bake, ba kpir-e go etahk Esowo jio. Á lim bo, bo nob.

‡ 21:13 21:13 Rom 2:22

¹⁵ Eji atubesi abalimajom, a at'tibi ba atahm nyehn akpokosi nya á limi no, fere wuk abonse kp'rabe go etahk Esowo jio re, "Tehken mmon no Devid!"§ atahng kehm rake bo.

¹⁶ Owo bo kehm tongo Jisos re, "Wobwuk ana bo kp'raba?"

Jisos kehm faange bo re, "Ee, n kp'wuku. Wo, n ka tiki lung edi nwer Esowo ji bungu re, " 'Esowo ebko anyo abonse, a nya abonbili, lim, eji l'jol ejum eltehke ka yefono antahnga?' "

¹⁷ Jisos kehm tahme bo sa, song rehng go Betani, fere kang o.

*Ana Jisos nyehne amahr bade efig
(Mak 11:12-14,20-24)*

¹⁸ Efungfu atv atv eji Jisos feere asongo go Jeusalem, njal kehm-e yame.

¹⁹ Á kehm nyehne eti ji bo kpo lung re efig go nkpe a mbang. Á jeere kan kohlo o me, á nyehnem nkab anyehng anyehng, sehngem anyane nya nya á nyehne no.* Owo á kehm tongo eti jio re, "A nehm kpe tiki kab akab go njinanjini." Tvtv ona eti jio kehm soro kpo.

²⁰ Eji abat'toono ebe nyehne ano, kehm kpoko bo esi. Bo kehm bungu re, "Jen ji wahnge eti jia ma tahr kp'kpo elwaare elwaare anae?"

²¹ Owo Jisos kehm faange bo re, "Etingitingi, n kp-n tongo re, N l'taame, k'jo faabe, n bahke jo lim ana m ma lim eti jia, jol s'sehnge na ana.† N li

§ 21:15 21:15 Mat 1:1 * 21:19 21:19 Luk 13:6-9 † 21:21 21:21 Jon 14:12

ma tong ewong jia re, 'Mehl, song yel aya!' Bahke lohko lim ano.

²² Ejum ajehng ajehng ji n l'bahb go egahne ero bi n kp'kake, n l'taame, m bahke bele."

*Ana bo bahbe Jisos bada nsahm enye
(Mak 11:27-33; Luk 20:1-8)*

²³ Jisos kehm feere go etahk Esowo.

Eji á jo tib, atubesi abalimajom, a anebkul nham kehm bake, ba kpir-e, kehm-e bahbe re, "Nsahm anyi a kpi no, nyi wahnge a kpo lim nsol ana nyia? Nne awo ka-a nsahm ana nyio?"[‡]

²⁴ Jisos kehm faange bo re, "M bahk-n tob bahb mbahbe fvfo. N l'faang-m, n kehm-n tongo bada nsahm nyi n kpi no, nyi wahnge n kpo lim nsol ana nyia.

²⁵ Anv, nsahm nyi Jon jo wohngo ane alahb lohng go ejahbetul Esowo baa, afi lohng goji ane?"

Bo kehm kehme eltoobo atemtem re, "E l'bung re, 'Nsahm nyi Jon lohng go ejahbetul Esowo', á bahk-r bahbe re, 'Jen ji wahnge n ki taame tv Jon?"

²⁶ E l'fere bung re, 'Nsahm enye lohng goji ane', ma ane bahk-r limi ejum nji. Tibre e kp'fahle bo, tib eji bo kpee jo bum Jon ana nnyehnamahr."§

²⁷ Owo bo kehm faange Jisos re, "Wahr nehme kahn."

Jisos kehm tongo bo re, "Fvfo, wahn n nehmtong bada nsahm nyi n kpi no, nyi n kpo ko, lim nsol nyia.

Elgan ni li bade abon na abal

[‡] 21:23 21:23 Jon 2:18 § 21:26 21:26 Mat 14:5

28 “Anv ń kp'tiri renan bade elgan nia? Nne jolo go, no bele abon na abal. Owo á kehm jeke goji ngbokambang a mmon, kehm song tong-e re, ‘Mmon ewame, song lela go egame egbe, wo song lim eltum.’

29 “Mmon noo kehm faange re, ‘N nehm je.’ Ji kan mmokidi, á kehm yaange ntir atahng enye, fere tahm egbe nde.

30 “Owo nde kehm kpe je, song kpiri mmon noko, kehm-e tob tong ano fvfo. Á kehm taame re, ‘Ee nsoo.’ Jol egbe á tikem je.*

31 “Nne awo go abon abal bao limi ji nde tong-e re á lim?” Bo kehm-e faange re, “Ngbokambang a mmon wo.”

Owo Jisos kehm tongo bo re, “Etingitingi, n kp-n tongo re, Abakokatak, a abajenas'sa ba bahke song yel go ejahbetul Esowo,† wahn sa elatahk, jo seenge bo.

32 Tibre Jon ji nwohngalahb ba, ba tib-n mbang nyi nno, nyi elsehnge, ń tikem taame tv-e. Abakokatak, a abajenas'sa ba taame no tv-e.‡ Jol eji ń nyehne nyehn ano, ń tikem yaange ntir atahng enyahne, fere taame tv-e.”

Elgan ni li bade abayaame etahngga
(Mak 12:1-12; Luk 20:9-19)

33 Jisos kehm tongo bo re, “Wuken elgan nehko! Nne jolo go, no bahme avain, fere kak ega sen-nge.§ Á kehm rahme elbing ni bo jo kak akab nti, fere jo kaame akab nti nyao tv elbing nio, alahb jo

* **21:30 21:30** Mat 7:21 † **21:31 21:31** Luk 18:13-14 ‡ **21:32 21:32** Luk 7:29 § **21:33 21:33** Ef 2:14

lohng. Á si enyong, kak ane ba jo baabe edi jio,*
 kehm yaame abahngbe edi jio, toono eje tahm
 ejahbe jehko ji li fee.†

34 “Eji ngare nyi bo kpo bong akab nti nyao ma
 kabbe, owo á kehm tumu alokeltum ebe tv ane ba
 á yaame bo etahngga eje, eji bo l'song ko akab nti
 enye, ba ka-e.

35 Abayaame etahngga kehm bobo alokeltum
 ebe. Noko, bo dv-e, noko, bo wul-e, fere tuubu
 noko atal, á kpo.

36 “Owo nfono etahngga kehm kpe tum alokel-
 tum bako gbalee, sehngbe ba á gbo mbang tum.
 Abayaame etahngga tob limi bo jang jang ana bo
 limi ane bako.

37 “Es'kohro, á gohro tum mmon ewe tv bo. Á
 bungu re, ‘Bo bahke kake mmon ewame.’

38 “Eji abayaame etahngga bao nyehne mmon
 ewe noo kp'bake, bo kehm bungu atemtem re, ‘Ye
 wo li nlehkkelkv, nong, wahr song wulen ye, eji
 etahngga jia l'fere jol j'jahre.‡

39 Bo kehm-e bobo, ro njahm etahngga nyehko,
 fere song wul-e.

40 Anv, nfono etahngga l'ba, á bahke limi
 abayaame etahngga bao renan?”

41 Bo kehm-e faange re, “Á bahke wulu abi ane
 bao, bo kpo esabsab elkv, fere yaame ane bako
 etahngga jio, ba bahke jo ka-e akab nti nyao go
 ngare nyi nno.”

42 Owo Jisow kehm tongo bo re, “N ka tiki lung a
 lung edi nwer Esowo jia re,

* 21:33 21:33 Hib 13:17 † 21:33 21:33 Mat 25:14 ‡ 21:38 21:38
 Mat 27:18

“ ‘Eltal ni asehketahk tene no,
ni ni ma fere jol nnaahb ekahma?§
Jehova limi jia ji li nkpokosi go egahra ntim.’

⁴³ “Owo wahnge n kp-n tongo re, Esowo bahk-n
taare etul ebe, faake a bi, ka ane ba bahk-e kake
akab nti go ngare nyi nno.*

⁴⁴ “Nne no l'fooro gbo eltal nio, á bahke banne.
Wo, nne no eltal nio l'gbo nyed-e á bahke rere na
rere kpee.”

⁴⁵ Atubesi abalimajom, a Bab Farisi wuku kan
ngaane enye, bo kehm soro kahn tvtv re, á jo
bungu bada bo.

⁴⁶ Bo kehm gare ana bo bahk-e bobo. Bo jo fahle
ellong ane ba jo bum Jisos ana nnyehnamahr.

22

Elgan ni li bade elkak elbal

(Luk 14:15-24)

¹ Jisos kehm kpe tub bo elgan nehko re,

² “Etul bi Esowo li ana ntul no toobo ebjing bi
elkak elbal, ni mmon ewe yahke ko nkal.*

³ Á kehm tumu alokeltum ebe re, bo song tong
ane ba á tiingi bo elkak re bo ba.† Korem bo
elbake.

⁴ Á kehm kpe yehke alokeltum bako, kehm
tongo bo re, ‘Songen, wahn song tong ane ba n
tiingi bo elkak re, Me n toobo ejum ajehng ajehng
kpee bum. Bobwul efong ebame, a atohkondi nya
m ma le bo, bo ma jok. Baan go elkak elbal!’

§ 21:42 21:42 1 Pit 2:6-8 * 21:43 21:43 1 Pit 2:9-10 * 22:2 22:2
Jon 3:29 † 22:3 22:3 Ell 19:7

⁵ “Ane ba bo tiingi bo elkak, elkak nio lubem bo. Bo tahme na go bo alimi nsol. Noko tahme go ege egbe, noko tahm go ege a nju are.

⁶ Egom ane bako bobo alokeltum ntul noo, nohk bo, fere wul bo.

⁷ “Ntul, atahng rak-e sehng. Á kehm tumu nsoja enye, bo song wul awulane bao, fere jahm ejahbe ebo fi.‡

⁸ Owo á kehm tongo alokeltum ebe re, ‘Nsol elkak kpee, me n toobo bum. Ane ba n tiingi bo, bo kpeem fuumu.

⁹ Songen go ayaame mbang! Nne awohng awohng no n l'nyehn-e, tongen ye, á ba go elkak elbal.’

¹⁰ “Alokeltum bao kehm tahme, jo yanng. Nne awohng awohng no bo nyehn-e no, l'kor-e, bo ko-e tahm a ne go elkak. Ane bandiki jolo abi ane, § bandiki jol anoobo ane.* Ekp'kpa elkak nio kehm ruru ane ane.

¹¹ “Owo ntul kehm tahme re á song nyehn ane ba jo li nsol. Á kehm nyehne nne no kake ewobo ji ki fuumu elkak elbal nio.

¹² Ntul kehm-e bahbe re, ‘Mbi, a limi renan, kehm yele a, k'kak ewobo ji fuumu elkak nia?’†

“Nne noo belle na belle eje.

¹³ “Owo ntul kehm tongo alokeltum ebe re, ‘Boben ye, wahn gba-e alehke go abo, a akpade akpade, fere ro-e tv go elatahk, edi ejanng jio ji ane kpo woomo, jo ling, fere jo kono amahn go esi.’

‡ 22:7 22:7 Mat 24:2 § 22:10 22:10 Luk 19:1-10 * 22:10 22:10
Elt 10:1-2 † 22:12 22:12 Kol 3:12; Ell 19:8

14 “Tibre ane gbalee ba bo tiingi no. Abon amohk ane abik abik ba bo ma jak.”

Bade etak atahbe

(Mak 12:13-17; Luk 20:20-26)

15 Bab Farisi kehm tahme, song toobo ana bo bahk-e bobo go ege alum nnyo.

16 Bo kehm tumu abat'toono ebo, a aneb ntul a Herod tv goji Jisos. Bo kehm song bahb-e re, “Nt'tibi, e kp'kahne re, wo etingi nne ji. A kpo tib mbang nyi Esowo go etingitingi. A kpehme rang nnene. Jol esamahr ane, a kpehme be.

17 Tong-r ana a kp'tiri bade ejum jia. N'nob re wahr jo tahb etak ka ntul a Roma, afi nobem?”

18 Jisos k'kahn ebi ntir atahng ebo, owo á kehm faange re, “Wahn aneb alum abal abal ba! Jen ji wahnge n kp-m gare?

19 Tib-m wahn akpohko nya m bahke koko tahb etak.” Bo kehm koko ba a nya.

20 Jisos kehm bahbe bo re, “Esi jia ji nyehne ji? Mbing nyia nyi nyehne nyi?”

21 Bo kehm faange re, “Esi jia ji ntul ji. Mbing nyia nyi ntul nyi.”

Owo Jisos kehm tongo bo re, “Kaan ntul ji li ka ntul,‡ wahn ka Esowo ji li ka Esowo.”§

22 Eji bo wuku ano, kehm kpoko bo esi. Bo kehm-e yaame sa, tahm ebo.

Bade elnyahme go elkv

(Mak 12:18-27; Luk 20:27-40)

‡ 22:21 22:21 Rom 13:1-7; Luk 23:2 § 22:21 22:21 1 Pit 2:17

²³ Efung b'nehm ona, egom Sadusi jindiki kehm bake ba kpiri Jisos. Bo ba kpo tib re, elnyahme go elkv limm.* Owo bo kehm tongo Jisos re,

²⁴ “Nt'tibi, Moses bungu re, ‘Nne l'kpo, eji á ki jel abon, mmonannyeahn nkve ko nnenkal noo, eji á l'jel abon ka mmonannyeahn no ma kpo.’

²⁵ “Abonanyeahn na asehma ba jolo a nahre. Ngbokambang ko nkal, mmon awohng awohng á jelem, á kehm kpoko, nkal ewe sa.

²⁶ Ano wo tob lim etoono mmonannyeahn, a mmonannyeahn noko no toono noo, a erik abonanyeahn bako kpee.

²⁷ Es'kohro, nnenkal noo tob kpo.

²⁸ Any, efung bi ane l'nyahme go elkv, nne awo á bahke jolo nkal ewe? Tibre bo ane kpee ko-e ana nkal abo.”

²⁹ Owo Jisos kehm faange bo re, “N kpo soodo, tibre n nehme kahn nwer Esowo, a nsahm nyi Esowo.

³⁰ Ngare nyi ane ma nyahme go elkv, bo bahke jolo ana babenjel. Aneblum nehm kpe jo ko akal. Anebkak nehm kpe jo bal alum.†

³¹ Bade elnyahme ngubjing go elkv, n ka lung alung ana Esowo tong-n no re,

³² ‘Me wo li Esowo bi Ebraham,‡ a bi Aisik, a bi Jakob.’ Jia lohngo re, Ye li Esowo bio bi ane ba li go elkpín, bi akve sang.”

³³ Eji ellong ane bao wuku ana á jo tib, kpo bo esi sehng.

* **22:23 22:23** Elt 23:8 † **22:30 22:30** 1 Kor 15:44 ‡ **22:32 22:32**
Luk 16:22

Ntahm nyi ga gbal

(Mak 12:28-34; Luk 10:25-28)

³⁴ Eji Bab Farisi wuku re, Jisos ebga aneb Sadusi, bobbelle, bo kehm song kono edi ajehng.

³⁵ Nne awohng go bo ellong no jolo nt'tibi no atahm kehm bake ba bahb Jisos mbahbe, jo gar-e. Á bahb-e re,

³⁶ “Nt'tibi, ntahm anyi ga gbal kpee go egahre atahm?”

³⁷ Owo Jisos kehm-e faange re, “ ‘Esowo, ntul ewa bahke jo kor-a eltim eltim ena, etohko etohko eja, a ntir a ntir enya.’

³⁸ A wo li ngbokambang a ntahm nyi ga gbal.

³⁹ Etoono ntahm tob li na li ana nyio o, nyi li re, ‘Nne ebjing ewa jo kor-a ana ebjing eba.’

⁴⁰ Atahm nya Moses kpee, a eltibi ni abanyehnamahr tohk ntahm ebal nya.”§

Mbahbe nyi li bada Mesaya

(Mak 12:35-37; Luk 20:41-44)

⁴¹ Ngare nyi Bab Farisi ba kono edi ajehng, Jisos kehm bahbe bo mbahbe re,

⁴² “Anv, í kpo tir renan bada Mesaya? Ye mmon a nyehne wo?”

Owo bo kehm-e faange re, “Mmon a Devid wo.”

⁴³ Jisos kehm tongo bo re, “Jen ji wahnge Devid lungu Mesaya re, ‘Ntul ewame’, eji Etingi Etohko mehl-e no, á bungu re,

⁴⁴ “ ‘Jehova tongo ntul ewame re,

Ji go egame ejang eboblum

tete me n lim anebekv eba etikunakpade eja.’

§ 22:40 22:40 Rom 13:10; Gal 5:14; 1 Jon 4:20-21

⁴⁵ “Yefono Devid jo lung-e re, ‘Ntul ewame’, bahke limi renan, ntul noo kehm fere jol mmon ewe?”*

⁴⁶ Nnene jolem, no male elfaange Jisos ellum anehng anehng. Bomo efung bio asongo nnene kpeem jo sahb, bahb-e mbahbe.

23

Ana Jisos jo rehke ane bade at'tibi ba atahm, a Bab Farisi

(Mak 12:38-39; Luk 11:43,46; 20:45-46)

¹ Jisos kehm tongo ellong ane bao, a abat'toono ebe re,

² “At'tibi ba atahm, a Bab Farisi ebko nji nyi Moses.

³ Jo bumen ejum ajehng ajehng ji bo l'tong-n, wahn fere jo lim. Kana jo toono eljini ni bo! Tibre bo kpehme lim ji bo kpo bung.

⁴ “Bo kpo tuuru alublub nsol, nya kpo riidi go elsolo, rod si ane. Jol bofono antahng bo kpehme gare elmehle.

⁵ Bo kpo lim ejum ajehng ajehng, eji ane l'jo nyehn bo. Nyehnen ana awer nya bo kpo kahn go bo abuk, a abo abo kp'kpange, nya bo nyono adi nwer Esowo! Nyehnen ana asohk nya bo tohko go as'sili akpawobo ebo kp'labe!

⁶ Go elkak, kpo kor bo re, bo ji adi nya fuumu re aj'jok ane ji.* Go ekp'kpa ero, kpo kor bo re, bo ji mbuksong.

⁷ Go are, kpo kor bo re, ane jo gong kak bo nnyo, fere jo lung bo re at'tibi.

* 22:45 22:45 Mat 1:1; Ell 5:5 * 23:6 23:6 Luk 14:7

⁸ “Nong, ane ki-n jo lung re at'tibi. Tibre nne awohng wo wo li nt'tibi ewahne. Wahn kpee abonanyehn ba.

⁹ Kana jo lung nne awohng awohng go njini nyia re Nso ejahne. Tibre nne awohng wo wo li Nso ejahne, ye jio ji li go ejahbetul.

¹⁰ Nong, ane ki-n jo lung re atubesi. Tibre nne awohng wo wo li ntubesi ewahne, ye ji li Mesaya.

¹¹ “Nne no l'ga gbal go egahne ellong, ye wo bahke jolo nlokeltum ewahne.

¹² Nne awohng awohng no l'mehl elne wahre, bo bahk-e rede na. Nne awohng awohng no l'rede elne, bo bahk-e mehle wahre.†

Ana Jisos jo wa Bab Farisi eyuu

(Mak 12:40; Luk 11:39-52; 13:34-35; 20:47)

¹³ “Eyuu a nahne, wahn at'tibi ba atahm, a Farisis! Wahn aneb alum abal abal ba! N kpo bam ejahbetul Esowo tv ane.‡ N kpehme taame, yake ane ba kp'gare re bo yel. Wahnfono antahng nehm yel.

¹⁴ “Eyuu a nahne, wahn at'tibi ba atahm, a Farisis! Wahn aneb alum abal abal ba! N kpo nehm akalebun, taare ntahk ebo. Eyaame jehko, n kpo kak alaabe aro, jo tib elnahne. Tib esi jio ji bahke wahnge elam ejahne sahb gb'gbal!

¹⁵ “Eyuu a nahne, wahn at'tibi ba atahm, a Farisis! Wahn aneb alum abal abal ba! N kpo yannge go njini kpee, jo siiri agburu aya, eji n l'lub were nne awohng, á fere yel-n. N l'ting nne,

† 23:12 23:12 Luk 18:14; 1 Pit 5:5 ‡ 23:13 23:13 Jon 9:22

ń rod-e, lim mmon ellulagun no sahb s'sab sehng
wahnfono antahng.

¹⁶ “Eyuu a nahne, wahn awakamahr ane ba
kpo tib ane mbang! ń kpo tib re, ‘Nne awohng
awohng no l'tir etahk Esowo, ejumjum limm. Wo,
nne no l'fere tir agul nya li go etahk Esowo, á
bahke tiki lim, nehm tiki kane.’

¹⁷ Wahn agboolo awakamahr ba! Anv, ejum aji
ga gbal, agul, afi etahk Esowo ji wahng agul nyao
li saang?

¹⁸ ń kpo kpe tib re, ‘Nne awohng awohng no l'tir
edi njom alimi, ejumjum limm. Wo, nne no l'fere
tir ejum njom ji kun edi njom alimi jio, á bahke
tiki lim, nehm kane.’

¹⁹ “Wahn agboolo awakamahr ba! Anv, ejum aji
ga gbal, ejum njom, afi edi njom alimi ji wahng
ejum njom li saang?

²⁰ Fvfo, nne l'tir edi njom alimi, yebtir edi njom
alimi jio, a nsol njom kpee nyi kun o.

²¹ Nne no l'tir etahk Esowo, yebtir etahk Esowo,
a Esowo bi lene o.

²² Nne no l'tir ejahbetul Esowo, yebtir eti etul ji
Esowo, a nne no jehk o. §

²³ “Eyuu a nahne, wahn at'tibi ba atahm, a
Farisis! Wahn aneb alum abal abal ba! ń kpo ka
eltahme go abon asahkesahke nsol ana nkambe,
nfehne, a abehne, fere gbake alahmlahm nsol ana
elam,* ndon,† a eltaame,‡ bum go nkpe. Limen
nsol ebal ebal, kana gbake ajehng bum go nkpe!

§ 23:22 23:22 Mat 5:34 * 23:23 23:23 Hib 9:27 † 23:23 23:23
Luk 1:78; Jems 2:13 ‡ 23:23 23:23 Hib 11:6

24 “Wahn awakamahr ane ba kpo tib ane mbang ba! N kpo yehke nnyamnyame go egahne alahb elwoko, fere mele ekamel!

25 “Eyuu a nahne, wahn at'tibi ba atahm, a Farisis! Wahn aneb alum abal abal ba! Tibre n kpo ru njahm a nkob, a njahm ekpingi. Go atahng, nsol ejv ebrur, a nsol nyi n kpo lahm ane bako etong. §

26 Wo nwakamahr a nne a Farisi wo! Gbo mbang ru atahng nkob, a atahng ekpingi, eji njahm l'tob bar.

27 “Eyuu a nahne, wahn at'tibi ba atahm, a Farisis! Wahn li ana alahm nya bo ma taame efem go njahm elatahk, ma nob. Go atahng, akahb akvne nya ma rur, a nsol eltehb.

28 Ana wo fvfo n tob li. Go njahm elatahk n kpo jol nne awohng awohng, are n li nob nob. Go atahng, ab'bi nya ma rur, a afahnge afahnge.*

29 “Eyuu a nahne, wahn at'tibi ba atahm, a Farisis! Wahn aneb alum abal abal ba! Wahn ba kake alahm nya abanyehnamahr Esowo, fere liibi alahm nya atingitingi ane,

30 fere jo bung re, 'Li re e jolo ngare nyi babnso ejahre, kehn, e jolem limi ana bo limi no, fere wul abanyehnamahr Esowo.'

31 Wahnfono antahng ebyiimi ntianse re wahn ba li abon ba ane ba wulu abanyehnamahr.†

32 Wahn ebba soro asi, kp'gohro lim ji babnso ejahne limi no sa.

§ 23:25 23:25 Mak 7:4 * 23:28 23:28 Ell 3:1 † 23:31 23:31 Elt 7:52,56

³³ “Wahn enyo bia, wahn abon akumbad baa, m̃ bahke ma for renan go elam ji bo bahk-n lame, kim ebi ka-n, fere kak-n go ellulagun?

³⁴ Owo wahng ka m bahke tumu abanyehnamahr tv-n, fere tum akahnkahn ane, fere tum at'tibi. Egom jindiki, m̃ bahke wulu bo, jindiki, ñ kum bo lake go akros, jindiki, m̃ bahke jo dv bo go egahna ntahk ero, fere jo kam bo yannge ajahbe ajahbe ajahbe,

³⁵ eji ñ l'li ebi tib go atingitingi ane ba bo wulu bo go njini kpee, bomo goji Ebel ji jolo etingi nne tete ba rehng goji Sekaraya ji jolo mmon a Barakaya, ye ji ñ wul-e no go elka elka ni etahk Esowo, a edi njom alimi.

³⁶ “Etingitingi, n kp-n tongo re, Ane ba li anv bahke lehke ebi tib go nsol nyio kpee.

³⁷ “O Jeusalem, Jeusalem! Wahn ba kp'wulu abanyehnamahr Esowo, fere tuubu ane ba Esowo tumu bo tv-n atal. Nkpel tvv n jo gare re me n lung-n tv elname, ana nkok kpo lung abon ebe tv elne, fere walle bo go ege akpungkpung. Wahn joom kor elbake.

³⁸ “Etahk ejahne bahke sake nehme nehme.

³⁹ “N kp-n tongo re, Bomo anv asongo, me n nehm kpe nyehn, tete ngare nyi m̃ bahke bungu re, ‘Elfuulu li ka nne no kp'bake go mbing nyi Ntul!’ ”

24

*Ana bo bahke ranng e tahk Esowo
(Mak 13:1-2; Luk 21:5-6)*

¹ Jisos kehm lohngo go etahk Esowo jio tahm. Abat'toono ebe kehm bake, ba tib-e ntahk nyi bo si go nlaaga nyi etahk Esowo jolo no.

² Owo Jisos kehm faange bo re, "Nyehnen ntahk nyia a kpee! Etingitingi, n kp-n tongo re, Jol eltal anehng anehng limm, ni bahke kpe kuumu a ntem.* Bo bahke wake kpee, wohng ndi."

Erem, a afemfem

(Mak 13:3-13; Luk 21:7-19)

³ Eji Jisos song ji go ewong ji bo kpo lung re Oliv, owo abat'toono ebe kehm song kpir-e bo bo, kehm-e bahbe re, "Tong-r ngare nyi ejum jio bahke limi, wo fere tib-r elliingi ni bahke tibi elbake ena ni a bahke bake, a ni es'kohro eying jia."

⁴ Owo Jisos kehm faange bo re, "Kunen ekpu, eji nne awohng awohng l'ki-n nehm.

⁵ Tibre ane gbalee bahke bake go egama mbing, jo ba bung re, 'Me wo li Mesaya.' Toono o, bo nehm ane gbalee.†

⁶ M bahke kehme elwuku bada nta, fere jo wuk aka nta. Kana jo fahl! Tibre nsol nyia kpee bahke tiki lim, jol o es'kohro sang ma rehng na.

⁷ Ajahbe nyandiki bahke jo nok atemtem. Ajahbe nyandiki bahke kehme elnoko a atem ajahbe nyako! Njal, a ayam nya kpo sehng ane, go ndi agbehke bahke jo jol adi adi.

⁸ Nsol nyia kpee nyi li mbomannahb erem.

* 24:2 24:2 Luk 19:44 † 24:5 24:5 Elt 5:36-37; 1 Jon 2:18

⁹ “Ngare nyio nyi bo bahke jo bob-n, song ka re bo kak-n erem, fere wul-n. Ane kpee bahk-n jo ko ekv tib go egama mbing.‡

¹⁰ Ane gbalee bahke kehme elseele gbo, tibre bo bahke jo jabbe atemtem ka go, fere jo ko atemtem ekv.

¹¹ “Akimfahnge abanyehnamahr gbalee bahke longo ba, ba nehm ane gbalee.§

¹² Owo eji ab'bi ma tv ano, elgoro ni ane gbalee bahke kehme elmale.*

¹³ Nne no l'yiimi t'tahne go mbang nyi Esowo tete rehng go es'kohro, ye wo bahke bele eltahre.

¹⁴ Ngare nyi bo ma tiingi nnoobo etib bade etul bi Esowo tong njini kpee ana ejum ntianse, owo es'kohro bahke kehm rehng.

Ejum ji kp'sahb s'sab

(Mak 13:14-23; Luk 21:20-24)

¹⁵ “M bahke nyehne ‘ejum ji kp'sahb s'sab, ji bahke ranngedi’, ji nnyehnamahr a Daniel bungu no bade, yim go mbarebare edi.† Nne no l'lung nsol nyia, nong á kahn.

¹⁶ “Ngare nyio nyi ane ba li go Judea bahke beke, tahm go awong.

¹⁷ Nne no l'kuumu go ege ero etahk, á k'tohko seb elyele go ekp'kpa, song rod ejum fili.‡

¹⁸ Nne no l'jol go ege egbe, á k'tohko be, ba etahk, ba rod nsol ebjing enye.

¹⁹ “Eyuu a anebkal ba bahke jolo ela ngare nyio, a anebkal ba kpi abon go ebo.

‡ 24:9 24:9 Jon 16:2; Ell 13:15,17 § 24:11 24:11 1 Jon 4:1

* 24:12 24:12 2 Tim 3:1-5 † 24:15 24:15 2 Tes 2:4 ‡ 24:17 24:17 Luk 17:31

²⁰ Kaken ero, eji elbeke enahne ni rí bahke beke l'k'jol ngara nnale, k'fere jol efung Esabat.

²¹ Tibre erem bio bahke gbale sehng. Jol erem ana bio ka jol a jol ejolojolo bomo eji njini bomo no tete rehng anv. Jol nehm kpe tiki jol ano ejolojolo.

²² “Tohko jol re Esowo tele afung nyao kahbe, nnene nehm jol no bahke bele eltahre. Tib go esi ji ane ba Esowo ma yehke, owo wahnge Esowo bahke tele afung nyao kahbe.

²³ “Ngare nyio, nne l'tong-n re, ‘Nyehnen, Kraist ga!’ afi á tong-n re, ‘Nyehnen Kraist go!’ kana taame tv-e.

²⁴ Akimfahnge ane bahke lohngo ba, jo ba bung re, Bo ba li Mesaya. Egom jindiki bahke jo bung re, Bo ba li abanyehnamahr Esowo. Bo bahke kehme nliingi tib, fere jo lim akpokosi, eji limi limi kan, bo l'nehm aneb Esowo, ba Esowo ma jak.§

²⁵ Kunen ekpu, m ma-n tong jia ana, re ngare kehm rehng.

²⁶ “Ane l'kehm-n tongo re, ‘Nyehnen, ye go elka emahng!’ kana je go! Bo l'fere tong-n re, ‘Nyehnen, ye ga nkimi nyia!’ kana taame tv bo.

²⁷ Ana emangedu kpo lim, lennge duu, bomo go ero nfam tete rehng go erede nfam, ano wo elbake ni Mmon no nne bahke jolo.*

²⁸ Tibre edi ajehng ajehng ji ekpav ejum l'noongo, owo ntere bahke jeke song rur.†

§ 24:24 24:24 2 Tes 2:9; Ell 13:13 * 24:27 24:27 Luk 17:23-24

† 24:28 24:28 Ell 19:17,21

Elbake ni Mmon no nne
(Mak 13:24-27; Luk 21:25-28)

²⁹ “Ngare nyi erem bio ma mal,
 “njul bahke dvrvr,
 ebareka nehm kpe jo ya na eyakeyake.
 Alonlo bahke kehme elfooro go elbung gbo.
 Atahm nya elbung bahke range.‡

³⁰ “Owo ane bahke kehm nyehne elliingi ni
 Mmon no nne go elbung. Ane kpee ba li go njini
 bahke kehme ellingi, fere nyehn Mmon no nne
 kp'bake go akparesemsem, a nsahm a nsahm, a
 egburu ellub.§

³¹ Owo enjel bahke woro ntang wahre wahre.*
 Á bahke tumu babenjel tv ejang njini abehng
 abehng, a ejang elbung abehng abehng, eji bo
 l'song ko ane ba á jake bo, ba a bo edi ajehng.

Ejum elkpili ji li bade efig
(Mak 13:28-31; Luk 21:29-33)

³² “Kpilen ejum go elgan ni li bade eti ji bo
 kpo lung re efig.† Eji eti jio ma nyono, fere kak
 anyane, owo m bahke kahne re, nnale ebba.

³³ Tob li ka-n fvfo re, n l'nyehn nsol nyio kp'limi,
 owo m bahke kehm kahne re, ngare ebkabbe
 kpidi kpidi.

³⁴ “Etingitingi, n kp-n tongo re, Ane bao ba
 bahke jolo go elkpin ngare nyio, bo nehm kpo,
 tete nsol nyio lim kpee.

³⁵ Elbung abola ndi bahke tane, alum enyame
 nehm tiki tan.”

‡ 24:29 24:29 2 Pit 3:10 § 24:30 24:30 Ell 1:7; 19:11 * 24:31
 24:31 1 Tes 4:16; 1 Kor 15:52; Ell 10:7 † 24:32 24:32 Luk 13:6-9;
 Elt 15:16

Nnene limm, no kp'kahne ngare nyio
(Mak 13:32-37; Luk 17:26-30,34-36)

³⁶ “Nnene nehme kahn efung bio, a ngare nyio, jol babenjel ba li go ejahbetul Esowo nehme kahn, jol Mmon nehme kahn, sehngem Nsoo ntahngtahng wo kp'kahne.‡

³⁷ “Ana jolo go ngare nyi Noa, ano wo fvfo bahke tob jol ngare nyi Mmon no nne bahke bake.

³⁸ Ana wo jolo no ngare nyi nnyel nyi bulu njini kala yel. Ane bao jo li nsol, fere jo w'wo. Aneblum jo ko akal, anebkal jo bal alum tete rehng efung bi Noa yele go egbang.

³⁹ Tvtv o bo joom kahn ji kp'l'lim, tete nnyel yel, ba feenge bo kpee, tahm abo.

“Ano wo fvfo bahke tob jol ngare nyi Mmon no nne bahke bake.§

⁴⁰ Ngare nyio ane abal bahke jolo go egbe, noko, bo bahk-e koko, noko sa.

⁴¹ Anebkal abal bahke jo gok nsol, noko, bo bahk-e koko, noko sa.

⁴² “Jo baaben, tibre n nehme kahn efung bi Ntul ewahne bahke bake.

⁴³ Ji fuumu re wahn kahn, li re, nfontahk k'kahn ngare nyi nwajv bahke bake atv, kehn á jol baabe, á jolem taame re, bo ba lahm etahk eje ye.*

⁴⁴ Owo fvfo nobo re wahn toobo ebjing kpee. Tibre Mmon no nne bahke gbede na ba ngare nyi n ki bum re á kp'bake.

Nnooba nlokeltum, a ebi nlokeltum
(Luk 12:41-48)

‡ 24:36 24:36 Elt 1:7 § 24:39 24:39 2 Pit 3:5-7 * 24:43 24:43
 Luk 12:39-40

⁴⁵ “Nne awo li ekahnkahn nlokeltum no kpi ekakesehk? Ye wo li nne no nde ma yake alokeltum bako kak go ege ebo re á jo le bo go ngare.†

⁴⁶ Eyebatahng bahke jolo a nlokeltum noo no nde l'ba, á bahke ba kpir-e, á kp'limi ano.‡

⁴⁷ Etingitingi, n kp-n tongo re, Nde bahke faake a nsol enye kpee, kak-e go ebo.§

⁴⁸ “Á l'fere jol ebi nlokeltum, á bahke bungu go ege eltim re, 'Nsoo nehme waka ba.'

⁴⁹ Á bahke kehme alokeltum bako dv, fere jo jen a abawokamahm, jo li nsol a bo, fere jo w'wo.

⁵⁰ Owo nde nlokeltum noo bahke kehng efung bi á ki ekpu kunu, a ngare nyi á kil kahne.

⁵¹ Nde bahk-e bomo, kiimi akv akv akv, fere rod-e, kak edi ji ane ba kpi alum abal abal wob no. Owo ane bahke woomo, jo ling, fere jo kono amahn go esi.

25

Elgan ni li bada ngbahme na ewubu

¹ “Etul bi Esowo bahke jolo ana ngbahme na ewubu nyi rodo at'rekahng ebo, tahm re bo song wane nlumanne.*

² Ngbahme na elon jolo akahnkahn. Ngbahme nyehko na elon jolo agboolo.

³ Agboolo agbahme nyao rodo at'rekahng ebo, akehng bo filem.

† 24:45 24:45 Jon 21:15,17 ‡ 24:46 24:46 1 Kor 4:2 § 24:47
24:47 Mat 25:21,23 * 25:1 25:1 Luk 12:35-36; Ell 19:7

⁴ Akahnkahn agbahme nyao rodo at'rekahng, fere fili akpuma akehng budu.

⁵ “Eji nlumanne laange elbake, agbahme nyao kpee kehm kehme amahke lal, soro sa lal.

⁶ Nlum atv, nne jo r'rabe re, ‘Nyeppen, nlumanne kp'bake! Songen, wahn song wan-e!’

⁷ “Agbahme nyao kpee kehm mehle, toobo at'rekahng ebo bum.

⁸ Owo agboolo nyao kehm tongo akahnkahn re, ‘Nyahken akehng emahne ka-r, tibre at'rekahng enyahre yahke lahme.’

⁹ “Owo akahnkahn kehm faange bo re, ‘Akehng maa nehm biingi rehng egahne. Songen goji abajenare, wahn song gunu antahng.’

¹⁰ “Eji bo tahme no re bo song gunu akehng, nlumanne kehm bake. Ane bao ba toobo ebjing kehm tahme toon-e, song rehng go elkak elbal. Bo kehm bame mbu.

¹¹ “Ji kan a, agbahme nyako kehm tob ba, ba kehme elbunu re, ‘Nsoo, nsoo, lenng-r mbu!’†

¹² “Owo á kehm faange bo re, ‘Etingitingi, n kp-n tongo re, Wahn n nehme kahn!’ ”

¹³ Jisos kehm gohro bung re, “Jo kunen ekpu, tibre n nehme kahn efung, a ngare nyi Mmon no nne bahke bake.

Elgan ni li bade alokeltum na ara

(Luk 19:11-27)

¹⁴ “Etul bi Esowo bahke jolo ana nne no yahke ba eltahme eljen. Á kehm lungu alokeltum ebe, yake nsol enye, kak go bo abo.‡

† 25:11 25:11 Luk 13:25-27 ‡ 25:14 25:14 Mat 21:33

15 Á ka nne awohng awohng ana á bahke ma lim. Noko, á ka-e ekpa akpohko eblon, noko, ekpa akpohko ebbal, noko ajehng, kehm soro tahm eje.§

16 Nne no ko ekpa akpohko eblon kehm soro tahm, song jen are, li nsehng go ekpa akpohko eblon.

17 Ano wo nne no ko ekpa ebbal tob li nsehng ekpa ebbal fvfo.

18 Nne no ko ekpa ajehng kehm song rahm elbing, rod akpohko nde, kak o behr.

19 “Eji ma sahb k'kang, nde alokeltum bao kehm kehng, kehm ba tong alokeltum ebe re, bo ba toobo akpohko enye ka-e.

20 “Nlokeltum no ko ekpa akpohko eblon kehm koko ekpa akpohko eblon behko budu, ba a bi, kehm bungu re, ‘Nsoo, a ka-m ekpa akpohko eblon, nyehn ekpa akpohko eblon behka gana bi m ma li nsehng.’

21 “Owo nde kehm-e tongo re, ‘Woblim sehng, nkakesehk a nlokeltum no nno. Eji a bele ekake-sehk go abons'sohko abon nsol, m bahke yake agburu nsol, kak-a go ebo.* Ba yel ga, wo bel eyebatahng ana n kpi no.’

22 “Nne no ko ekpa akpohko ebbal kehm tob ba, ba bung re, ‘Nsoo, a ka-m ekpa akpohko ebbal, nyehn ekpa ebbal behka bi m ma li nsehng.’

23 “Owo nde kehm-e tongo re, ‘Woblim sehng, nkakesehk a nlokeltum no nno. Eji a bele ekake-sehk go abons'sohko abon nsol, m bahke yake

§ 25:15 25:15 Rom 12:6 * 25:21 25:21 Luk 16:10

agburu nsol, kak-a go ebo. Ba yel ga, wo bel eyebatahng ana n kpi no.'

²⁴ "Nne no ko ekpa akpohko ajehng kehm tob ba, ba bung re, 'Nsoo, n kp'kahne re, wo ebibbib nne ji. Á kpo kpa ji a ki bahm, fere fv nya a ki kak.

²⁵ N jo ffahl, owo n kehm tahme song behr akpohko enya go ndi. Nyehn nyanya ana.'

²⁶ "Owo nde kehm-e faange re, 'Wo ebi nlokeltum wo, no ma gbo ewon. Á k'kahn re, n kpo kpa ji n ki bahm, fere fv nya n ki kak.

²⁷ Kehn nde, a jol kake abajenare akpohko enyame, n l'ba, m ba ko, fere ko nsehng budu.[†]

²⁸ Taaren ye ekpa akpohko jio, wahn ka nne no kpi ekpa ebwubu.

²⁹ " 'Tibre nne awohng awohng no kpi no, bo bahk-e kake na budu, á bel gbalee. Nne no ki kpi, jol ntiil ana á kpi no, bo bahk-e taare na.

³⁰ Roden edemme nlokeltum noa, ro tv elatahk edi ejanne. Owo nne bahke woomo, jo ling, fere jo kono amahn go esi.'

Ana Mmon no nne bahke lame njini

³¹ "Ngare nyi Mmon no nne bahke bake go ege ellub, a enjel kpee, á bahke jehke go eti etul jio ji ellub ene.[‡]

³² Ane ba li go njini kpee, bo bahke koko bo, ba yiimi go ege esamahr. Owo á bahke kehm yabe bo ana mbaabebul kpo yab ejoro, bum eje eje, ebulbaange jol eje eje.[§]

[†] 25:27 25:27 2 Kor 6:1

[‡] 25:31 25:31 Ell 20:11-15 [§] 25:32 25:32 Jon 5:29

33 Á bahke rodo ejoro, bum ege ejang eboblum, fere rod ebulbaange, bum ege ejang ebobkal.

34 Owo ntul bahke kehm tongo ane ba yiim-e go ege ejang eboblum re, 'Baan, wahn jia ji Nsoo ma-n fuulu! Baan, wahn ba li etul bi Esowo ma toobo bum-n, bi lohng eji njini bomo na bom.

35 Tibre njal jo yam-m yam, n jo ka-m, n li. Alahb kor-m kor, n ka-m, n wo. N yel-n ejen, n vvr-m.

36 N jolo ebun ebun, n ka-m, m bobo. N jo y'yam, m ba, ba nyehn-m. N woomo go ngbekobo, m ba, ba nyehn-m.'

37 "Owo atingitingi ane bao bahk-e kehm faange re, 'Ntul, ntahn wo e nyehn-a no, njal ma-a yam, e ka-a, a li? Ntahn wo e nyehn-a no, alahb ma-a kor, e ka-a, a wo?

38 Ntahn wo e nyehn-a no ana njenne, e kehm-a vvr-v?* Ntahn wo e nyehn-a ebun ebun, e kehm-a kake, a bobo?

39 Ntahn wo e nyehn-a no, a kp'yame, jol go ngbekobo, e kehm ba nyehn-a?'

40 "Owo ntul noo bahke kehm faange bo re, 'Etingitingi, n kp-n tongo re, Ngare anyehng anyehng nyi n jo lim ano ka nne awohng no sahb r'rede go ellong abonanee ba li a, n jo limi ka me.†

41 "Owo á bahke kehm tongo ane ba yiim-e go ege ejang ebobkal re, 'Fak-m wahn go esamah, wahn ji Esowo ma-n su. Songen go ellulagun ni li go njinanjini, ni bo ma toobo bum nnehm, a enjel enye.‡

* 25:38 25:38 Hib 13:2 † 25:40 25:40 Hib 2:11 ‡ 25:41 25:41 Ell 20:10,15

⁴² Tibre njal yam-m yam, me í kaam, n li. Alahb kor-m kor, me í kaam, n wo.

⁴³ N yel-n ejen, me í vvrem. N jolo ebun ebun, me í kaam, m bobo. N jo y'yam, fere woomo go ngbekobo, í baam, ba nyehn-m.'

⁴⁴ "Owo bofono bahke tob faange re, 'Ntul, ntahn wo e nyehn-a no, njal kp-a yame, alahb jo kor-a? Ntahn wo e nyehn-a no ana njenne? Ntahn wo e nyehn-a no ebun ebun? Ntahn wo e nyehn-a no, a kp'yame? Ntahn wo e nyehn-a no, a wob go ngbekobo? Ntahn wo e nyehn-a ano, ki-a kak ebo?'

⁴⁵ "Owo á bahke kehm faange bo re, 'Etingitingi, n kp-n tongo re, Ngare anyehng anyehng nyi í ki jo lim ano ka nne awohng no sahb r'rede go ellong abonanee ba li a, í limem ka me.'

⁴⁶ "Ane baa bahke song yel go edi erem, jo nyehn erem o go njinanjini. Atingitingi ane bahke bele elkpín ni li go njinanjini."

26

Ana bo lame kak Jisos

(Mak 14:1-2; Luk 22:1-2; Jon 11:45-53)

¹ Eji Jisos ma bung alum nyaa kpee mal, á kehm tongo abat'toono ebe re,

² "Í kp'kahne re, lela ebsa nfung ebal, elkak Pasova rehng. Efung bio bi bo bahke jabbe Mmon no nne ka re bo kum-e go ekros."*

³ Owo atubesi abalimajom, a anebkul nfram kehm song kono go nlaaga ntubesi abalimajom no bo jo lung-e re Kayafas.

* 26:2 26:2 1 Kor 5:7

⁴ Owo bo toobo no ana bo bahke bobo Jisos mbehr mbehr, song wul.

⁵ Bo jo bungu re, “Nong, wahr k'lim ngare elkak, eji l'k'gbo ntong.”

*Ana bo wohngo Jisos akehng
(Mak 14:3-9; Jon 12:1-8)*

⁶ Eji Jisos jolo go Betani go etahk Saimon ji nne abili,

⁷ nnenkal awohng kehm bake go ege, no fili elom akehng ji nno a nno, ji sahb k'kim ekun. Á kehm yaange akehng mao, kak-e go esi ngare nyi á jehk go ekp'kuru kpi nsol li.

⁸ Eji abat'toono ebe nyehne ano, atahng kehm rake bo. Bo kehm bahbe re, “Jen ji wahnge á kp'fade akehng ana maa?

⁹ Kehn akehng maa bo jol gungu, ko akpohko gbalee, fere ko, ka akpak.”

¹⁰ Jisos sebe kan kahn ana bo jo bung, á kehm tongo bo re, “Jen ji wahnge n kp'gbiingi mmonankal noa? Yeblim nnoobo ka-m.

¹¹ Akpak li a nahne ngare anyehng anyehng, wo, me n limm a nahne ngare anyehng anyehng.

¹² Tibre eji mmonankal noa wohng-m akehng go egama ngubjing, á toobo ebjing ebame bum, bi m bahke kpoko.†

¹³ Etingitingi, n kp-n tongo re, Edi ajehng ajehng go njini kpee, ji bo bahke tiingi nnoobo etib bia, bo bahke tob jo bung jia ji nnenkal noa ma lim, fere jo buum-e.”

† 26:12 26:12 Mak 16:1

Ana Judas gungu Jisos

(Mak 14:10-11; Luk 22:3-6)

¹⁴ Nne awohng go ellong abat'toono Jisos, ewubu ane abal, no bo jo lung-e re Judas Iskariot kehm tahme, song kpiri atubesi abalimajom,

¹⁵ kehm bahbe bo re, "Ejum aji m bahk-m kake, n l'jabbe Jisos, kak-n go ebo?"

Bo kehm-e kake mpon esehma.‡

¹⁶ Bomo ngare nyio asongo, Judas kehm kehme mbang seb ana nyi á bahke jabbe Jisos ka bo.

Ana Jisos li elkak Pasova, a abat'toono ebe

(Mak 14:12-21; Luk 22:7-14,21-23; Jon 13:21-30)

¹⁷ Ngbokambang efung elkak ni Jus kpo li abred nya bo kil jo kak ayist, abat'toono Jisos kehm ba kpir-e, fere bahb-e re, "Gan wo a kp'sebe re wahr song toobo nsol alehke nyi elkak Pasova bum-a?"

¹⁸ Á kehm tongo bo re, "Songen go nla ejahbe goji nne awohng, wahn song tong-e re, 'Nt'tibi re, Ngare enyame ebkabbe. M bahke lehke elkak Pasova, a abat'toono ebame go ega etahk.' "

¹⁹ Abat'toono Jisos kehm song toobo nsol elkak Pasova nio bum, ana Jisos tongo bo.

²⁰ Eji elgung ma ba, Jisos kehm song ji go ekp'kuru, jo li nsol, a abat'toono ebe, ewubu ane abal.

²¹ Eji bo jo li nsol o, á kehm bungu re, "Etingingi, n kp-n tongo re, Nne awohng ewahne bahk-m jabbe ka go."

²² Ndon kehm fili bo. Bo kehm-e kehme elbahbe. No nne re, "Nsoo, me wo afi?"

‡ 26:15 26:15 Jon 11:57; 1 Tim 6:9-10

²³ Owo á kehm faange bo re, “Nne no kp'na tohko ebred eje ekpingi ajehng a name, ye wo li nne no bahk-m jabbe ka.§

²⁴ Mmon no nne bahke kpoko jang jang ana bo nyono bada ne. Eyyu a nne no bahke jabbe Mmon no nne ka.* Jol ga nob, li re nne noo bo we jelem.”

²⁵ Judas ji gung-e no kehm bahbe re, “Nt'tibi, anv, me woa?”

Jisos kehm-e faange re, “Ee, wo wo.”

Nsol alehke nyi elbuumu Jisos

(Mak 14:22-26; Luk 22:15-20; 1 Kor 11:23-25)

²⁶ Eji bo kpi nlehke nlehke nsol, Jisos kehm rodo ebred, kak Esowo saam, fere bakke, ka abat'toono ebe, kehm bungu re, “Koon, wahn li! A wo li ngubjing enyame.”

²⁷ Owo á kehm rodo nkob, kak Esowo saam, kehm kake bo, kehm bungu re, “Woon, wahn ane kpee!

²⁸ Tibre a wo li alung emame ma egbanngalung ji nfenfe, ma kp'fabe ka ane gbalee, eji bo l'bel eltahmeka go bo abiafem.

²⁹ N kp-n tongo re, N nehm kpe wo alahb avain maa tete efung bio rehng bi m bahke kpe wo a nahne go ejahbetul ji Nsoo.”

³⁰ Owo bo kehm yimi ese, kehm lohngo tahm go ewong ji bo kpo lung re Oliv.†

Ana Jisos nyehne amahr bade ana Pita bahk-e tene

(Mak 14:27-31; Luk 22:31-34; Jon 13:36-38)

§ 26:23 26:23 Jon 13:18 * 26:24 26:24 Luk 17:1 † 26:30 26:30
Luk 22:39; Jon 18:1-2

³¹ Owo Jisos kehm tongo bo re, “Atv maa m bahke dulu tib esi ejame. Tibre bo nyono go nwer Esowo re,

“ ‘M bahke wulu mbaabebul, ejoro bahke yaame ebo.’[‡]

³² Ngare nyi m ma nyahme, m bahk-n gboko mbang, song rehng go Galili.”[§]

³³ Owo Pita kehm-e faange re, “Afi ane baka kpee dulu na, me, wa n nehm be sa.”

³⁴ Owo Jisos kehm-e tongo re, “Etingitingi, n kp-a tongo re, Atv maa, re nkok kehm kuku, a bahke gbaame nkpel era re, me a nehme kahn.”

³⁵ Pita kehm-e faange re, “Afi elkv ni m bahke kpoko a na, wa n nehm tiki ten.”

Abat'toono bako kpee tob bung ano fvfo.

Ana Jisos kake ero go Gesemani

(Mak 14:32-42; Luk 22:39-46)

³⁶ Owo Jisos kehm koko abat'toono ebe, tahm a bo song rehng go edi ji bo jo lung re Gesemani, kehm tongo bo re, “Jiin ana, tete me n song kak ero o feere.”

³⁷ Á kehm rodo Pita, a abon abal ba Sibidi, tahm a bo. Ndon kehm-e kehme elfili, ala fere jo teel-e.*

³⁸ Á kehm tongo bo re, “Eltim ename ebjol ndon ndon sehng, rehng go elkv. Jiin a, wahn jo tob-m elbaabe.”

³⁹ Á kehm reenge je go es'song, song gbo, kohk esamahr ndi, kehm kehme ero kak re, “Nsoo, tohko ga tahne, fak-m nkob erem nyia. Ana koro me sang, ana koro wo wo.”[†]

[‡] 26:31 26:31 Jon 16:32 § 26:32 26:32 Mat 28:7 * 26:37 26:37
Hib 5:7 † 26:39 26:39 Jon 12:27; Hib 5:8; Fil 2:8

⁴⁰ Á kehm feere ba kpiri abat'toono ebe kp'lale, kehm tongo Pita re, “Í maam ji awa anyehng nya nya tob-m elbaaba?”

⁴¹ Jo baaben, wahn jo kak ero, eji n l'k'yel go elgaare. Etohko, mbang nyi Esowo kp-e koro, wo ga, ngubjing kp'leenge.”

⁴² Á kehm kpe feere, song kak ero re, “Nsoo, l'fere jol nyi m bahke woko go nkob nya, a tohko fere fak-m nkob nya go elbohngo, nong, mbang enya lim!”

⁴³ Eji á kpe feere ba, á kehm kpe ba nyehn bo kp'lale. Tibre akpakamahr lubu bo ellu ellu.‡

⁴⁴ Jisos kehm kpe tahm bo sa, kpe song kak ero b'nehm.

⁴⁵ Á kehm kpe feere ba kpiri abat'toono ebe, kehm tongo bo re, “Í kpi nlale nlala, fere jo re ekva? Ngare ebkabbe na a, nyi bo bahke jabbe Mmon no nne, kak aneb abiafem go ebo.

⁴⁶ Mehlen, wahr tahmen! Nyehnen, nne no bahk-m jabbe ka, ma kabbe a.”

Ana bo bobo Jisos

(Mak 14:43-50; Luk 22:47-53; Jon 18:3-12)

⁴⁷ Eji Jisos kpi mbungu mbungu, Judas ji woomo go ellong abat'toono ebe, ewubu ane abal, kehm ba lohng, a ellong ane gbalee ba fili akah-ngkahng, a atahmtahm. Atubesi abalimajom, a anebkul nfam ba tumu bo.

⁴⁸ Nne no gung-e no tongo ane bao wuku wuku ana bo bahke liingi Jisos. Á tongo bo re, “Nne no n l'sod-e nnyo, ye wo, m bahk-e bobo.”

‡ 26:43 26:43 Rom 7:22-23

⁴⁹ Owo á kehm soro sehng na sehng, song rehng goji Jisos, kehm bungu re, “Nt’tibi, n kp-a kake nnyo,” kehm soro sod-e nnyo.

⁵⁰ Jisos kehm-e bahbe re, “Mbi, a ba jen?”

Owo bo kehm bake, ba bob Jisos.

⁵¹ Nne awohng go ellong ane ba jolo a Jisos o kehm wobo ekahngkahng ebe go mbak, kpale nlokeltum a ntubesi abalimajom etung.

⁵² Owo Jisos kehm-e tongo re, “Feere a ekahngkahng eba, wo kak go mbak! Tibre ane ba kpo nok abohng akahngkahng, bo bahke kpoko elkv akahngkahng.

⁵³ Anv, a nehme kahn re, n jol ma gboongo Nsoo, á tum sehng nlong enjel ewubbal re bo ba kak-m eboa?§

⁵⁴ Wo, l’fere jol ano, adi nwer Esowo nya bungu bade elkv ename bahke kehm jolo go etingitingi renan?”

⁵⁵ Owo Jisos kehm bungu tong ellong ane bao re, “Anv, n lohngo ba a akahngkahng, a atahm-tahm re wahn ba bob-m ana n li nwajva? Efung abehng abehng n jo ji go etahk Esowo, jo tib-n, me n tikem bob.

⁵⁶ Nyaa kpee limi, eji alum nya abanyehnamahr Esowo nyono no l’lohko jol go etingitingi.”*

Abat’toono ebe kpee kehm-e yaame sa, be ebo tahm.

*Ana Jisos yiimi go esamahr elam
(Mak 14:53-65; Luk 22:54-55,63-71; Jon 18:13-14,19-24)*

§ 26:53 26:53 Jon 10:18 * 26:56 26:56 Mat 26:31

⁵⁷ Ane ba bobo Jisos kehm-e koko, tahm a ne go etahk Kayafas ji jolo ntubesi abalimajom. Owo at'tibi ba atahm, a anebkul nfam kono asi.

⁵⁸ Jisos jo jene ekv. Pita jen ekv, á kehm ba rehng go nlaaga ntubesi abalimajom, kehm song ji a alokeltum nfontahk, eji á l'nyehn ji bahke jolo.

⁵⁹ Atubesi abalimajom, anebkul nfam, a atul esub jo sebe mbang ana nyi bo bahke kiimi afahnge lake Jisos, toono o, bo wul-e.

⁶⁰ Bo tikem kahn mbang anyehng anyehng, jol eji akimfahnge atianse gbalee lohngo lohng ba yiimi.

Es'kohro, akimfahnge atianse na abal kehm gohro lohng ba yiimi,

⁶¹ fere bung re, “Nne noa tongo re, á bahke ma wa etahk Esowo, fere tuungu si go nfung era.”†

⁶² Owo ntubesi abalimajom kehm mehle yiimi, kehm bahbe Jisos re, “A nehm faanga? Ejum aji ane baa kp'bungu tob-a?”

⁶³ Jisos belle na eje.

Ntubesi abalimajom kehm-e kpe tong re, “N kpa rehke go esamahr Esowo bi li go elkpín re wo tong-r joare wo Mesaya wo, ji li Mmon no Esowo.”

⁶⁴ Owo Jisos kehm-e faange re, “Me wo. N kp-a tongo re, Bomo anv asongo m bahke nyehne Mmon no nne jehk go ejang eboblum bi Esowo bi gbale sehng, n fere nyehn-e á kp'bake go akparesemsem.”‡

⁶⁵ Owo ntubesi abalimajom noo kehm yare ewobo eje, kehm bungu re, “Yebsu Esowo!

† **26:61 26:61** Jon 2:19-21 ‡ **26:64 26:64** Mat 24:30; Ell 14:14

Ntianse anyehng anyehng e nehme kpe seb. Wah-nfono antahng ebwuk ab'bi alum nya á ma bung.

⁶⁶ “N tiri renan?” Bo kehm faange re, “Yebli ebi ji fuumu re bo wul-e.”§

⁶⁷ Bo kehm soko atel wohng-e go ege esamahr, fere dv-e. Egom jindiki jo ruum-e nkpal,

⁶⁸ fere jo bung re, “Mesaya, nyehn-r amahr, wo fere tong-r nne no rum-a no.”

Ana Pita tene Jisos

(Mak 14:66-72; Luk 22:56-62; Jon 18:15-18,25-27)

⁶⁹ Pita ji eje ga elatahk. Nlokeltum awohng no jolo nnenkal kehm lohngo ba rehng go ege, kehm-e tongo re, “Wo fvfo, a tob jolo a Jisos ji Galili.”

⁷⁰ Á kehm gbaame go esamahr ane bao kpee re, “N nehme kahn ejum ji a kp'b'bung.”

⁷¹ Eji Pita ma tahm, song rehng go mbuga, nnenkal noko kehm-e kpe nyehn, kehm tongo ane ba jolo ona re, “Ye jia tob jolo a Jisos ji Nasaret.”

⁷² Á kehm kpe gbaame, fere tir re, “Nne noo, we n nehme kahn.”

⁷³ Eji ma ji mmokidi, ane ba yiimi kohlo o kehm bake ba kpiri Pita, kehm-e tongo re, “Etingitingi, a tob wob go bo ellong. Tibre alum nya a kp'bungu, nya nya kp'tibi ejahbe ji a lohng no.”

⁷⁴ Pita kehm tiri re, “Esowo demm-m na demme. N nehme kahn nne noo.”

Tvtv ona nkok kehm soro kuk.

⁷⁵ Pita kehm soro buumu alum nya Jisos tong-e re, “Re nkok kehm kuku, a bahk-m tene nkpel

§ 26:66 26:66 Jon 10:33; 19:7

era.” Pita kehm lohngo ona, song kehme ellingi ndon ndon.

27

Ana bo ko Jisos, tahm a ne goji Paillet, nne a Rom no jo fili Juda

(Mak 15:1; Luk 23:1-2; Jon 18:28-32)

¹ Eji efungfu se no, atubesi abalimajom kpee, a anebkul nfam kehm toobo ana bo bahke wulu Jisos.

² Eji bo m-e kak agbekobo, bo kehm-e koko, tahm a ne, song yak-e kak Paillet go ebo, ye ji jolo ntubesi ejahbe.

Ana Judas kpo no

(Elt 1:18-19)

³ Eji Judas ji gung-e no nyehne re, Jisos ebli ebi, á kehm gboko ndon, fere rod mpon esehma nyio, feere a nyi re á song ka atubesi abalimajom, a anebkul nfam,*

⁴ kehm bungu tong bo re, “Me n lim abiafem, eji n gungu nne no ki lim ebi ajehng ajehng.”

Bo kehm-e faange re, “O elam ejahre sang, nfem enya nyi go.”

⁵ Á kehm saade akpohko nyao, kak go etahk Esowo, kehm tahme eje, song kahn elne ekehd.

⁶ Atubesi abalimajom kehm rodo akpohko nyao, fere bung re, “Abi akpohko nyaa, akpohko alung nya. Fuumem re, akpohko nyaa woomo semme a akpohko ayare.”

* 27:3 27:3 Mat 26:15

⁷ Bo kehm toobo, rod akpohko nyao, song gunu edi egbe ji jolo ji ntokatu, eji bo l'jo kpa ajahmjahm kak edi ndi jio.

⁸ Owo wahnge bo kpo lung edi ndi jio re, "Egbe alung", tete sik anv.

⁹ Owo kehm lohko jol go etingitingi ana nnyehnamahr Jeremaya bungu no re, "Bo rodo mpon esehma nyio nyi jolo ekun bi aneb Israel taame re bo ka go ege esi,

¹⁰ song gunu edi egbe ji ntokatu, ana Jehova tong-m no."

Ana Paillet jo bahb Jisos abahbe

(Mak 15:2-5; Luk 23:3-5; Jon 18:33-38)

¹¹ Jisos kehm song yiimi go esamahr ntubesi ejahbe no bahb-e re, "Wo wo li ntul no Jusa?"

Jisos kehm-e faange re, "Ee, me wo."

¹² Eji atubesi abalimajom, a anebkul nfam jo ka-e ebi, ejumjum á faangem.†

¹³ Owo Paillet kehm-e bahbe re, "Anv, a nehme wuk nsol gbalee nyi bo kp'bungu tob-aa?"

¹⁴ Jol Jisos we tikem faange.‡

Ntubesi ejahbe noo kehm-e kpoko esi tete.

Elam ji bo kimi re bo wul Jisos

(Mak 15:6-15; Luk 23:13-25; Jon 18:39-19:16)

¹⁵ Elkak anehng anehng ntubesi ejahbe jo kono elyehke nne a ngbekobo awohng, ka ellong ane, no bo l'seb.

¹⁶ Ngare nyio nne awohng woomo ngbekobo, no bo jo lung-e re Barabas. Nnene jolem no ki-e kahn.

† 27:12 27:12 Mat 26:63 ‡ 27:14 27:14 Jon 19:9

17 Eji bo ba kono edi ajehng, Paillet kehm bahbe bo re, “Nne awo n kp'sebe re me n yehke yake, Barabas, afi Jisos ji bo kpo lung-e re Kraist?”

18 Tibre á jo kahne kpee re, bo ko-e ba ka-e, tib eji á jo teelee bo ala.§

19 Eji Paillet jehk go ege eti elam, nkal ewe kehm tiingi tv-e re, “Ka lak etingi nne jio abo, tibre ye wo wahng ka n nyehne erem gbalee go egama nlem nyi n leeme no lela.”

20 Atubesi abalimajom, a anebkul nfam kehm kehme ellong ane bao eltim senngre re, bo gboongo Paillet, á yehke Barabas yake, fere wul Jisos.

21 Ntubesi ejahbe noo kehm bahbe bo re, “Ane abal baa, nne awo n kp'sebe re me n yehke yake?”

Bo kehm faange re, “Barabas wo.”*

22 Paillet kehm bahbe bo re, “Anv, me n lim Jisos jen, ye ji bo kpo lung-e re Kraist?”

Bo ane kpee kehm faange re, “Kum-e go ekros!”

23 Ntubesi ejahbe noo kehm bahbe re, “Anv, ebi aji á ma lim?”

Bo kehm kpe rabe wahre wahre wahre re, “Kum-e go ekros!”

24 Eji Paillet sebe kahn re, ejumjum kpeem li ji á bahke kpe ma lim, gana ntong yahke gbo, owo á kehm koko alahb, ba ru abo go esamahr ane bao, kehm bungu re, “Elkv ni nne noa bahke kpoko, ebo ebame o wobem, nfem enyahne nyi go.”

25 Owo ellong ane bao kpee kehm-e faange re, “Nong, alung eme tuun-r, a abon abon ebahre.”

§ 27:18 27:18 Elt 13:45 * 27:21 27:21 Elt 3:14; 1 Pit 3:18

²⁶ Paillet kehm yehke Barabas ka bo, á for, tong bo dv Jisos, fere yak-e ka re bo song kum-e go ekros.

*Ana nsoja nyoko Jisos
(Mak 15:16-20; Jon 19:2-3)*

²⁷ Owo nsoja nyi ntubesi ejahbe noo kehm rodo Jisos, tahm a ne go nlaaga ntubesi noo, kehm song lung ellong nsoja nehko re bo ba.

²⁸ Bo kehm-e yehke nsol go ngubjing, fere kak-e mbilibili ekpawobo ana ji atul kpo kono elkake.

²⁹ Bo kehm tahnge ekpasi akpiri, ba konng-e go esi, fere ka-e ehti, á fili go ege eboblum, kehm jo gbo, jamm-e alahng go ege alata, fere jo nyok-e re, “E kp-a kake nnyo, ntul no Jus.”

³⁰ Bo kehm jo so atel wohng-e, fere taare ehti bi á fili go ebo, jo rum-e go esi.

³¹ Eji bo m-e nyok ano kpee, owo bo kehm-e yehke ekpawobo jio, feere a nsol enye kak-e, ko-e tahm a ne re bo song kum-e go ekros.

*Ana bo kumu Jisos go ekros
(Mak 15:21-32; Luk 23:26-43; Jon 19:17-27)*

³² Eji bo ma lohng fi, bo kehm song nyehn nne no bo jo lung-e re Saimon ji jolo nne a Sirin. Bo kehm-e bobo re á sol ekros ji Jisos.

³³ Eji bo song rehng go edi ji bo jo lung re Golgota ji lohngo re “edi nkpakesi”,

³⁴ owo bo kehm-e kake amahm ma bo semme alullul anyane. Eji Jisos wuungu no, á kpeem wo.

³⁵ Bo kum-e kan a lake go ekros, bo kehm soro kehme elfaange tub, eji bo l'mal baange nsol ebjing enye.

³⁶ Eji bo ma baange nsol nyio, bo kehm jehke o, jo baab-e.

³⁷ Bo kehm lake ekpakenwer go ero kohlo go ege esi, ji bo nyono ebi ji bo ka-e re, “A WO LI JISOS, NTUL NO JUS.”

³⁸ Owo bo kehm tob kum awajv abal lake go akros, noko go ege ejang eboblum, noko go ege ejang ebobkal.

³⁹ Ane ba jo sehng go mbang kehm kehme aromo tuubu, fere jo su-e re,

⁴⁰ “Wo sang jo bung re, a bahke wake etahk Esowo, fere tuungu si go nfung eraa? Tahre elna anv me! L'jol re, wo Mmon no Esowo wo, badde go ekros me!”[†]

⁴¹ Atubesi abalimajom, a at'tibi ba atahm, go anebkul nfam tob jo nyok-e ano fvfo re,

⁴² “Á kpo tahre ane bako, yefono nehm ma tahre elne! L'jol re ye ntul no Israel wo, nong, á tohko badde go ekros ba, wahr kehm taame tv-e.”[‡]

⁴³ Á kpo bum Esowo go etingitingi, nong, Esowo tahr-e me, á l'kor-e. Tibre á kpo bung re, ye Mmon Esowo wo.”

⁴⁴ Awajv nya bo tob kumu bo ana ye, jo tob su-e ano.

Ana Jisos kpo no

(Mak 15:33-41; Luk 23:44-49; Jon 19:28-30)

⁴⁵ Eji efin ma yiimi, ejanng ekehm gboko go ejahbe jio kpee, ji tete biingi awa ara.

⁴⁶ Eji ma rehng nkaranka era nyi elgung, Jisos kehm rabe wahre wahre wahre re, “Eli, Eli, lama

[†] 27:40 27:40 Mat 26:61; Jon 2:19-21 [‡] 27:42 27:42 Mat 12:39-40

sabaktani?" ji lohngo re, "Nsoo, Nsoo, jen ji wahng ka a ma-m yake ana?"§

⁴⁷ Ane bandiki ba yiimi o wuk, kehm bungu re, "Á kpi Elaija lung."

⁴⁸ Owo nne awohng kehm soro be eje, song rod nd'dahng, suku go evinegar, tung go esi ebtí, rod ton-e re á yab.

⁴⁹ Egom ane bako kehm bungu re, "Tohken nong, wahr nyehnen, joare Elaija bahke bake, ba tahr-e."

⁵⁰ Jisos kehm kpe rabe wahre wahre wahre, kehm yake etohko eje ka go.

⁵¹ Owo ekpiki ji bo tohko go etahk Esowo kehm soro yang ejang ebbal, bomo go ero tete ba jahm ndi.* Ndi kehm gbehke. Akpartal bahnge.

⁵² Alahm kehm lennge. Aneb Esowo gbalee ba kpo no, kehm nyahme.

⁵³ Ngare nyi Jisos nyahme go elkv, bo kehm lohngo go alahm, tahm song rehng go Jeusalem. Owo ane gbalee nyehne bo.†

⁵⁴ Eji ntubesi a nsoja, a nsoja nyehko nyi jo tob baabe Jisos a ne nyehne ana ndi ma gbehke, fere nyehn nsol nyehko nyi kpe lim budu, bo kehm kehme elfahle, fere kehme elbungu re, "Etingitingi, nne noa lohko jol Mmon no Esowo!"

⁵⁵ Anebkál gbalee ba lohngo go Galili, ba jo toono Jisos, fere jo kak-e ebo, yiimi ebo go fee, jo nyehn.‡

§ 27:46 27:46 2 Kor 5:21 * 27:51 27:51 Hib 10:19-20 † 27:53 27:53 Elt 26:23 ‡ 27:55 27:55 Luk 8:2-3

⁵⁶ Meri ji lohng go Magdala woomo go bo ellong, a Meri nnyehn Jems a Josef, go nnyehn abon Sibidi.

Ana bo kake Jisos go elahm

(Mak 15:42-47; Luk 23:50-56; Jon 19:38-42)

⁵⁷ Eji elgung ma ba, efange nne ajehng ji bo jo lung-e re Josef, ji lohng go Arimatia kehm bake. Ye fvfo tob jolo nt'toono no Jisos.

⁵⁸ Á kehm tahme song kpiri Paillet, fere gboong-e re á yake ekv ji Jisos ka-e. Paillet kehm tongo re, bo yake ekv eje ka-e.

⁵⁹ Josef kehm rodo ekv ji Jisos, kpennge abarebare abomo nya nfenfe,

⁶⁰ fere rod, song kak go ege elahm bi bo kp'na rahme go ekpartal. Á kehm banngge egburu eltal, bulu go nnyo elahm, kehm tahme eje.

⁶¹ Meri ji lohng go Magdala, a Meri jehko, bo kehm song ji, wane elahm bio.

Ane ba jo baabe elahm

⁶² Etoono efung behko, eji efung ebjing atoobo ma sehng, atubesi abalimajom, a Bab Farisi kehm song kono asi go etahk Paillet,

⁶³ kehm-e tongo re, “Nsoo, wahr ebbuumu ana nnehm a nne noo bungu ngare nyi á kpeke li go elkpin re, ‘Nfung era m bahke nyahme go elkv.’”

⁶⁴ Tum ane, bo song baabe elahm bio tete nfung era nyio biingi, eji abat'toono ebe l'k'song v ekv eje, fere jo bung tong ane re, ‘Yebnyahme go elkv’. Tohko jol ano, es'kohro enehm bia bahke sabe sehng bi ngbokambang.”

⁶⁵ Owo Paillet kehm bungu re, “Koon ab'baabe, wahn song baabe elahm ana á kahne no.”

⁶⁶ Bo kehm tahme, song bum ab'baabe o re bo baabe elahm, fere rod elak lake, kak elliingi,* (eji bo l'kahn, nne l'yel go elahm).

28

Ana Jisos nyahme go elkv

(Mak 16:1-10; Luk 24:1-12; Jon 20:1-10)

¹ Eji Esabat ma sehng, ngbokambang efung go erahde, efungfu behre behre Meri ji lohng go Magdala, a Meri jehko, bo kehm tahme re, bo song nyehn elahm.

² Owo ndi kehm soro kehme elgbekhe tete, tibre enjel nyi Jehova lohngo go ejahbetul Esowo ba, ba bannge eltal nio bum go nkpe, fere ji.

³ Á jolo are emangedu ji. Nsol nyi á kake go ngubjing jo bare kparaang.*

⁴ Ab'baabe bao fahl-e sehng, fere jo k'kahn, bo fere jolo are akvne nya.

⁵ Enjel nyio kehm tongo anebkal bao re, “Kana kpe fahl! Tibre n kp'kahne re, n kpi Jisos seb, ji bo kum-e go ekros.

⁶ Ana á limm, yebnyahme fi, ana á bungu no. Baan, wahn ba nyehn edi ji á noongo no.

⁷ Songen anv elwaare, wahn song tong abat'toono ebe re, yebnyahme go elkv. Á bahk-n gboko mbang song rehng go Galili.† Go wo m bahk-e nyehne. Buumen ji m ma-n tong a!”

* **27:66 27:66** Ell 5:1 * **28:3 28:3** Mat 17:2; Elt 1:10 † **28:7 28:7** Mat 26:32

⁸ Owo bo kehm lohngo go elahm elwaare, elfahle elfahle, a egburu eyebatahng, be re bo song tong abat'toono ebe.

⁹ Eji bo fi no re bo song tong abat'toono ebe, owo Jisos kehm ba wane bo, kehm bungu re, “N kp-n kake nnyo.”

Bo kehm jeere kohl-e, jamm-e alahng, jabb-e akpade, fere kak-e.

¹⁰ Jisos kehm tongo bo re, “Kana kpe fahl! Songen, wahn song tong abonanee re,‡ bo song go Galili. Go wo bo bahk-m nyehne.”

Ana ab'baabe elahm song tooro

¹¹ Eji anebkal bao ma tahm fi, ab'baabe elahm bandiki kehm tahme, song rehng go nla ejahbe, song tooro ejum ajehng ajehng ji ma lim, tong atubesi abalimajom.

¹² Atubesi abalimajom, a anebkul nfam kehm song kono edi ajehng, kehm toobo, ka ab'baabe elahm bao akpohko gbalee,

¹³ kehm bungu re,

“Ana wo m bahke jo bung re, ‘Abat'toono ebe ba atv, ba v nkvn, tahm a ne ngare nyi e jo lal.’§

¹⁴ Ntubesi ejahbe l'wuk, e bahke song bung a ne, wahn, kana tiiri!”

¹⁵ Ab'baabe elahm bao kehm rodo akpohko nyao, song lim ana bo tongo bo. Eka jia, Jus kpi ntubu ntubu, tong atem tete sik anv.

Ana Jisos ba kpiri abat'toono ebe

(Mak 16:14-18; Luk 24:36-49; Jon 20:19-23; Elt 1:6-8)

‡ 28:10 28:10 Hib 2:11 § 28:13 28:13 Mat 27:64

¹⁶ Abat'toono Jisos, ewubu a nne awohng, bo kehm tahme go ewong ajehng ji li go Galili, edi ji Jisos tongo bo re bo je.

¹⁷ Eji bo nyehn-e no, bo kehm gboko, jamm-e alahng, fere kak-e. Egom jindiki jo ffaabe.

¹⁸ Jisos kehm jeere kohlo bo, kehm tongo bo re, "Bo ma-m ka nsahm kpee nyi m bahke jo fili ejahbetul Esowo, fere jo fili njini.*

¹⁹ Songen fvfo go njini kpee, wahn song lim ane, bo jol abat'toono ebame go ejahbe ajehng ajehng. Wohngen bo alahb go mbing nyi Nsoo, a Mmon, a Etingi Etohko,

²⁰ wahn fere tib bo, bo jo bum ejum ajehng ajehng ji m ma-n tong. Buumen re, m bahke jolo a nahne ngare anyehng anyehng tete eying jia mal."

* **28:18 28:18** Mat 11:27; Ef 1:20-23

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4